

894.6

11 - 17

արար գիր

Իրակլի Սամսոնաձե  
ականջաբարձ



Անտարես

ՀՏԴ 894.631-31 Սամսոնաձե  
ԳՄԴ 84Վր-44  
Ս 177

The book is published with the support of the Ministry of Culture and  
Monument Protection of Georgia.

Translator ANAHIT BOSTANJYAN  
Վրացերենից թարգմանեց  
ԱՆԱՀԻՏ ԲՈՍՏԱՆՋՅԱՆԸ

Խմբագիր՝  
ԱՐՔՄԵՆԻԿ ՆԻԿՈՂՈՍՅԱՆ

Սամսոնաձե Ի.  
Ս 177 Ականջաբարձ: Վեպ/ Իրակլի Սամսոնաձե.- եր.:  
Անտարես, 2014.- 184 էջ:

Վրացական արդի գրականության լավագույն ներկայացուցիչներից մեկի՝ Իրակլի Սամսոնաձեի այս վեպը հետսովետական այսպես կոչված՝ անցումային տարիների դժվարին ժամանակաշրջանն է վկայագրում: Բարոյահոգեբանական և արժեհամակարգային աղճատված իրականության մեջ Սամսոնաձեն Մարդ, Բաղաբացի, Մտավորական մնալու դժվարին, բարձր առաքելության խնդիրն է դնում:

ISBN 978-9939-51-664-6

11768

©Irakli Samsonadze

©2012, Intelekti Publishing, Tbilisi, Georgia

© «Անտարես», 2014



Ոսկորների մեջ՝ սարսուռ: Նախքան հիվանդանալը: Եթե միզելու ժամանակ քեզ ցնցում է հիվանդությանը նախորդողողը, թվում է՝ ներսից դուրս ես շարտում գրիպի բացիլը: Անկախ քեզնից լավատես ես դառնում: Բայց դա երկար չի տևում: Ընդամենը՝ մի ակնթարթ: Ջուրը տանում է: Տարավ: Չէ՛: Քարշ է տալիս: Փական: Ջուգարանից՝ դեպի նեղ միջանցք: Դեպի լոգարան: Լոգարանի դուռը: Լոգարանում: Հայելի: Հայելու մեջ՝ ես: Մորուքիս մեջ, քիսն մազերիս, սպիտակը՝ ավելի շատ: Քթոսկրս՝ ներս ընկած: Ուռած կուպերիս մոտ՝ դեղնություն: Ձախից՝ կապտուկ: Դեմքս՝ հայելուն մերձ: Մոտիկ: Ավելի մոտիկ: Երկու օրում դեղնությունը կանցնի: Կապտուկն էլ կանհետանա: Հայելին գոլորշապատվում է:

Պնչերիցս: Ինձնից ջերմություն է դուրս գալիս: Ես ցուրտ եմ ներծծում: Սառը մատներով՝ ծորակի բռնակից: Ցուրտ է: Եղյամակերպ սառը ջուրը՝ բռանս մեջ: Դեմքիս: Էլի՛: Էլի՛: Խավոտ երեսորբիչ: Չոր: Առողջ: Սանր: Մազարմատներիս մեջ՝ ցավ: Հիվանդանում եմ: Կհիվանդանամ: Գրիպ: Ձեռքս՝ ծորակի բռնակին: Ջրի ձայնը կտրվեց: Լոգարանից՝ դեպի նեղ միջանցք: Սիգարետ: Ուզում եմ: Սիգարետ: Ունեմ: Խոհանոցի դուռը: Խոհանոցում: Սեղանի վրա՝ սիգարետի բացած տուփ: Սուրճ: Լոյս չկա: Ոչ էլ՝ գագ: Սիգարետ: Ուզում եմ: Սակայն նախ՝ մի կտոր բան: Գունե բերանս մի պատառ դնեմ: Պետք է: Ինչո՞ւ: Չգիտեմ: Ծամում եմ: Թրջվում-փափկում է: Կոկորդիս միջով անցավ: Պատառը, թվում է, շանթում է մազարմատներս: Հիմա կարելի է: Կրակվառիչը՝ երկրորդ անգամ կպցնելիս: Կրակվառիչ պիտի գնեմ: Ծուխ եմ արձակում: Մի շնչով: Անհամ է: Թմրեցնում է: Մարմինս՝ աթոռին: Առավոտյան սիգարետ՝ 6-7 անգամ նաֆաս քաշելով: Վախոն: Երևի կզանգի: Հոլանդիայից: Կամ Բելգիայից: Կամ Գերմանիայից: Պատուհան: Պատուհանից այն կողմ՝ հալչող ձյունից

թաց սալահատակ: Կամուրջ: Ծառեր: Ամպամած երկինք: Ե՞րբ եմ վերջին անգամ եղել փողոցում: Մի շաբաթ առաջ: Չէ՛: Չորս օր առաջ: Թե՛՞ հինգ: Հա՛: Հնդկացորեն տարա շուկա: Նաև՝ մակարոն: Ցույց: Փակ փողոց: Մեջքիս դրած, շալակած տարա պարկը: Վշագործ մեշոկ էր: Փողոցում: Մեշոկի բերանը երկու ձեռքով բռնած: Ծանրությունից՝ մի փոքր առաջ հակված: Սալահատակի վրա՝ մարդ: Ողջ: Մեռած: Ողջ: Չգիտեմ: Առաջ անցա: Հեռացա: Իր պրորբեմն է: Ինչո՞ւ հեռացա: Մեշոկը շուկա պիտի տանեի: Լեյլան: Մական: Դարեջանը: Հացի փող: Անցա: Հեռացա: Մնաց: Ողջ: Մեռած: Չգիտեմ: Գուցե այսօր էլ ստիպված լինեմ քարշ տալ: Նախկինների հասարակության մեջ ցույցեր հաճախ են լինում: Պոռնիկի բարդույթ: Անզուսպ ցանկություն՝ բացատրել, թե ինչն է մղել պոռնկության: Խռպոտ խոսափողներից գոռում են՝ դու է՛ս էիր: Դու է՛ս ունեիր: Խռպոտ խոսափողներից քեզ դասեր են տալիս՝ դու էսպիսին պիտի լինես: Դու է՛սպիսին պիտի լինես: Ինչպիսի՞ն պիտի լինել: Նրանց էլեկտրատի՝ ընտրազանգվածի մի մասը: Այս է ու այս: Սկզբից հիշեցնում են: Հետո՝ պահանջում:

Ձանգվածների վրա ներգործության ամենալավ միջոցը մասսայի կոլեկտիվ մտածողությունն է: Ունեի: Կայի: Կայի: Ունեի: Այս հասարակությունը նախկինների հասարակություն է: Ես այս հասարակության արժանավոր անդամն եմ: Առաջ գրում էի: Հետո դարձա մանր մաքսանենգ: Նախկին գրող՝ նախկինների հասարակության մեջ: Ես էլ՝ նրանց նման: Տաքսու վարորդը նախկին շինարար է: Շինարարական ֆիրմայի տերը՝ նախկին բժիշկ: Կարգին տղեն «կալկոլյատոր» է ձեռք բերել: Մարզիկը քաղաքագետ դառնալ է երազում: Գեղջուկը վաճառական է դարձել: Կայսրությունը փլուզվել է: Մարդիկ հիշում են: Բերանն արնոտ այս կայսրության մեջ ես է՛ն էի, ես է՛ն էի: Այն սուտ ու խաբեության մեջ ես է՛ն ունեի, ես է՛ն ունեի: Մարդկանց չեն էլ մեղադրում: Հիմա անցել են այլ ձևի ստի ու խաբեության: Ու հա՛ մի գլուխ հիշում են: Վախոն: Վախոն կարծում էր, թե այս երկիրն ու քաղաքը իրենն է: Վախոն երևի զանգի ինձ: Ես ու Վախոն: Ես ու Վախոն՝ մանկության ընկերներ: Կանք: Կտրվեց: Մտածելու կարիք չկա՝ կանք: Մտքից ինքնըստիսըյան հասկանալի է, որ ես ու Վախոն

մանկության ընկերներ ենք: Մի մտքին հաջորդում է մյուսը: Միտքը սեղմում է բառերը: Չէ՛, կլանում է: Անսպասելի լեզու առած համրի նման: Գրել: Գրող: Գրողը պիտի գրի: Կլմբոզ, մեծահարուստ մաքսանենգի հուսալի վահանի ու խոշոր փողերի հետ միասին նա պիտի ունենա նաև գջլող-փախցնողի ջիղ: Որպես մանր մաքսանենգ՝ կարողանա երկուպարիանոցներ բաժանել պարապ-սարապ կանգնած բլուկոստերում: Պարտությամբ ավարտված պատերազմից հետո Վախոն վաճառեց իր ավտոմատը և տոնավաճառում՝ «բազրոբայում» վաճառասեղան վարձեց: Վախոյի համար Աբխազիայի պատերազմն առաջին պատերազմը չէր: Մինչ այդ Ցխինվալին էր: Հետո՝ Թբիլիսիի պատերազմը: Եվ ապա միայն՝ Աբխազիան: Վախոն երրորդից հետո վաճառեց ավտոմատը: Վե՛րջ՝ ասաց Վախոն, ես իմ կովեթիքն արդեն կովեցի: Ինչպես երևում է՝ վատ ռազմիկ եմ, հիմա տեսնենք ինչպիսի վաճառական կլինեմ: Ինձ էլ առաջարկեց: Մերժեցի: Ինչո՞ւ՝ չգիտեմ: Հեռուստացույցից պոկ չէի գալիս: Դրանից հետո Վախոն ձեռք քաշեց վաճառասեղանից և անցավ Թուրքիայից

զովացուցիչ ըմպելիքներ ու գարեջուր ներկրելու գործին: Ինձ էլ առաջարկեց: Այդ ժամանակ էլ մերժեցի: Քեզ էդ հեռուստացույցը խելքից կհանի՝ ասաց Վախոն: Ես էլ հենց էդ եմ ուզում պատասխանեցի: Ժամանակ առ ժամանակ նա օգնում էր ինձ: Վախոն փողն այնպես էր տալիս, որ հանկարծ Քեթինոն չնկատի: Այնպես էր հարմարեցնում, որ մենակ լինեմ: Փողը դնում էր գրպանս: Ու... Շունչ էր քաշում: Խո՛րը, խո՛րը: Ասես սիրտը միջից դուրս գար: Վախոն օդի խիստ կարիք ունի: Դա նրան նեղում է: Երբ զգացնունքը հաղթում է Վախոյին, նրա սիրտն ավելի շատ է օդի կարիք զգում: Սիրտ: Երիկամ: Երիկամ տալը հեշտ է: Բայց դժվար գործ է: Չոլախ նանան: Ես ու Վախոն առաջարկում ենք մեր երիկամները: Հա՛: Չոլախ նանայի մոտ գնացի՝ միսս վաճառելու: Մաքսիմեի ընկերոջ սրճարան՝ հոգիս վաճառելու: Այս ու այն պատմությունների արանքում տասը տարի: Թե՛ տասներկու: Տասը կամ տասներկու: Մոտավորապես: Վախոն շուտ է ծանծրանում ձեռնարկած ցանկացած գործից: Ձանձրացավ նաև զովացուցիչ ըմպելիքներ ու գարեջուր ներկրելուց: Առաջարկեց վարձակալել

ավտոնորոգման արհեստանոց: Համաձայնվեցի: Վաճառեցինք Քեթինոյի մեծ դաշնամուրը: Քեթինոյի սիրտը շատ կոտրվեց, բայց հաշտվեց՝ ճար չունեք: Քեթինոն շատ էր ուզում, որ տեղիցս շարժվեմ: Շարժվեցի: Ավտոնորոգման արհեստանոց՝ ձմեռվա մառախլապատ առավոտի մեջ: Որպես աթոռներ՝ ոչ պիտանի անվաղողերը: Ցածր սեղան: Սեղանի վրա՝ մեքենայի ձեթից յուղոտված խաղաթղթեր: Դոմինո ևս: Սպիտակ: Արանքները՝ աղտից ու մազուփից սևացած: Թակոց: Բախում: Ճռոց: Ես՝ անվաղողին՝ ոտքերս ծալապատիկ: Դրսում՝ ձմեռվա խավարամած օր: Կուզես հեռուստացույցին նայիր՝ կուզես ձմեռվա խավարամած օրվան: Միառժամանակ՝ այսպես: Վախոն ասաց, որ մինչև Քեթինոյի համար դաշնամուր չգնենք, մեր փայաբաժնից ոչ մի կոպեկ չենք ստանա: Գնեցինք: Ոչինչ: Քեթինոն ուրախացավ՝ աշակերտներ կվերցնեմ: Հիմա, երբ մարդուս տնահան արեցի, - ասաց Քեթինոն, անպայման աշակերտներ կվերցնեմ: Վերցրեց: Սրանով էլ դուռը դեմս փակեց: Ջղերիս է ազդում ստեղնաշարին այս միալար թակոցը: Ես՝ խոհանոցում, աթոռի վրա:

Սենյակից լավում է Քեթինոյի ուսուցչական ծայնը՝ դե՛, սկսեցինք՝ ոի՛-գո՛-դոնի՛, ֆա-տլ-ֆա՛: Սոլ-ֆա՛: Մի՛: Դո՛: Դո՛: Սողոմուն է: Ջղերս: Ավտոնորոգման արհեստանոցի ծայնն ավելի լավն էր: Նախ՝ մի ավտոնորոգման արհեստանոց բացեցի: Մեր կողմերում: Հետո՝ մյուսը: Երրորդն էլ: Վախոն ասաց, որ շուտով թողնելու ենք ավտոնորոգման արհեստանոցն ու անցնենք մաքսանենգության: Ես ու Վախոն դարձանք մանր մաքսանենգներ: Վախոն հավատում էր, որ մի օր անպայման մեծ փող կկտրի: Փող կտրե՛: Փողը կտրեցի: Փողը կտրվեց: Որտեղի՞ց եկավ այս բառը: Հաստատվեց: Հա՛: Հաստատվեց: Ժամանակի շունչը: Ժամանակի բնավորությունը: Բառերից զգացվող ժամանակի դրսևորումը: Ես ու Վախոն՝ մեքենայի մեջ: Վախոն՝ դեկի մոտ: Ես՝ կողքին: Ձեր մե՛րը կլացացնենք, հըլը սպասե՛ք ասում է Վախոն: Մեկ է՝ մեծ փող կկտրենք: Հետո խորը շնչում է: Խոր: Խոր: Թեթևանում է հոգով: Այնպես է կռանում դեկի վրա, որ թվում է՝ ոտով-գլխով պիտի մեջը մտնի: Ոտքն ամուր պահում է գազի վրա: Հոնագույն ժիգուլին՝ Վախոյի էմոցիային հընթաց: Դիսկոլիսկում է:

Սկսում է «ոռնալ»: Վախոն գժվել է: Երբ Վախոն համառում է, նա չի էլ տեսնում է, թե իր դիմաց ինչ է կատարվում: Վթար: Մի քանի անգամ փրկվել ենք: Վախոն շատ վտանգներից է փրկվել: Վիրավորել էին: Այն ժամանակ էլ փրկվեց: Ես ու Վախոն՝ Սուխումիում: Վախոն հագել է գվարդիականի համազգեստ: Ձեռքին՝ ավտոմատ: Ոտքերին՝ կեդիներ: Տեսավ ինձ: Ավտոմատը լիցքավորեց: Ժպտում է ինձ: Հետո օդում կրակեց: Դրանց մե՛րը կլացացնենք: Հաղթելու՞ ենք: Պարտվեցի՞նք: Երկար ժամանակ նստած էի հեռուտացույցի առաջ: Ինչո՞վ էի գոյատևում: Պապիս բնակարանը: Փոքր, երկաթե պատշգամբի մոտ՝ բարձրուղե չինարի ծառ: Ձմռանն այս ծառը չեմ տեսնում: Վաղ գարնանն եմ տեսնում: Տարվա բոլոր եղանակներին էլ տեսնում եմ: Ձմեռվանից բացի: Մի բնակարան վաճառեցինք: Երկուսը ձեռք բիրեցինք: Իրար մոտիկ: Մորս՝ միսենյականոց: Ինձ, Քեթինոյին ու մեր տղային՝ երկու սենյականոց: Մի քիչ էլ գումար մնաց: Ես ուզում էի, որ բոլորս միասին ապրենք: Բայց մայրս քարը փեշից չզցեց՝ համառեց: Հանգիստ թողեք ինձ՝ ասաց մայրս, շատ եմ

խնդրում, թողեք օր ծերության հանգստանամ: Մայրս, իհարկե, այդպես չի մտածում: Բայց մորս չես կուտրի: Համառ է մայրս: Ես՝ հոգնամ: Քեթինոն էլ այս ընթացքում մի տեսակ փոխվել է: Ասես իր որջից ամեն ինչի նայելիս լինի: Հետաքրքրասերի նման: Ես չեմ սիրում այսպիսի Քեթինո: Թեև այսպիսի Քեթինո երևի Քեթինոն էլ չի սիրում: Երևում է՝ նա մայր մեղվություն էր ուզում: Ցանկացած կնոջ ուզած էլ վերջին հաշվով սա է: Մեկին հաջողվում է, մյուսին՝ ոչ: Սակայն բոլորի ուզածն էլ սա է: Մայրս հասկացավ Քեթինոյի միտքը: Մայրս ամեն ինչ բարոյեց մեզ վրա: Իբրև թե մենք ենք իրեն հոգնեցրել ու հիմա մեզնից հանգստանալ է ուզում: Ես ամեն ինչ պարզ տեսնում եմ: Սակայն իմ առավոտը հոգնած է սկսվում: Երևի դրա համար էլ դարձա մանր մաքսանենգ: Վախոն՝ ղեկի մոտ, ես՝ կողքին: Երթուղային տաքսու գիծ ձեռք բերել: Վախոյի երազանքն է: Հապա՛, հապա՛՝ համաձայնվում եմ ես: Ձեռք կբերենք: Նման դեպքերում ես պիտի զլուխս թափահարեմ՝ ի նշան համաձայնության և դրանով Վախոյի թիկունքին կանգնեմ: Վախոյին աջակցել է պետք:

Հա դե՛, ես էլ աջակցում եմ: Երկուլարիանոցներ խնայեցինք դեռևս Թրիլիսիում: Ձեռքի պայուսակները և վշագործ մեծ մեշկերը դրեցինք բեռնախցի մեջ: Շարժվեցինք դեպի Էրզնեթի: Էրզնեթիի տոնավաճառում կգնենք ռուսական արտադրության հնդկացորեն: Բլոկներով սիգարետ: Մակարոն: Շաքար: Շոգեխաշած միս՝ «տուշոնկա»: Պայուսակներն ու մեշկերը կլցնենք ապրանքով: Կտեղավորենք բեռնախցում: Կվերադառնանք Թրիլիսի: Պարապ-սարապ կանգնած բլոկպոստերի մոտ կբաժանենք երկուլարիանոցները: Ապրանքը կբաժանենք Կոլտնտեսային շուկայի մոտերքում տեղակաված կրպակների միջև ու շահույթը համապատասխանաբար կկիսենք: Երեք միանման կրպակ: Միևնույն ապրանքը՝ տարբեր թարեքների վրա: Լեյլան: Մական: Դարեջանը: Դարեջանի չաղ թշերի վրա՝ տեղ-տեղ մազմզուկներ: Մական հիվանդագին նիհար է: Նա շատ անկախ է: Եվ շատ է տառապում սեփական անկախությունից: Լեյլան մաքուր, կոկիկ ու չափազանց հաստ կին է: Իսկական կաթի մեջ թաթախած բլիթ: Փնթփնթան: Շատախոս: Առույգ: Իբրև թե

բարեհոգի: Սակայն բացահայտ ինչ-որ բան  
 ակնկալող, քանզի չափազանց գործնական է:  
 Լեյլան շատ է կոտրատվում Վախոյի մոտ: Վա-  
 խոն գիտի, որ Լեյլան անքանի մեկն է, դատար-  
 կապորտ և իրենից օգուտ է ակնկալում: Դրա  
 համար էլ քաշվում է: Թեև ո՛վ իմանա, գուցե ինձ  
 է այդպես թվում: Չէ՛: Չի թվում: Եթե ինչ-որ բան  
 լիներ, Վախոն զգացնել կտար: Թրիլիսիից էրգ-  
 նեթի կամ էրզնեթիից Թրիլիսի ճանապարհին:  
 Վախոն շուռ կգար իմ կողմ: Լեյլայի մասին խոսք  
 կզգեր: Իմ հարցին կսպասեր՝ բան-ման հո չկա՞,  
 ա՛յ տղա: Ոչինչ չէր պատասխանի, բայց ոտքը  
 կպահեր գազին: Դրանով էլ ամեն ինչ կասեր:  
 Անձանոթ կին: Նորության սպասման մեջ բա-  
 բախող սիրտ: Կարոտեցի: Հեռվում մնաց: Քե-  
 թինոն: Իմը: Ծանոթ մարմին: Ես և Քեթինոն՝  
 ձմեռվա գիշերում: Քեթինոն մեր տղային քնեց-  
 րեց: Քեթինոն կոկա-կոլայի դատարկ շշի մեջ  
 տաք ջուր է լցնում: Պլաստմասե շիշը կծկվում է:  
 Մեջքն ասես կոտրտվում է: Չարչարանքի ծայ-  
 ներ է հանում: Քեթինոն խփով փակում է շիշը:  
 Շուռ է տալիս: Ստուգում է: Հետո մոտեցնում է  
 դռշին ու հետևում ինձ: Քեթինոյի ծանոթ

մարմինը, որ ձմեռները մոռանում եմ: Ջանում եմ  
 հիշել: Ծանրաթանձր շապիկը պոկեմ վրայից ու  
 հիշեմ: Քեթինոյի շշուկը՝ սպասիր, ցո՛ւրտ է: Ան-  
 հարմար վերմակի մեջ մինչև դունչը խրված Քե-  
 թինոն: Ձեռքերս սահում են վերմակի տակ ու  
 փորձում հիշել Քեթինոյի մարմինը: Վերմակը  
 ներսից կոկա-կոլայի տաք շշով է շաղոտվել և  
 ավելի անհարմար դարձել: Քեթինոն իր մար-  
 մինն ինձ է ընձեռում մինչև պորտը: Իմ ազդրը՝  
 Քեթինոյի մերկ ազդրերի վրա: Տաքություն՝ ցր-  
 տի մեջ: Տաքություն՝ մինչև պորտ Քեթինոյի ըն-  
 ձեռած մերկությունից: Միաձուլումի սպասումից:  
 Հեռավոր «դվիժոկների» դղրդացող մերձոպոյու-  
 նից: Ջերմություն՝ ցանկությունից: Վերմակն՝ իմ  
 մեջքին: Քեթինոյի ջերմությունը: Քեթինոյի  
 մշուշվող աչքերը: Այնուամենայնիվ, ձեռքը վեր-  
 մակին՝ կողքից հանկարծ չփչի՛: Հիմա՛ հա՛: Հա՛:  
 Հա՛: Հա՛: Հա՛: Միառժամանակ՝ այսպես: Սեփա-  
 կան մարմնի զգացողությունը հասունանում է:  
 Հա՛: Հա՛: Մի քիչ էլ, ու մոտ է ավարտը՝ հեքը  
 հանգստացնող: Հա՛: Հասուն է: Քաղվեց: Պրծավ:  
 Ձմեռվա գիշերի մեջ ընկղմված մեր սենյակը: Ես  
 ու Քեթինոն միասին միմյանց վերադարձրինք

սեփական մարմինների զգացողությունը: Քեթինոն՝ իր շապիկի մեջ: Քեթինոն՝ հանց ուրվական, դեպի լոգարան: Ես՝ գիշերվա դղրդացող լուծության մեջ: Սպասում՝ դղրդացող լուծության մեջ: Ոչնչի սպասում: Քեթինոն արագ-արագ՝ դեպի անկողին: Քեթինոն՝ մինչև դունչ վերմակի մեջ խրված: Ո՛ւո՛ւո՛ւ: Ի՛նչ ցո՛ւրտ է: Առանձին է: Պարտքը հատուցածի պես՝ անկախ: Նա է: Ես է: Չմեռվա ցուրտ գիշերներին, այսուայստեղ դղրդացող «դվիժովների» աղմուկի մեջ, ես ու Քեթինոն հատուցում ենք մարդուկսիկության մեր պարտքը: Չէ՛: Չմռան ցուրտ գիշերներին ինձ ու Քեթինոյին անհանգստացնում է սիրո պարտքը: Եթե այդ գիշեր չենք սիրում իրար, ապա անսեր անցած գիշերն է մեզ նեղում: Եթե սիրում ենք, ապա նեղում է այն, որ պարտքից ելնելով ենք իրար սիրում: Գուցե այս պատճառով էլ հորինել ենք այս խաղը: Ոչ: Կանչել ենք: Չէ՛: Օգնության ենք կանչել: Երևելի անհատականություններ՝ մ-ով սկսվող: Մոպասան՝ ասում եմ ես: Մոցարտ՝ ասում է Քեթինոն: Միքելանջելո: Մերիմե: Մարկես: Մոդիլիանի: Միկոյան: Միկոյանն ի՛նչ կապ ունի: Ո՛վ է ընդհանրապես

Միկոյանը: Միկոյանին չգիտե՛ս: Էդ հե՛ջ: Ոչ թե հեջ, այլ՝ մե՛ջ: Միկոյանը: Ծիծաղում ենք: Համաձայնվում: Կամ՝ նա է ինձ զիջում: Կամ ես եմ նրան զիջում: Մոլիեր: Մարադոնա: Միլեր: Մոնրո: Մաստրոյանի: Մազինա: Մատիս: Մանե: Մոնե: Երբ մեզանից մեկը հիշում է Մանեին, մյուսն անպայման ասում է՝ Մոնե: Որովհետև հնարավոր չէ, որ Մանեն չհիշեցնի Մոնեին: Քեթինոյի ծայնն ինձ հանգստացնում է: Հանգստացնում է նաև այն, որ ինչ-որ տեղ, ինչ-որ մեկն իր հետքն է թողել և հիմա իրեն հիշեցնում է կեցության անհարմար վերմակի մեջ փաթաթված մարդ ու կնկան: Կոպերս ծանրանում են: Սկսում եմ քնել: Արդեն քանի անգամ տեսնում եմ նույն երազը: Վիթխարի կենդանու ողնաշարին թառել է մի փոքրիկ, կարմրադոշիկ ծիտիկ: Ոչ էլ հասկանում եմ՝ ինչ կենդանի է: Երևի՛ ռնգեղջյուր: Կամ՝ դի՛նոզավրի մի տեսակ: Բաց-կանաչավուն մաշկ ունի, որը տեղ-տեղ պլոկված է, և այնտեղից սպիտակ, փափուկ միս է երևում: Ոչ ամեն տեղից: Փորից է կախված միսը: Ուղքերի մոտ է: Գլխին, դեմքին էլ: Կունքերին էլ, ողնաշարին էլ: Ոչինչ չի մնացել: Մարմնի հետ համեմատած

89717

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
 ԷԾՄԵԿԻԹՎՐ ՍԵՐՍՍՏԱՑԻՉ  
 Կրթական Համալիր  
 ԱՐԵՎԱՆԻ ԳՐԱԴԱՐԱՆ

ծիտիկը շատ երկար, սուր, կեռվող կտուց ունի: Նստել է անմիս, վիթխարի կենդանու ողնաշարին, տեղից չի շարժվում, սակայն ժամանակ առ ժամանակ գլուխն է թափահարում: Ջարմանայի է, վիթխարի կենդանու լեշի վրա նստած փոքրիկ, շատ աշխույժ, կարմրադոշ ծիտիկ: Ջարմանայի և ծանծրայի, քանզի անվերձանելի է: Անհասկանալի: Մի տեսակ համառությամբ լուսավորվող ասես անդունդի խորքից: Երևի նաև տեսիլք է, որ ճակատագրի դաժան բերումով հետևում ու հիշեցնում է ինձ: Աղբակոյտում էլ եմ տեսել այս տեսիլքը: Տեսիլք, թե՞ երագ: Մորս մոտ էլ եմ ունեցել: Հա՛: Ունեցել եմ: Մայրս: Մայրս երեկ մեզ մոտ էր: Տղայիս համար ականջաբարձ էր կարել: Առանձնացան: Տղաս կանչեց ինձ.— Տե՛ս, տատին ինչ է կարել ինձ համար: Մորս՝ աղերից կոկված ձեռքերով կարած ականջաբարձը: Տղայիս ջերմող աչքերում ուրախության կայծ է պեծկլտում: Հիվանդ է: Կամ նրանից է ինձ անցել գրիպը: Կամ ես եմ նրան վարակել: Քեթի-նոն ու տղաս հիմա կողք կողքի են քսած: Պահարան: Պահարանում թաշկինակ: Պիտի վերցնեն: Զգույշ կմտնեն: Թաշկինակ պիտի

վերցնեն: Մատներիս արանքում սիգարետ: Արդեն՝ երկրորդը: Ե՛րբ եմ վերցրել երկրորդը: Չեմ հիշում: Սիգարետը սովորություն է: Սովորությունն ամենաանտեսանելին է: Մոխրամանում՝ ֆիլտր: Կայծը ֆիլտրից կրակ առավ ու հանգավ: Մկանները շարժման մեջ: Մկաններում՝ ցավագին տկարություն: Մրսում եմ: Կհիվանդանամ: Գրիպ: Խոհանոցի դուռ: Նեղ միջանցք: Հինգ քայլ: Վեցերորդը՝ ոչ լրիվ: Սառը մատներով՝ երկաթի սառնությանը: Դուռը՝ ճոռալով: Սո՛ւս: Կամաց: Իջեցրած վարագույրներով սենյակի մուժ: Աչքերս եմ ընտելացնում: Ընտելացում: Քեթինոն ու տղաս միևնույն անվրդով հայացքներն ունեն դենքերին: Ականջաբարձի վրա տղայիս փոքրիկ ձեռքն է: Հեռավոր հիշողություն: Լուռ թախիժ: Թախիժ՝ վարագուրածածկ սենյակի մուժում: Պահարան: Դուռ: Ճոռոցով: Սո՛ւս: Կամաց: Քեթինոն ու տղաս միևնույն խաղաղ հայացքներն ունեն: Պահարանի վերին թարեքին՝ թաշկինակ: Երկուսն եմ վերցնում: Չոր: Առողջ: Սո՛ւս: Կամաց: Գրպանում: Դուռը բաց մնա: Սենյակից՝ ոտնաթաթերի վրա՝ երկաթի սառնությունը մատներիս: Զգուշորեն՝ բռնակին: Նեղ միջանցքում:

Երկու քայլ: Գրպանից՝ թաշկինակ: Ոսկոր: Ցավ: Խոհանոցի կողմ: Թաշկինակ՝ քթի մոտ: Ինձ լքող գրիպի բացիլ: Քթոսկրի ցավ: Շունչս բացվում է: Թաշկինակը՝ գրպանում: Սառնարան: Սառնարանում Էնվերի օղին: Օղին ու սխտորը գրիպի դեղ են: Ո՛վ է մոզոնեյ: Երևի մի հարբեցող լոթի: Միննույն է: Սառնարանի մոտ: Սառնարանի դուռը: Երկու մատով՝ 22ի պարանոցից: Հայացքս՝ 22ին: Կեսից ավելի: «Տուշունկա»: Ունեմ: Լոյս չկա: Ոչ էլ՝ գագ: Սխտոր: Խոհանոցում պիտի որ լինի: Խոհանոցի դուռը: Խոհանոցում: Սեղանին՝ շիշ: Դարակ: Սխտոր: Հողերիս մեջ հոգնածություն: Այսօրվա առավոտը պիտի-ով է սկսվել: Հացը հին է: Հացի փող: Լեյլան: Մական: Դարեջանը: Մեշոկն՝ իմ շալակին: Հոգնածություն: Հեովից առաջ շարժվող: Ինձ մոտ կանգ առավ: 2Է՛: Ես ու հոգնածությունս միասին ենք ճանապարհորդել: Հիմա խոհանոցում ենք: Սխտոր ենք կծպում: Մաքրած սխտորի պճեղները հեռացնում ենք իրարից: Կճեպը թափում ենք աղբամանի մեջ: Դրսում ցուրտ է: Չմեռ է: Իմ պատուհանից կամուրջ է բացվում: Մերկ ծառեր: Հալչող ծյունից թաց սալարկուղի, որի վրայով ժամանակ առ

ժամանակ մեքենաներ են սուրում: Սխտորի ծանր հոտ: Սխտորի և օղու: Դիրուլ կզնեմ: Դիրուլ: Ջով անանուխ: Քեթինոն: Ամուսինն առավոտից խմում է: Խոհանոց մտած կնոջ դեմքի արտահայտությունը: Ոչ: Գլխիս կանգնած: Երբ առավոտն այսպես է սկսվում, ուրեմն ինչ-որ բան կարգին չէ: Անհուսություն: Նրա մոտ էլ: Ինձ մոտ էլ: Երեխան ամաչում է դպրոց գնալ: Ինչո՞ւ է ամաչում: Դպրոցի ֆունդի համար փող են հավաքում: Չգտում են ինչ-որ ծիծաղելի բան հիշել: Դեպք: Անեկդոտ: Պատում: Միննույն է: Ցավով են ծգտում: Հիշում են: Պատմում են: Չի ծիծաղում: Ջղայնանում են: Քեթինոյի անդրդվելի անտարբերությունը գրգռում է ինձ: Չի հասկանում: Չի հասկանում: Չի հասկանում: Ծիծաղը, որով պատմեցի այդ պատմությունը, հիմա շատ կեղծ և թույլ է թվում: Անհարմար են զգում, ավելի են ջղայնանում: Նման պահերին ես ու Քեթինոն վիճում ենք: Մեր լարված դեմքերը: Մեզնից արտաբերվող բառերը: Տղայիս աչքերում՝ վախ: Մթափեցնում է: Քաշվում են: Մի քանի անգամ չկարողացա ինձ զսպել: Նոր տարվա պատրաստություն: Քեթինոն արհեստական եղևնի է

գարդարում: Քեթինոն շատ հին խաղալիքներ ունի: Երևի հատկապես սիրելի իրեն: Ես և Քեթինոն ամեն տարի երկու կամ երեք նոր խաղալիք ենք ավելացնում հին խաղալիքներին, որպեսզի մեր տղան ուրախանա նորույթի զգացողությամբ: Քեթինոն այսօր ծախ ոտքի վրա է զարթնել: Կռիվ է ման գալիս: Զգում եմ: Կռիվ է ուզում, որովհետև սառնարանը դատարկ է: Ես գիտեմ, որ ինչ-որ բան, այնուամենայնիվ, կհաջողեցնեմ: Պարտքով թե պարտամուրհակով, սակայն Նոր տարվան էլի մի փոքրիկ սեղան գցում եմ: Թեև Քեթինոն ալեկոծվում է և դրա համար կռիվ է ուզում: Չկարողացա պոկվել, խոյս տալ: Ինչ-որ բան գամեց ինձ բազկաթոռին: Գուցե այն ցանկությունը, որ ձմեռվանից մի օր գոնե պոկեմ: Հա՛: Երբ իմ բնակարանում տոնածառ է գարդարվում, և իմ տղան ուրախանում է, ինձ թվում է, թե ձմեռվանից իրոր մի օր պոկեցի: Քեթինոյի կողմից մի բանի ռեպլիկ: Ինչի՞ն վրա ուրախանամ: Կամ գալիս է, որ ի՞նչ անի: Կամ երեխային է կանոն անանց պատճառի: Զղայնությունը կոկորդի մոտ է սեղմվում: Զսպում եմ ինձ: Ոչինչ չեմ ասում: Դրա համար էլ կռիվ

ավելի է ուզում: Տղայիս ձեռքից մի խաղալիք պլստում, ընկնում է: Խաղալիքը ռումբի պես՝ հատակին: Քեթինոն խփում է տղային: Մի քանի անգամ: Վերևից ներքև: Պստիկ գլխին: Վերևից ներքև: Ոգևորված: Պստիկ գլխին: Մինչև երկրորդ անգամ կխփի, Քեթինոն իմ կողմ է նայում: Մարտահրավերի է նման: Չարադեմ: Շրթունքները չարախնդորեն իրար սեղմած: Ես՝ Քեթինոյին մոտիկ: Չեռքս՝ շրջակա՝ երեսին: Քեթինոն՝ հատակին: Ծեծում եմ: Ոտքով: Ծեծում եմ: Չեմ հիշում՝ որքան ժամանակ: Տղայիս ծայնը սթափեցնում է: Չայն չէ: Հոգու ճիչ է: Հոգու ճիչի մեջ հատ առ հատ ասված՝ կը-մեռ-նեմ: Ես... հի... մա... կը-մեռ... նեմ: Մի ձեռքով շալվարիցս է քաշում, մյուսով՝ խփում: Շունչը կտրվում է, երբ հատ-հատ ասում է՝ կմեռնեմ: Ես հիմա կմեռնեմ: Դռան մոտ եմ: Դուռը շրխկոցով: Ինձ սթափեցնում են տղայիս հոգու ճիչն և նրա արտաբերած բառերը: Ծանր է: Հոգուս իջած ծանրություն: Սիրտս ծանրացել է: Մարմինը հոգու ծանրությունից կծկվում է: Վախոն: Վախոյի մոտ օղի եմ խմում: Չեմ հարբում: Քանզի հոգիս ծանրացած է: Վախոն հարբում է: Երբ Վախոն

հարբում է, աչքերը կարմրում են: Ուրոզվ հրեց  
աթոռը: Հեռախոսով է զանգում: Ո՞ւմ է զանգում:  
Երկվորյակ քույրերին: Ո՞ր երկվորյակ քույրերին:  
Մայան ու Մանանան: Վախոն ասում է, որ երկ-  
վորյակներն իրեն ապառիկով են տրվում: Ո՛չ  
Վախոն ասում է, որ երկվորյակները «պուլեզե»  
են տալիս: Հա՛: Վախոն է այսպես ասում «պու-  
լեզե»: Ես ասում եմ, որ բոզերի հավես չունեմ:  
Վախոն, այնուամենայնիվ, զանգում է: Չեն պա-  
տասխանում, բայց՝ այնուամենայնիվ: Էս դուք  
որտե՞ղ եք, այ՛ բոզեր: Որտե՞ղ եք, տո՛ քածեր:  
Ասում է Վախոն և անընդմեջ հավաքում համա-  
րը: Ես Վախոյի վրա ուշադրություն չեմ դարձ-  
նում: Մտածում եմ տղայիս ու Քեթինոյի մասին:  
Մտածում եմ՝ չեմ մոռանա տղայիս խոսքերը:  
Մտածում եմ Քեթինոյի մասին: Կատաղած եմ:  
Մտածում եմ՝ նաև այն մասին, որ ընչազրկություն-  
ը մեզ ծեծեց: Երեքիս էլ: Հա՛: Երեքիս էլ: Ըն-  
չազրկությունից ծեծված: Քեթինոն՝ տղայիս: Ես՝  
Քեթինոյին: Տղաս՝ ինձ: Ամենքիս կպավ ամեն-  
քիս ձեռքը: Օջախ: Միկրոաշխարհ: Քաոս՝ միկ-  
րոաշխարհում: Երկրաշարժ: Հորձանք: Սև ցավ:  
Ընչազուրկի առօրյա, որն այսպիսի անողորմ

նպատականդվածությամբ մարդկանց մեջ հու-  
սահատություն է ամբարում: Հուսահատությունը  
չարացնում է: Հուսահատությունը մի օր պայ-  
թում է ռումբի պես: Պայթում է: Ցրվեց: Փշուր-  
փշուր՝ պաշարեց ողջ տունը: Վառողի հոտի  
նման սուր: Անկեղծ երեխայի կողմից ասված  
ստի նման այրող: Ընչազրկությունն ամոթի պես  
այրող է: Հա՛: Այրող է: Ամոթի նման: Վախոն, այ-  
նուամենայնիվ, հասավ իր նպատակին: Վախոն  
հիմա սթափի նման է խոսում: Եկեք՝ ասում է  
Վախոն: Երկուսդ էլ եկեք: Հետո լսում է: Խնդ-  
րե՞մ,- հարցնում է,- լսիր,- ասում է հետո,- դու  
Մայա՞ն ես, թե՞ Մանանան: Մայա՛, խնդրե՞մ,-  
հարցնում է Վախոն ու դնում ընկալուչը: Վախոն  
նորից հարբում է: Քածե՛ր,- ասում է Վախոն,-  
հինգ դոլարանոց քածեր: Թուրքին հինգ դոլա-  
րով են տալիս, ինձ խնդրել են տալիս էս քածերը:  
Հինգդոլարանոց քածերը խնդրել են տալիս ինձ:  
Վախոն արդեն կատաղում է: Այսպիսին է: Մինչև  
հետները չկովի, սիրտը չի կպնի: Ոչ էլ մի կար-  
գին դուր գալու բաներ են: Գեր, չաչանակ դախ-  
պեք: Երկուսն էլ ճիշտ միանման: Դեղին ներկած  
մազեր: Էժանագին օծանելիքի հոտ: Նաև

անվայության հոտ, որը կարագի հոտ է հիշեցնում: Շաղակրատանք: Անվերջանալի: Ուղղակի շաղակրատանք: Շաղակրատանք՝ շաղակրատանքի համար: Դու մի ասա՝ էքստրասենսի շնորհով էլ են օժտված: Իրենք են այսպես ասում: Հա՛ էքստրասենսային շնորհով օժտված: Մեկն էլ, մյուսն էլ: Սուրճի վրա գուշակություն էլ գիտեն: Երկուսն էլ երազում տեսել են իրենց մեռած հորաքրոջը: Նա է ասել, որ գուշակեն: Ու հիմա երկուսն էլ գուշակությամբ են զբաղվում: Հետն էլ հավատացյալ են: Իրենք են այսպես ասում: Այն էլ՝ խորը հավատացյալ: Հետն էլ հայրենասերներ են՝ «պատրիոտներ»: Ազգային շարժման զարթոնքի շրջանում այստեղ էին անընդհատ ֆոֆոում կառավարական շենքի առաջ բացված վրանների մոտ: Մեկը մյուսին խոսելու մաջալ չեն տալիս, հա մի գլուխ իրար հաստատում են: Էսպես չէ՛ր, Մայա: Էսպես չէ՛ր, Մանանա: Հա՛, Մայա: Հա՛, Մանանա: Ու գնաց: Ո՛ր գնաց: Մարմնին կիպ կպած կարճ շրջազգեստում տեղավորված հաստ հետույքն օրորելով՝ խոհանոց: Ո՛ր մեկը գնաց: Չգիտեն: Միևնույնն է: Շատ տնավարի են պահում իրենց: Աղչի՛, Մանանա:

Աղչի՛, Մայա: Եվրոպական սեքս չեն ընդունում: Ի՛նչ է՛նշանակում եվրոպական սեքս: Մի՞թե չգիտի: Ծիծաղ: Ծիծաղում են: Ինչո՞ւ են ծիծաղում: Չգիտեն: Միևնույնն է: Ի՛նչ է՛նշանակում ու... Միևնույն է՛նշանակում: Հասկանալի՞ է՛ ի՛նչ է՛նշանակում: Այո՛: Հասկանալի է: Հա՛ դե, չեն ընդունում: Հարբած: Ես՝ հարբած: Նրանց բարձրաձայն խոսակցությունը: Իրար հերթ չեն տալիս: Բջջային են ուզում ձեռք բերել: Մեկը հո ունեն, բայց հիմա ուզում են է՛ն տեսակից էլ ունենալ, որը շատ նորաժ է: Սեղանին՝ երշիկ: Օղու շիջ: Էլի ինչ-որ բան: Բաներ: Սրանց բլբլոցը: Անվայության հոտը նման է կարագի հոտի: Մոռացության ցանկություն: Հա՛: Մոռացության: Միևնույն է՛ ինչո՞վ, ինչպե՞ս, ի՛նչ միջոցով, բայց՝ մոռացության: Իմ ձեռքը՝ մեկի հետույքին: Որի՛: Որը որ նստեց իմ աջ կողմում: Ծիծաղում է: Ինչո՞ւ է ծիծաղում: Դրա համար հո չեն եկել: Ուղղակի հարզում են Վախոյին: Ի՛նչ է՛նշանակում դրա համար: Ծիծաղ: Իբր չգիտի ի՛նչ է՛նշանակում: Հա՛: Երեխա է: Դեռ ոչինչ չգիտի: Ծիծաղ: Ծիծաղում են: Ինչո՞ւ են ծիծաղում: Չգիտեն: Միևնույնն է: Իմ ձեռքը դրանցից մեկի ձեռքին է կպնում: Ո՛ր

մեկի ձեռքին: Որն ինձնից աջ է նստած: Ձեռքով իմ ձեռքն է բռնում: Կորավուն դեմք, դեղին ներկած մազեր: Վախոն գովում է աղջիկներին: Ինչո՞ւ է գովում: Որովհետև եկան, իսկ եթե եկել են, ուրեմն լավն են: Վախոն մեկի գլուխն է պաչում: Մյուսի թուշն է պաչում: Որի՞ թուշը: Որն ինձնից աջ է նստած: Մտովի առաջին են ասում: Ինչո՞ւ: Չեն հիշում: Հա՛: Առաջինը՝ ինձնից աջ: Երկրորդն ինձնից ձախ է նստած: Իմ դիմաց՝ Վախոն: Վախոն հարցնում է՝ ո՞վ էր հեռախոսով խոսողը: Նա՛ առաջինը: Օղին ու երշիկը՝ ապառիկ, աղջիկները՝ «պուլեզե»,— ասում է Վախոն: Բան-ման չխառնի: Ինչո՞ւ պիտի խառնի: Որովհետև այսօր ուրբաթ է: Ո՞վ է պատասխանում: Առաջինը: Հա՛, որն ինձնից աջ է նստած: Վախոն կարծես դրան էր սպասում: Մի րոպեով էն կողմ գնանք՝ ասում է առաջինին: Ինչո՞ւ պետք է էն կողմ գնանք: Ուրեմն հենց էստեղ էլ տուր, հենց էստեղ, սեղանի մոտ: Թե կուզես, սեղանի վրա:— Կարող ե՞ս, — ասում է առաջինը: Ծիծաղում են: Ծիծաղում են: Ինչո՞ւ: Չգիտեն: Միևնույնն է: Խմում ենք: Շիշը դատարկ է: Գերը, կոշիկները տկտկացնելով, գնում է խոհանոց: Այստեղից՝ օղու շշերը

ձեռքին: Ո՞րը: Երկրորդը: Նստում է: Խմում ենք: Ծիծաղում են: Իմ ձեռքը հպվում է մյուսի ձեռքին: Ձեռքով ձեռքս է բռնում: Կորավուն դեմք: Դեղին ներկած մազեր: Հետո կանգնում են: Գնանք՝ ասում են նրան: Որի՞ն: Երևում է՝ առաջինին: Ինչո՞ւ: Որովհետև Վախոն ասում է՝ էս մյուսն այստեղ մնա: Ինչո՞ւ մնա այստեղ: Հեռախոսով սա էր խոսում: Որովհետև: Ի՞նչ նշանակություն ունի: Միևնույնն է: Գնանք՝ ասում են երկրորդին: Վրա է պրծնում կոկա-կոլայի շշին: Բերում է: Գալիս է: Ես ու երկրորդը՝ սենյակում: Ինչո՞ւ ուշադրություն չէի դարձնում սեղանի մոտ: Ինչպե՞ս չէի դարձնում: Կարծում է, թե քրոջն ավելի են հավանել: Բայց ի՞նչ նշանակություն: Մեկ է՝ լրիվ միանման են: Չէ՛: Նույնը չեն: Լրիվ տարբեր բնավորություններ ունեն: Նա՛ սրա քույրը, սուսիկ-փուսիկ էն մի բանն էլ է անում: Ի՞նչ է անում: Սա արդեն չի ասի: Եվրոպական սեքսը նկատի ունի՞: Չէ՛, չի կարող ասել ինձ: Գուցե երկրորդն էլ անի: Չէ՛: Գուցե: Չէ՛: Գուցե: Չէ՛: Չէ՛: Կանի: Հիշեց, որ «ոեզինկա» չունի: Լրիվ միանման են: Հա՛: «Ռեզինկա»: Այսպես է ասում: Էն խաթրի համար էլ է անում, որ հավանել է ինձ և մի քիչ էլ՝ հարբել: Իմ

ծեռքը՝ դեղին ներկած մազերին: Նրա գլուխը միատոն շարժվում է, ժամանակ առ ժամանակ սակայն կանգ առնում: Շարժվում է: Շարժվում է: Կանգ է առնում: Կանգ է առնում: Անասնական սպասմամբ կանգ առավ: Ինձնից տարություն է ժայթքում: Ցրվում է: Ծնկներին մեջ՝ թուլություն: Դատարկ: Դատարկ: Անուժ: Կեղտ: Կեղտոտ: Անվկայության հոտը կարագի հոտի է նման: Իմ կողքին: Մոտիկ: Կողքիս: Զգայական: Ավելի կծված: Շշից կոկա-կոլա է խմում: Ես՝ մահճակալին: Աչքերս փակում եմ: Ինչո՞ւ: Ինձ թվում է, որ եթե աչքերս փակեմ, կծված կարագի հոտը կցնդի: Էժանագին օձանելիքի հոտն էլ: Մոտիկ: Կողքիս: Չի ցնդում: Հետո հարևան սենյակից լսում եմ ինչո՞ւ խնդրել տվիր, հը՞, պոռնիկի՛ մեկը: Տղլա՛շ... Տո, անա՛ռակ, թուրքին հինգ դոլարով, ինձ էլ խնդրելով ես տալիս: Տղլա՛շ... Ինչ-որ բան ընկավ: Իմ կողքին գտնվողը վազում է այն կողմ: Կծված կարագի հոտն այնուամենայնիվ մտում է: Դուռը բաց, թե չէ կջարդեմ՝ գոռում է նա: Երևի երկրորդը: Գնա՛, քու...,- ասում է Վախոն: Իսկ նա խոխոռում է: Հա՛, խոխոռում է: Ես՝ անուժ: Կեղտոտ, անուժ: Սո՛ւս, պոռնիկի մեկը:

Տղլա՛շ: Տղլա՛շ: Լոռում է: Հիմա միայն նա է աղմկում կողպած դռան մոտ: Երևի երկրորդը: Հիմա մահճակալը ճոռաց, ու նա էլ լռեց: Թուրքին հինգ դոլարով, տո քա՛ծ: Ճոճոռում է: Ինձ խնդրել ես տալի՛ս, տո՛ դախսպա՛: Ճոճոռում է: Ճոճոռում է: Ավելի հաճախ: Ավելի: Օ՛հ: Ասում է նա: Առաջինը: Առաջինը կամ երկրորդը: Ի՛նչ նշանակություն ունի: Գլխավորն այն է, որ լռություն է: Գիտեմ՝ հիմա կգնան: Կքնեմ: Կեղտոտ: Կեղտոտ: Անուժ: Գնում եմ: Քնում եմ: Աղտի զգացողություն: Առավոտյան էլ ունենում եմ: Սրտխառնոց էլ: Վախոն ուզում է խումհարից դուրս գալ: Հենց առաջին բաժակից սկսվում է սրտխառնոցը: Մորդ մոտ կտանեմ՝ ասում է Վախոն: Ես ինքս կգնամ՝ ասում եմ ես: Ո՛չ: Վախոն ինձ այս վիճակում չի թողնի: Իջնում ենք բակ: Վախոյի հնաճ ժիգուպին: Մեքենայի մեջ վշագործ մեշոկի հոտ: Մկան ծերտ: Դուրս եմ գալիս մեքենայից: Ինչ-որ մեկի ավտոտնակի մոտ թափում եմ սիրտս: Լեղուցս դուրս եկած կանաչ: Մի քիչ թեթևացա: Նորից՝ մեքենայի մեջ: Դու ողջ մայր ունես, ընտանիք ունես, դրա համար էլ զգվող ես: Հա՛ ասում եմ, գնանք մորս մոտ: Ընտանիք

պետք է կազմեն, թե չէ կզժվեն՝ ասում է Վախոն: Մայրս ինձ ոչինչ չի հարցնում: Մայրս ջուր է տա-  
քացնում: Լողանում եմ: Երկար ժամանակ: Երկար ժամանակ: Մայրս սենյակն ինձ է տրա-  
մադրում, աշակերտներին պարապելու տանում  
խոհանոց: Երկրորդ օրը մայրս գնում է: Իսկ հե-  
տո վերադառնում: Տղադ էր քեզ հարցնում, շատ  
է կարոտել,- ասում է մայրս: Տուն եմ գնում: Քե-  
թինոն ու տղաս օտարոտի են, որովհետև այն-  
պես են պահում, կարծես թե ոչինչ չի պատահել:  
Քեթինոն տղայիս ուղարկում է խաղալու հար-  
ևանի երեխայի հետ: Նախքան դուրս գալը,  
երեխան մոտենում է ինձ: Տղայիս հայացքը՝ ան-  
սպասելի հասունացած: Տղայիս պահվածքը՝ չի  
համբուրում, բայց ձեռքը քսում է ոտքիս: Ես եմ  
համբուրում: Նա միայն ոտքիս է ձեռք է տալիս ու  
գնում: Ես փորձում եմ որսալ Քեթինոյի հայաց-  
քը: Քեթինոն աչքերը փախցնում է: Իմ ինքնասի-  
րությունը խաղաղվում է, քանզի Քեթինոն  
լսում է: Աչքերը հակած: Խոսում եմ: Հաճախ եմ  
հուզմունքով հիշատակում «սեր» բառը: Իսկ ի՞նչ  
անենք, եթե իրար չենք սիրում: Եթե իրար չենք  
սիրում, երեխան ի՞նչ մեղք ունի:

Մոտավորապես այսպես: Վերջում հաշտվում  
ենք: Հաշտվելուց հետո ես ու Քեթինոն նորից սի-  
րում ենք իրար: Միշտ այսպես է եղել: Հիմա էլ  
այդպես է: Երբ մարդ վախենում է, նրա ախոր-  
ժակն ու հոյզերը սրվում են: Երբ զգում ենք, որ  
այս այլանդակ ձմռանը կարող ենք մենակ մնալ,  
մեզ անսպասելի համակում է վախը, և հոյզը  
ավելի է տիրում մեզ: Միառժամանակ այսպես է:  
Շտո՞ սովորականի պես: Մարդուկնկա ամուս-  
նական պարտք ենք կատարում: Կամ էլ հայտնի  
մարդկանց անուններ ենք հիշատակում՝ ան-ով,  
բան-ով, գան-ով, դոն-ով, էն-ով, վին-ով  
սկսվող... Քնում ենք: Արթնանում ենք: Մեկ սի-  
րում ենք իրար: Մեկ՝ չենք սիրում: Ձմեռը երկար  
է: Ձգված: Սերն էլ է դեպի իրեն ձգում ու իրարից  
զզվելն էլ: Իրար չտանելն էլ: Հիսունգրամանոց  
բաժակ: Հարյուրգրամանոց են ասում: Պապս էր  
խմում դրանով: Շշից՝ բաժակ: Մինչև վերջ: Էն-  
վերի օղին: Ճաճա: Սպիրտի նման: Սխտորի կծե-  
պը՝ աղամանում: Ձեռքս՝ բաժակին: Փողոց: Ձմեռ:  
Կամուրջ: Ծառեր: Բաժակը՝ շուրթերիս: Երկու  
մեծ կումով: Սխտորի սուր համ: Աչքերիս մեջ՝  
արցունք: Թաշկինակ՝ աչքերիս: Թաշկինակ՝ քթի

մոտ: Ոսկոր: Ցավ: Բացված շնչառություն: Թաշ-  
կինակ՝ գրպանում: Սիգարետ: Ուզում եմ: Սիգա-  
րետ: Ունեմ: Տարություն: Ոտքերիս ծայրերից  
մինչև վերև: Կրակվառիչ: Հենց առաջին կայնե-  
լուց: Սկսվեց: Հավեց: Սիգարետ: Լավն է: Ծովսը՝  
թույլ և թմրեցնող: Աչքս՝ բաժակին: Մորիցս եմ  
բերեց: Մորս մոտ վալերիանիի հոտ կար: Վալե-  
րիանին վտանգի հոտ ունի: Բժշկական սպիր-  
տից ավելի վտանգավոր: Հայրս: Իմ տղայից  
հինգ տարով ավելի մեծ կլինեի այդ դեպքում:  
Հա՛: Հինգ տարով: Դռան մոտ պագած: Մեկն իր  
ծեռքը դնում է գլխիս: Մյուսը՝ ուսիս: Ես կանգ-  
նած եմ: Նրանք հպվում են ինձ: Միևուժարու-  
թյունն ասես ճակատագիր է: Հայրս էլ միևուժար  
էր: Ես էլ միևուժար եմ: Իմ տղան էլ: Պապս միևու-  
ժար չէր: Պապս եղբայր ուներ: Պապս քաղաք  
տեղափոխվեց բնակության: Նրա եղբայրը  
մնաց գյուղում: Պուայա հորաքույրս ու հայրս հո-  
րեղբոր զավակներ էին: Հորաքույրս անուննա-  
ցել էր Օջանջիրեում: Պուայա հորաքույրս ու  
Նեստոր քիձան՝ հորաքրոջս անուսինը: Օջանջի-  
րե: «Օջանջիրա՛, Օջանջիրա՛, սամի լուջի գորոզ  
միրա՛...»: Ծովափին՝ պիոներական ճամբար:

Ռուս դեռահասների հանպատրաստից հորի-  
նած երգը՝ այս քաղաքի մասին: Քաղաքի կենտ-  
րոնում՝ Լենինի մի մատ արձանը: Էն  
ժամանակվա Սովետական Միությունում երևի  
ամենափոքրն ու ամենածիծաղելին: Կարիկա-  
տուրա էր, ինչ արձան: Օջանջիրեի երկաթու-  
ղային կայարան ոտք դնելուն պես՝ սրտի  
հաճախացած զարկեր: Կայարանամերձ փոք-  
րիկ հրապարակ: Օջանջիրե-Տղվարչելի ավտո-  
բուսներ: Երկու կամ երեք: Մեկի մոտ՝ մարդիկ:  
Սևազգեստ կանայք: Տղամարդիկ սիգարետ են  
ծխում: Հրապարակում՝ այծեր: Հրապարակի դի-  
մաց՝ դաշտում՝ ճաշարան ու մի քանի շեկ կով:  
Ճաշարանում խինկալի են սարքում, մեջը՝ լիքը  
կանաչի: Լավը չի, բայց հաճախորդներ, այնու-  
ամենայնիվ, ունեն: Հրապարակից հետո՝ երեք փո-  
ղոց: Հորաքրոջս բնակարանը կենտրոնական  
փողոցում է: Երկաթուղային կայարանի ու ծովի  
միջև: Գնում եմ: Մոտենում եմ: Սիրտս ավելի հա-  
ճախ է խփում: Հորաքույրս հարազատի հոտ  
ունի, տնեցու: Հորաքույրս գրկում է ինձ, ու փա-  
ղաքշելով ասես հովացնում իր սիրտը, հետո մի  
տեսակ սկսում է դժգոհել: Ինչպես մայրերն են

տրտնջում, երբ կարոտ են մնում զավակներին: Այդպես: ես Նեստոր բիծայի մասին եմ խոսում: Կարևոր չէ, թե ինչ: Մի ինչ-որ բան: Ասենք, թե հորաքույրս Նեստոր բիծային ինչպես բռնեցրեց բոզի մոտ: Կամ ասենք, թե այդ ժամանակ ինչպես կարդարանար Նեստոր բիծան: Կամ այնպես եմ անում, որ հորաքույրս հիշի իրենց առաջին հանդիպումը: Ինչ-որ զվարճալի բան եմ հիշել տալիս: Ինչ-որ բարի հիշելիք, որպեսզի ես ու հորաքույրս միասին ծիծաղենք: Գնում եմ: Մոտենում եմ: Արտիս խփոցն ավելի է հաճախանում: Տնից տուն եմ գնում: Նեստոր բիծան: Գեր, հաղթանդամ տղամարդ: Կիսով չափ եմ հասկանում ինչ է ասում: Խոսում է հետս ու խուզարկու աչքերով նայում ինձ: Անհարմար վիճակի մեջ եմ՝ քանզի կամ հա՛ պիտի ասեմ, կամ՝ չէ՛: Ես ոչինչ չեմ հասկանում, իսկ նա խուզարկու հայացքով նայում է ինձ ու անընդմեջ բլբլացնում: Երևի քաղաքականությունից: Այն ժամանակվա քաղաքականությունն էլ հո նշանակում էր Ստալինից խոսել: Ստալինից: Չէ՛: Էնվերից: Էնվերի անունը տվեց: «Օ՛հ»-ի է նման: Կարձ ու կտրուկ բացականչություն: Այդպես է: Էնվերը

«օհ»-ի է նման: Կարձահասակ: Աշխույժ աչքերով: Նիհար, բայց միաժամանակ՝ մկանուտ: Ասես՝ նախապես զարմացած: Կամ ծիծաղելու նախապատրաստված: Եվ կամ՝ «օհ» բացականչության: Փայտե դարպաս: Երեք հարկանի տուն: Մերոնք ապրում են առաջին հարկում: Շուշաբանդից հետո՝ ցանկապատ: Նեստոր բիծայի տաղավարը: Տաղավարում՝ զո՛վ, զո՛վ: Աստիճաններ: Աստիճաններին՝ հորաքույրս: Պուայա հորաքրոջս աչքին ես հա մի գլուխ մեծանում եմ: Տարեցտարի: Անընդհատ: Վայ, էս ո՞նց ես մեծացել, բալեն: Հորքո՛ւր, Նեստոր բիծայի օղուց կտա՛ն, խմեմ: Գժվելու բան է, բալա՛ ջան, կգժվեցնի քեզ: Տուր էլի՛, հորքո՛ւր: Սուփրա՛ շուշաբանդում: Տապակած կարտոֆիլ: Չվածեղ: Մատղաշ պանիր: Համով կեղևով հաց: Տղեմալի: Խոր ամանի մեջ կտրտած վարունգ ու լոլիկ: Լիքը-լիքը՝ սոխ, հետը՝ աջիկա: Լա՛վ խառնած: Որպեսզի առանց այն էլ բուրումնավետ համեմունքների՝ սունելիների հոտն ավելի լավ տարածվի շուրջը: Սառնարանից հանված բարակավիզ օղու գրաֆինը միանգամից գոլորշապատվում է: Ես՝ հորաքրոջս մոտ: Նեստոր

բիծայի ու էսվերի մոտ: Երեք սենյականաց  
քնակարան, որի մի սենյակը հիմա ինձ է պատ-  
կանում: Ամառ: Ծովի ձայնը թեև չի հասնում  
մինչև հորաքրոջս տուն, բայց բույրը կա: Ծովա-  
ղի ու խոնավության: Յող: Շոգ: Վախ: Ցանկու-  
թյուն: Շուշարանդից մինչև ցանկապատ՝ մի  
քանի քայլ: Հորաքրոջս ամուսնու տաղավարը:  
Հենց այդտեղ՝ նստարան ու սեղան, որտեղ հար-  
կաններով թուղթ ու դոմինո են խաղում: Ծովա-  
փից վերադառնում եմ արևահարված ու սոված:  
Հենց ոտքս դնում եմ տաղավարի ստվերում,  
սիրտս տեղն է ընկնում՝ հարազատ տան մեջ եմ  
զգում ինձ: Շունչս՝ տեղը: Հանգստացած: Ինչ-  
քան գինի պիտի քամեր հորաքրոջս ամուսինը,  
որ մի ամբողջ տարի հերիք աներ հորաքրոջս  
բազմահյուր օջախին: Դե՛, նա էլ հա մի գլուխ  
քամում էր: Հետև էլ գովում-գովաբանում: Նախ  
ինքն էր խմում՝ ուրիշին ներկայացնելու համար:  
Թթու էր գինին: Դաղում էր լեզուդ: Իսկ երբ շա-  
քարի համը գալիս էր, սիրտդ էր վառում: Գույնը՝  
անգույն դեղին, լեղակի գույնի խփող: Բայց օղին  
լավ էր ստացվում: Քիչ: Բայց՝ լավը: Սուր: Միան-  
գամից զգացվող: Կրակի պես: Վառող: Օղին՝

թրաշավոր «գրանյունի» բաժակում: Բաժակը՝  
շուրթերի մոտ: Երկու մեծ կումով: Ջերմություն՝  
կոկորդում: Տարածվում է կրծքավանդակում:  
Լավ է: Նեստոր բիծայի նման էսվերն էլ է օղի  
քաշում: Էսվերի օղին շուշարանդում առավո-  
տյան բացված սուփրան է հիշեցնում: Էսվերը՝  
Աբխազիայից Գուրիա ապաստանած: Թբիլի-  
սիում մի կերպ քնակարան պոկելու մասին է խո-  
սում հետս: Ժամանակի քնավորություն: Խոսքից  
զգացվող ժամանակի շունչ: Բնակարան ձեռք  
զցել Թբիլիսիում: Սա գաղթականների գրույցի  
թեմա է: Սեփական տունուտեղը կորցրած մար-  
դիկ իրենք էլ ցանկություն ունեն ինչ-որ մեկին  
նեղելու, թեկուզև խաբելու, որ իրենց հարիսի  
տեղ չդնեն: Ես էսվերին ասացի, որ ինքը բան  
պոկող չէ: Մինչդեռ ինքը կարծում է, թե... Վա-  
խոն էլ մի կողմից շիրա տվեց՝ բա ո՞նց անի: Իմ  
մոտ թող ապրի՝ պատասխանեցի ես: Այդպես  
Գուրիայում էլ է ապրում՝ ասաց Վախոն: Պատե-  
րազմ, որում պարտվեցին էսվերն ու Վախոն:  
Անձրևից առաջ ցավում է Վախոյի ուսը: Որով-  
հետև ուն է վիրավորված: Իսկ էսվերի ոտքն է  
ցավում, որովհետև ոտքն է վիրավորված:

Միաբանությունն չկար, դրա համար էլ պարտվեցինք՝ ասում է Էնվերը: Ռուսը հրահրեց այս պատերազմը: Եվ ուսն էլ հաղթեց մեզ: Նորությունն արձագանքում է Էնվերը: Հիշում ենք Օչամչիրեն: Ես ու Վախոն Էնվերի հյուրերն ենք: Երկու՝ բերանները բաց, դրսորդական շներ՝ Օչամչիրեի ծեմուղում: Աղջիկներ՝ բաց սարաֆաններով: Աղջիկներ՝ տնային խալաթներով ու ոտների մատները բաց «շյոպանցիներով»: Նրանց մերկությունը: Այսպես են անսպասելի աչքիդ զարնում: Բաց սարաֆաններով կամ կոճակները բաց սարաֆաններով: Հա՛: Անսպասելի աչքի զարնող: Լոյսի պես ցոլացող մերկություն: Ուժեղ արևայրուք ստացած: Ցանկությամբ լի: Չգիտես ինչու մեզ վրա ուռած-փքված, մեզնից նեղացած: Կամ՝ անտարբեր: Կամ՝ մեղադրանքով: Կամ՝ քանի տեղ չդնելով: Վախոն ինձնից ղոչաղ է: Աղջիկների հետ հաջողեցնում է լեզու գտնել: Վախոն միանգամից է հասունանում իմ աչքին: Մազնոլիաներ: Մազնոլիաներ: Մեր պատանությունը: Մազնոլիաներն արթնանում են թռչունների դալայլից: Իսկ քնել պատրաստվում այն ժամանակ, երբ հանց ալեծուսի արահետ, ծովի՝

միանգամից մզվող իրանի վրա փոփում-տարածվում է հրաշեկ արևի սկավառակը: Արևն իջնում է ծովի վրա: Մազնոլիաների աչքերը տամկանում են: Երբ արևն իջնում է ծովի վրա, նրանք համարյա քնած են լինում: Արևը բավական փոքրացել է: Մի կետ է դարձել: Իսկ հետո պարզապես հանգել է: Մազնոլիաներն արդեն զով ու մի քիչ էլ ջերմ երազներ են տեսնում, ինչը որպես լուռ ու համաչափ, անխոռվ շնչառություն, փոփում է ծեմուղու վրա: Ճեմուղով՝ ես ու Վախոն: «Շյոպանցիների» գայթակղիչ քստքստոցը: Աղ ներծծած, սովահար մարմինների երջանիկ թմրիր: Պարտադիր կերպով ծովափնյա քաղաքի ծեմուղիներին քաջածանոթ լուսանկարիչ: Գլխին սոմբրերո: Մանր բեղերով: Փոքրիկ, բզով ծակած աչքերով, հետևողական, զննող, պրպտուն հայացքով: Կապիկի հետ: Ճեմուղում գրոսնողների մեջ անմիջապես կտարբերես տեղացուն: Գավառական քաղաքի այն ժամանակների մոդան: Կիսագուլպա՝ հանգուցած կապիչներով: Ջանադրաբար պլպլացրած կոշիկներ: Ազդրերին կիպ կպած, լայն փողքերով «շլաքս» շալվար: Երեք կոճակը՝ բաց, ուսերին՝

ծիգ տարածված օձիքով վերնաշապիկ: Բակեր: Բեղեր: Էնվերն էլ դրանցից մեկը: Էնվերն այս քաղաքում բոլորին ճանաչում է: Այս քաղաքն էլ Էնվերին է ճանաչում: Բարև, Էնվեր: Օ՛, բարև, բարև: Ո՞նց ես, Էնվեր: Օ՛հ, ոչինչ, ոչինչ: Թե ի՞նչ կապ ունի այստեղ «օհ»-ը: Բայց Էնվերն այդպիսին է: Կարճահասակ: Շարժում: Աշխույժ աչքերով: «Օհ» բացականչության պես կարճ ու կտրուկ: Ու ջերմ: «Օհ» բացականչության պես միշտ ամեն ինչի համար պատրաստ կանգնած: Կատակի համար՝ կատակող: Կռվելու համար՝ կռվող: Օգնելու համար՝ օգնող: Մտերիմների մեջ: Մերձավորների: Դրա համար էլ Էնվերին ասացի, որ ինքը ոչ մեկից էլ բան պոկող չէ: Սա ինքը՝ Էնվերն էլ գիտի: Գիտի, բայց էլի խոսում է այդ մասին, որովհետև դա դարձել է քաղաքում տուն գջլելու պատրաստ գաղթականների խոսակցության թեման: Հա՛ դե, նա էլ ուրիշների նման խոսում է: Ուրիշներն էլ Էնվերի նման են խոսում: Իրար մեջ են խոսում, հետո նույն բանն ասում ու կրկնում տնեցիների մոտ: Էսքան բան: Հետո Վախոն հիշեց Մադոննային: Հիշեց ու մեկն լռեց: Մադոննան: Դամիանեն ու Նրա

դուստր Մադոննան: Բեղերը կարճ կտրած Դամիանեն: Չարածձի, կկոցած աչքերով Դամիանեն: Նեղ ուսերով: Ուռած փորով: Ինչի մասին էլ խոսեր, անպայման հիշատակում էր ավագ որդուն, որն այն ժամանակ ապրում էր Սարատովում: Դամիանեի եռանիվ մոտոցիկլը: Մեջքը կռացրած՝ Դամիանեն իր մոտոցիկլով գոռոզ-գոռոզ ֆոֆոռում էր Օչամչիրեի ասֆալտաքանդ փողոցներով: Ժամանակ առ ժամանակ մոտոցիկլը թռչում էր ասես: Դամիանեն էլ վերուվար էր լինում մոտոցիկլի հետ միասին: Այսուայն կողմ խռիվ մազերն ավելի էին խառնվում իրար ու փռփռում պիոներական վզկապի նման: Դամիանեն մի պահ ձախ ձեռքը բաց էր թողնում ղեկից ու մազն իր տեղը դնում: Զիզգազավոր ճանապարհն անցնում էր դխոյսկացնելով, բայց մի տեսակ աղքատ-հպարտի կեցվածքով: Ու միթե հնարավոր էր, որ Դամիանեն այդպիսի գեղեցիկ աղջիկ ունենար: Մադոննան: Մադոննան նման էր մազնոլիաների երազի աղջկան: Սպիտակ, ձեփ-ձերմակ: Մուգ սև մազերով: Մազնոլիայի տերևի նման փարթամ էր նա: Արդեն հասուն՝ քաղելու համար: Մազնոլիայի

ծաղկի պես՝ նազ ու քնքուշ: Խաղաղ գրուցակից: Բարի աչքերով: Առաքինի: Նուրբ: Մի գեղեցիկ ու բարի պարզությամբ փայլող: Օջանջիրեի կինոն: Էկրանը: Փայտի նստարաններ: Մադոննան նստած է իմ ու Վախոյի միջև: Մերթ ընդ մերթ Վախոն ինչ-որ բան է ասում Մադոննային: Մադոննան նայում է էկրանին և շատ ցածրաձայն պատասխանում Վախոյին: Ես զգում եմ Մադոննայի երկար, ձգված պարանոցը: Վախոյի պատասխանից Մադոննան ժպտում է: Աչքը առանց էկրանից հեռացնելու: Ես չեմ նայում Մադոննային: Ես չեմ նայում Մադոննային, որովհետև ինձ թվում է, թե իմ հայացքի մեջ ամեն ինչ անխոս կբացահայտվի: Սակայն, այնուամենայնիվ զգում եմ, որ Մադոննան ժպտում է Վախոյի կատակից: Հաջորդ ամառ Մադոննային այլևս չտեսա Օջանջիրեում: Սարատովում բժշկական է հանձնել: Դամիանեն աղջկան ուղարկել է այնտեղ, որտեղ իր ավագ տղան է: Օջանջիրեն առանց Մադոննայի: Պսակվել է՞ հարցնում եմ Էնվերին: Չէ՛: Պատասխանում է Էնվերը: Ես այլևս ոչինչ չհարցրեցի: Էնվերն ինքը պատմեց այդ սարսուռի պատմությունը: Խեղճ

Մադոննա: Ասացի բարձրաձայն: Խեղճ: Խեղճ: Մադոննան: Ցնորվել էր: Հիմա Քուբախիի գժանոցում է: Եվ զարմանալի էլ չէ, որ գժվել է: Հա՛ղե, գժվել է: Անկողնուն գամված Դամիանեին մենակ չի թողել: Չի հասցրել դուրս գալ: Դամիանեին հենց անկողնում են սպանել: Խառը բանակի հրամանատարի անունը Բատկա է եղել: Բայց Բատկան չի, որ սպանել է Դամիանեին: Նա՛ ոսկի ատամնավորն է սպանել: Հրացանը դրել է Դամիանեի ճակատին ու կրակել: Ու... ժպտացել է: Ոսկի ատամն է լսվողներն ցույց տվել: Այդ պահին Բատկան ոտքերին «պարտյանկաներն» է փաթաթել ու նայել Մադոննային: Մադոննային նայել են և ուրիշները: Յոթ հոգի: Տարբեր ազգի ու հավատքի: Միմյանց հետ ատելությամբ միավորված: Հեզնական լողերը գնալով: Ու խելագարվել է թշվառ Մադոննան: Ավելի լավ չէ՞ր սպանեին: Չէ՛: Չսպանեցին: Ասացին՝ ձեր գիժը՝ ձեզ: Այստեղ թողեցին: Հիմա Քուբախիի գժանոցում է: Քուբախիի գժանոցում սանիտար է աշխատում Դողլապիա Շակոխան: Բալավանիում են նրան այսպես անվանել, որովհետև կախ ընկած շրթունքներ

ունի, ու բերանը կարծես թե բաց է: Իսկապես որ շշմած, բերանբաց<sup>1</sup> Շակոփա: Հա՛, պողշի մեկը կախ է՝ դողլապիա, բայց սրա հետ միասին նաև ծալապակաս է: Գժանոցի կյանքը հենց է՛ն գլխից նրան շատ դուր եկավ: Ու մնաց ու մնաց: Հսամաշ, քաքոտ սավաններն է մանրանիվ պատգարակով այսուայն կողմ տանում-բերում: Գնում-գալիս է՝ բաղի պես օրոր-շորոր: Ինքն իրեն միշտ ինչ-որ բան է խոսում: Ինչ-որ մեկին միշտ սպառնում է բռունցքով: Եթե անտրամադիր է, ծեծում է գժերին: Եթե բարձր է լինում տրամադրությունը, իր ամոթոյքն է ցույց տալիս ու հռհռում: Հռհռում ու հռհռում է: Ես լսում եմ նրա քրքիջը: Լսում եմ, որովհետև այքերս պաղում են: Լսում եմ, որովհետև երևի զառանցում եմ: Գուցեն իսկապես զառանցանք է այս ամենը: Ու եթե զառանցանք է, ուրեմն Դողլապիա Շակոփան ոչ եկել է Բալավանիից, ոչ էլ հաստատվել Քութախիի գժանոցում: Գուցեն Բատկան էլ ոտքերը «պարտյանկաներով» չէր փաթաթում, երբ ոսկի ատամը ցուցադրելիս այն մյուսն էր կրակում վախից լեզուն ցամաքած,

1 Վրացերեն՝ դողլապիա (ծ. թ.):

լեղապատառ Դամիանեի ճակատին: Հա՛: Զառանցանք է: Ամեն ինչն էլ զառանցանք է: Իմ հորինած զառանցանքը: Սակայն, երբ խեղճ Մադոննային պատկերացնում եմ գժանոցում, ամոթոյքը դուրս հանած՝ Դողլապիա Շակոփայի քրքիջն եմ լսում: Ծիծաղում հա՛ ծիծաղում է: Ծիծաղում հա՛ ծիծաղում է: Իսկ իմ այքերը պաղում են, քանզի աշկարա նրա քրքիջն եմ լսում: Հետո Վախոյի ծեռքն եմ զգում ուսիս: Վախոն ուշադիր նայում է ինձ: Վախոն գիտի, որ երբ այքերս պաղում են, ես մտովի զառանցում եմ: Վախոն լիքը բաժակ օղի է լցնում ինձ համար: Էնվերի օղին սպիրտի է նման: Էնվերին միշտ հաջողվում է ինձ համար օղի պահել: Էնվերի օղին ինձ միշտ հիշեցնում է Օչամչիրեն: Անհնար է մոռանալ՝ այդ օղին խմելով: Հիշելը մոռանալուց լավ է: Որքան էլ՝ ծանր, այնուամենայնիվ, ավելի լավ է: Պոայա հորաքույրը պատերազմից մեկ տարի շուտ մահացավ: Նեստոր բիծայի ցավից կծկված դեմքը: Մորուքը թողած: Էնվերի անփայլ, խամրած այքերը: Ես էլ նրանց հետ: Նրանց կողքին: Դատարկ բնակարանում: Հետո՝ պատերազմը: Էնվերը՝ պատերազմում: Նեստոր

բիծան՝ Գուրիայում: Աստանդական Նեստոր բիծան: Հորաքրոջս գերեզմանը Օչամչիրեում: Նեստոր բիծայի գերեզմանը Գուրիայում: Արանքում այն երկրի զորքը, որը կայսրության փլուզումն ընդունեց որպես սեփական անարգանք, անպատվություն: Իր ուժը ցույց տվեց: Դեռևս մինչև այն, երբ աշխարհի քարտեզի վրա տեղ կգտնեն կայսրության նախկին հանրապետությունը: Դեմն առավ: Ատելությանը միավորված բրիգադաներ ստեղծեց: Զենք բաժանեց: Ապատակությունների ճանապարհ բացեց: Որպեսզի չվրիպի, ճանապարհներին կարմիր սլաքներով նշեց, թե ինչ ուղղությամբ պիտի անցնեն, իսկ տակը գրեց՝ դեպի Վրաստան, դեպի Վրաստան: Վերջում իր հրամայական նշանը !!!: Այո՛: Այս հրամայական, սաստկական նշանն ավելի շատ էնոցիա է ենթադրում: Դե, ուրեմն՝ մեկ այսպես, մեկ այնպես, մեկ այնպես, մեկ այսպես: Մանասես, մանիսիրա: Դանպարապար: Դիմպոմ-պոմ: Դանպարապարա: Դոմպ: Անունը դրել են խաղաղապահ բանակ: Հավանաբար այն պատճառով, որ այսպես են գտել անհրաժեշտ: Որովհետև այդպես էր

պետք: Իմ երկրի նախագահն է հեռուստացուցից ինձ այսպես ասում: Ես հավատում եմ, որ իմ երկրի նախագահը պատերազմում պարտություն կրած երկրի նախագահ է: Որ նա երեսպաշտություն է անում պատերազմում հաղթանակած երկրի դեմ: Այո՛: Քանզի ուժը նշանակում է բարձրություն: Ուժն ամեն ինչ է: «Ուժեղի մոտ միշտ էլ թույլն է մեղավոր» ասացվածք կա: Այո՛: Քանզի այն, ինչ զիջեց գենքի առաջ, այժմ վերադարձնել է ջանում միայն երեսպաշտությամբ: Այո՛: Այդպես է: Ես հասկանում եմ: Բայց էսվերն ու Վախոն չեն հասկանում: Էսվերն ինձ խնդրում է, որ իրեն տանեմ մորս մոտ, որովհետև կարոտ է մայրական ջերմության: Վախոն ասում է, որ անջատեմ հեռուստացուցը: Մինչ կանջատեմ հեռուստացուցը, ձեռքս պարզում եմ առաջ՝ նախագահին բարև, բատոնո՛ւ՛ նախագահ, բարև: Երկրիս նախագահը բարևում է ինձ: Բարձրաստիճան պաշտոնյա մարդիկ մի զարմանալի հատկություն ունեն՝ ողջունում, բարևում են քեզ, բռնում են ձեռքդ, աչքերիդ մեջ նայում, սակայն ինչ-որ մի անտեսանելի, բայց զգալի էկրան կա ձեր միջև:

Այսպես, հեռուտացուցից են խոսում քեզ հետ: Բայց դե, ի՞նչ նշանակություն ունի՝ նախագահիդ ձեռքը կրճեն՝ս, թե՞ ոչ: Այստեղ կարևորն այլ բան է: Կյանքն ինձ նետել է չափազանց քաղաքակա- նացված ժամանակի մեջ: Կատարվում են հա- մաշխարհային մասշտաբի տեղաշարժեր: Ինձ՝ փոքր երկրիս խեղճուկրակ որդուս, հետաքրքիր է մի բան միայն՝ կփրկվի՞ արդյոք իմ երկիրն այս շրջապտույտից: Նա ինչ-որ հույս ներշնչում է, բայց հիմնականում ընդհանրական բաներ է ասում: Հենց այնպես, ինչպես պիտի խոսի պա- տերազմում պարտված երկրի նախագահը: Ոչ ավել: Ոչ պակաս: Ես մատոս դնում եմ հեռուտա- ցույցի կոճակին: Հեռուտացուցը մարում է՝ կես դարձած արևի նման: Գնում ենք մորս մոտ: Երբ մայրս ակնոց է դնում, տատիկի է նմանվում: Բո- լորի տատիկներին: Ընդհանրապես՝ տատիկի: Թեև որքան էլ տատիկի նմանվի, նա ինձ հա- մար նախևառաջ մայր է: Ականջաբարձ: Ինչպե՞ն կսկսեի ականջաբարձի մասին վիպակս: Շատ պարզ՝ մայրս որդուս համար ականջաբարձ կա- րեց: Սովորական ականջաբարձ: Սպիտակ մթե- լով կարված հավի բմբուլներով լցված բարձիկ:

Բարձի երեսին հնուօթյունից դեղնած երկու կո- ճակ է կարված: Իսկ ինչո՞ւ երկու: Ուրեմն՝ ինչ- քան: Երեք: Ոչ: Երկու: Թեև մի կոճակ էլ որ լիներ, լավ կլիներ: Փոքր է, իսկապես ականջին մոտ դնելու հարմար: Երևի ահա այսպես կսկսեի: Գիր: Գրող: Գրողը պիտի գրի: Էներգիայի հա- մակենտրոնացում: Կենտրոնացված խտացում: Չեմ կարողանում: Ցրվում է: Ասես ումբակոծված կերակրաման լինի՝ «կատելոկ»: Մատներս քիչ են բոլոր ծակոտիները լցնելու համար: Չեն բա- վում: Հեռվում մնացած մենությունը, ուր ափե- ափ երջանիկ էի իմ զառանցանքներով: Ինչ-որ բան ասացի: Արտաբերեցի՞: Վերջակետ դրեցի: Որսորդի համառությանը պահակեցի և, այնուա- մենայնիվ, հասա քեզ: Ինձ ուժ կտա: Հավատ կներշնչի: Հետո ինչ, որ պիտի տանջվեմ: Պիտի տանջվեմ, այո՛, որովհետև մարդը ստեղծված է տառապանքի համար: Ոմանք ընթանում են թեթև զեփյուտի հոսանքի հետ: Ամեն մարդ իր ճամփան ունի: Իր ճամփով է անցնում ամեն մարդ: Ե՛ս գիտեմ, թե ինչո՞ւ և ինչպե՞ս եմ տառապում: Մի ուրիշն էլ իրենը գիտի: Փնտրտուք: Փնտրտուք: Չես գտնում: Կամ էլ

չի բավարարում այն, ինչ գտնում ես: Դու քո՞նն ես փնտրում: Քո՞ ռիթմը: Քո՞ ուղածը: Քե՞զ տրամադրվածը: Քո՞ ոգին: Քո՞ շունչը: Քո՞նը: Ուրիշինը թող ուրիշը փնտրի: Էներգիայի համակենտրոնացում: Դրանով ես ապրում: Եթե այդպես չապրես, երբեք ոչնչի չես հասնի: Բացառված է: Գալիս է հարայ-հրոցով: Եկա՛վ: Հասա՛ր: Քեզ թվում է, թե հոգուդ ամենամերձը հենց դա է, որ կա: Տեղաշարժվե՛ց: Գնա՛ց: Քսած էլ լինես, մեկ է՝ հանգիստ չի տա: Գալիս է: Մոտենում է: Խոսքով: Դեմքով: Տրամադրված: Որպես ռիթմ: Համանվագ որպես: Ուղեղն աշխատում է անկանգ: Քնի մեջ էլ այդ մասին ես մտածում՝ չմոռանա՛ս հանկարծ: Չմոռանա՛ս: Այնպես ես մղվում դեպի թուղթն ու գրիչը, ինչպես պապակ շուրթերով մարդը՝ դեպի ջրով լի շիշը: Գրառում եմ: Նշում եմ: Մտածում եմ՝ հիմա կքնես: Բայց՝ չէ: Գալիս է: Մոտենում է: Երբ գալիս է, մեծապես երջանիկ ես: Երբ վերջակետ ես դնում, այդժամ՝ ևս: Թեև շուտով օտարվում ես: Քեզ թվում է՝ խաբված ես: Չէ՛, այն չէր: Ինչ-որ բան թերի ես թողել՝ մտածում ես: Կամ՝ ինչ-որ բան այնպես չես արտահայտել: Հե՛չ բան էր:

Երանի չգրեիր: Դիմանա սփտի այս օտարումին: Հա՛: Դիմանա սփտի: Դիմագրավես: Որպեսզի կրկին համարձակվես ու կրկին կպչես գործին: Եվ մի անգամ էլ ըմբռշխես բարձրակետին հասած մարդու ցնծալի փրկությունը, և հոգուդ ցնցումը քեզ նորից հիշեցնի գոյությունը ոգու: Թեև սա էլ է շուտով օտարանում: Դժվար է, քանզի մինչև վերջ հետամուտ ես կասկածին: Վերջին հաշվով ստացվում է Էներգիայի կոնցենտրացիա, քանզի համոզվում ես քո ոչնչության մեջ: Դրանով գերված: Ինքդ էլ դրան նպաստող: Պարադոքս: Այո՞ պարադոքս: Պարադոքսից մինչև արսուրդ: Պիտի հեռանա: Իսկ կյանքն ընթանում է իր ճամփով: Եթե չհեռանա, չես կարող զգալ: Սա էլ է պարադոքս: Պարադոքսից մինչև արսուրդ: Ուժ սփտի հավաքես և գոնե միառժամանակ մի կողմի քաշվես: Որպեսզի ավելի լավ տեսնես: Քեզ պատիվ չի բերի, սակայն, մի կողմի քաշվելը: Դու վշագործ մեշոկն ես գցում ուսերիցդ: Մեշոկը: Իմ մեշոկը: Վշագործ: Մինչև բռնելս, պատրաստվում եմ: Կանգնած եմ: Դիտում եմ: Հետո մի անորսալի պահի օղն եմ հավաքում թոքերիս մեջ՝ ի նշան

գործողության՝ որպես մեկնարկ: Մկանները՝ շարժման մեջ: Մի քայլ դեպի մեշուկը: Կռանում եմ: Աջ ձեռքով բռնում եմ մեշուկի վզից: Արյունս գրգռվում է վշագործ մեշուկին կպչելուց: Դա ինձ ուժ է տալիս: Մի բարձրացնելով՝ ուսիս: Թորքերիս մեջ օդը մաքրվեց: Մեշուկը բնավորվեց շալակիս: Ծանրությունն առաջ է տանում: Գնա՛: Գնում եմ: Ոչ: Չեմ գնում: Թեև կարող եմ ժամփորդել, սակայն հիմա դրա գլուխը չունեմ: Դեռ ոչ: Առայժմ հանգստանում եմք ես ու հոգնածությունս: Միասին: Ես նստած եմ պատուհանի մոտ: Իմ դիմաց՝ իմ հոգնածությունը: Ես ու հոգնածությունս 100-100 գրամ օդի խմեցինք: Մի բաժակ էլ խմեմ ու հետո գուցե մի տեղ գնամ: Ո՛ր: Ճանապարհորդության: Ես կարող եմ մի տեղում նստած էլ ճանապարհորդել: Քանզի անշարժության մեջ էլ շարժում կա: Ամենամեծ շարժումը հենց անշարժությունն է: Նստել եմ մի տեղում, քայց գտնվում եմ հեռո՛ւ-հեռավոր աստղածիրներում: Կա նման բան: Այո՛: Հիշում եմ: Բայց նախ խմեմ: Հա՛: Որովհետև հոգնածությունս էլ է խմել ուզում: Ուզում է՝ ուզի: Բարի: Շշից՝ բաժակ: Մինչև հատակ: Բաժակ՝ շուրթերի

մոտ: Պատուհանից այն կողմ՝ ձմեռ: Մառախլապատ առավոտ: Կամուրջ: Ծառեր: Երկու մեծ կունով: Աչքերից՝ արցունք: Գրպանից՝ թաշկինակ: Աչքերիս: Քթիս մոտ: Ոսկոր: Ցավ: Բացված շնչառություն: Թաշկինակ՝ գրպանում: Հայացք՝ բաժակին: Հիտուն գրամանոց: Ասում են՝ 100 գրամանոց: Պապս այս բաժակով «վիշնյովկա» էր խմում: Բայց՝ ընդամենը մի բաժակ: Ոչ ավելի: Հանգստյան անգործ օրվա առավոտ: Պապս նստած է սեղանի առաջ: Սեղանի վրա դրված են թղթեր ու մեծ հաշվիչ՝ չոթք: Պապս գրում է: Ժամանակ առ ժամանակ հաշվիչի քարերն է տանում-քերում՝ հաշվում է: Հագին՝ «սետկա» մայկա: Գլխին «հագցրել» է կանացի չուլքի: Երեսը՝ մաքուր սափրած: Սենյակում՝ օղեկոլոնի հոտ: Ռադիոյից լսվում է տղամարդ հաղորդավարի խոսքոտ ձանը: Հետո հաղորդավարի ձայնը կորչում է ռադիոյից: Լսվում է շատ խրոխտ ձայն: Պապս ինձ վրա ուշադրություն չի դարձնում: Երբ պապս տարված է աշխատանքով, ես շատ սուր զգում եմ, որ օղեկոլոնի հոտը մեծերի հոտն է: Ես մտնում եմ սեղանի տակ: Սեղանն իմ տունն է: Այնտեղից ես տեսնում եմ զանգվածեղ

մահձակալի անկյունը: Աթոռը: Երկաթի պատշգամբը: Պատշգամբի դուռը բաց է: Արևը խաղում է չինարի տերևների հետ: Ես քսվում եմ պապիս ոտքերին: Պապս ուշադրություն չի դարձնում: Սենյակ է մտնում տատս: Տատս հարցնում է՝ որտե՞ղ է երեխան: Չգիտեմ՝ պատասխանում է պապս: Ես բարձրաձայն ծիծաղում եմ: Ես հավատում եմ, որ իմ ծիծաղը ոչ մեկը չի լսում, որովհետև տատս պապիս է հարցնում, թե երեխան որտեղ է: Փախցրած չլինե՞ն՝ հուզված ձայնով իրար է անցնում պապս: Ես ավելի բարձր եմ ծիծաղում: Օ՛յ, ահա թե որտեղ է եղել նա: Ճի՛տա՛: Միասին ծիծաղում ենք: Երեքով: Հետո գալիս է Վախոն: Վախոն նկատել է, որ իմ դեն նետած կոնֆետը երբեմն տատիկս է տանում: Վախոն սա ասում է այն ժամանակ, երբ մենք ուտում ենք քաղցր խուրմա: Իմ ու Վախոյի մեջ միտք է ծնվում: Ես ու Վախոն համ ծիծաղում, համ էլ խուրմա ենք ծեփում: Խուրմա ծեփելը շատ հեշտ գործ է: Խուրմայի կտի վրա քսում-ծեփում ենք սրձագույն պլաստիլին, և խնդրեն՝ խուրման պատրաստ է: Ես ու Վախոն արագ-արագ վեր ենք կենում, խուրմաները

թափում հատակին, որ տատիկս գա ու տեսնի: Հետո նորից թաքնվում ենք սեղանի տակ և սպասում, թե երբ կհայտնվի տատս: Տատս իսկապես խաբվում է, քանի որ աչքերի լույսը պակասել է և կտով պլաստիլինն իրոք խուրմայի տեղ է դնում: Կռանում, գետնից վերցնում է խուրման, փոշին վրայից փչում ու կծում: Տատս ծամաձռում է դեմքը: Ես ու Վախոն ծիծաղից թուլանում ենք: Երկար: Երկար: Տատս մեզ վրա չի բարկանում, իսկ մենք ուզում ենք, որ բարկանա: Ու դրա համար էլ նորից ենք ծիծաղում: Արդեն ծիծաղներս չի գալիս, բայց, այնուամենայնիվ, ծիծաղում ենք: Մասնկություն: Ականջաբարձ: Ականջաբարձին՝ տղայիս փոքրիկ ձեռքը: Լուռ թախիծ: Լուռ: Լուռ: Ես սիրում եմ այդպիսի թախիծ: Այդպիսի թախիծը դառնահամ ունի: Լեղին ներսից է տանջում: Անբացատրելիորեն է անհանգստացնում քեզ: Թախիծը լուռ է: Հուշեր է րերում իր հետ: Զերմախառն: Բարեխառն: Զուլալ: Քեզ լցնում է մաքրության զգացողությամբ: Հույսով: Կարմիր կոթով խոզանակն իմ ձին էր: Խաղալիք ձի ունեի: Բայց գերադասում էի կամիր կոթով խոզանակը: Նրան ասպետի

կազավիճակ էի տվել, ասպետական բնավորության գծեր շնորհել: Թշնամիներ էի գտել նրա համար: Վատերին: Չար մարդկանց: Իբրև թե նրանցից վիրավորված՝ դառը վրնջում էր: Այդ ժամանակ ես խոզանակի վրայից հանում-պոկոտում էի մազերը, ինչպես ձիուց են հանում: Որ ինձ համոզեմ: Իբրև թե իսկապես ցավաց: Ոչ թե իբր, այլ իսկապես: Օ՛հ, ինչպես է ցավում: Մեկ է՝ ծնկի չես բերի: Ընդհակառակը, ավելի կընդգզի ու քացու տակ կտա վատերին, չարերին: Վերջում էլ կհաղթի: Անպայման կհաղթի: Ինչ ասել կուզի: Ամեն առարկա իր բնավորությունն ունի: Անբացատրելի, բայց զգայական էներգետիկա: Մաշված-քրքրված բազկաթոռ: Մեջտեղը՝ մաշված, եզրերը՝ մի քիչ՝ կանաչագույն: Պահպանված: Մենակ: Ծերացած: Տխուր: Ծեր բազկաթոռ: Տխուր: Մորս կողմից վերջերս ձեռք բերած վարագույրները: Վառվռուն, պայծանձ գույն: Արև: Դեպի սենյակ՝ պայծառ, վառվռուն վարագույրների միջով: Ես՝ մորս գրկախառնված: Նոր ձեռք բերած իրը նշանակում է՝ ամեն ինչ լավ է: Մայրս ջահել է: Մայրս ժպտում է: Արևը սենյակ է ներխուժում ուրախ

վարագույրներից: Հաստ թեյնիկ: Ուռած-փքված: Բարի: Թեյի գավաթ: Կարագով հաց: Վերևից՝ պանրի շերտ: Հացի բույրին շաղախված թանձրաղի ու շաքարով լի թեյի սպասում: Թեյնիկը եռաց: Թեյը եռում է: Սպիտակ: Ուռած-փքված: Բարի: Հանդերձապահարանի խորհրդավոր խորքում նավթալինի հոտ է իշխում: Նավթալինի հոտը սրում է մենության զգացողությունը: Վախենում եմ: Բայց սիրտս էլի այնտեղ է ձգում: Մինչև վերջ խցկվում, փակում եմ դուռը: Խավար: Խավարչտին, խիտ անտառում՝ մենակ: Սսկված: Սսկված: Համակ ուշադրությամբ: Քիչ անց դավադրաբար դեպի ինձ եկող քայլերի ձայն: Դեպի ինձ: Թե՞ աղմուկ: Դեպի ինձ: Սիրտս կանգ առավ: Քարացավ: Կտրվեց: Հետո՝ ավելի ուժեղ: Սիրտս խփում է: Անակնկալ: Անակնկալ: Արագ-արագ: Կոկորդս սեղմվում է: Ցատկ: Հորս վրայով շատ լայն պիջուակի թևքը մի վիթխարի թռչունի թևի նման իջնում է պարանոցիս: Խավարչտին անտառում: Մենակ: Իմ ականջարածն էլ այդ տարիներից: Նա էլ այս ականջարածի նման: Նա էլ սրա նման դեղնած կոճակներով, բերանը փակած: Այն ժամանակ

ինձ հետ էի նույնացնում ականջաբարձը: Նա էլ էր փոքր: Ես էլ: Ես՝ իմ ծնողներից կախված: Նա էլ հայր բարձից կախված: Ինչո՞ւ հայր բարձ: Չգիտեմ: Այդպես էի պատկերացնում: Ծիծաղելի նմանություն: Ավագ հայր բարձն ու իր որդին՝ ականջաբարձը: Մեկը մյուսի հետք ու հետագիծ: Բթից-պնչից ընկած: Շարունակության զգացողություն՝ նրանց նմանությունից ու միասին լինելուց: Անընկալելի հույս առ այն, որ ժամանակի հետ ես ու ականջաբարձն էլ կմեծանանք, երկուսս էլ միաժամանակ հերոսներ կդառնանք ու մեր որդիների համար կդառնանք ամենակարող, խաղաղ պաշտպաններ: Հույս՝ մութ սենյակում: Հույս՝ մութ սենյակում: Ես ինձ մենակ չեմ զգում: Այտս մի քանի անգամ հպում-անցկացնում եմ ականջաբարձի վրայով: Ձեռքիս մեկը՝ վրայից, մյուսը՝ տակից եմ անցկացնում, որպեսզի ավելի մերձ զգամ նրա մոտիկությունը: Դող: Հիշողությունից: Ո՛չ: Հիվանդանալուց առաջ: Հիվանդանում եմ: Կհիվանդանամ: Գրիպ: Գրպանից՝ թաշկինակ: Կհիվանդանամ: Բթին մոտիկ: Ինձնից դուրս եկող գրիպի բացիլ: Շունչս բացվեց: Օդին թուլացրեց քթոսկրիս ցավը: Բութ

ցավ է: Շիշ: Բաժակ: Մինչև վերջ: Շրթունքների մոտ: Երկու մեծ կումով: Ծանր է ներս գնում: Մի պատահ: Կտորտանքներ սեղանին: Մխտոր: Չեմ ուզում: Հայացք՝ փողոցին: Պիտի գնամ: Ամպամած, մտախլապատ առավոտը լուսացել է «պիտի»-ով: Լեյլան: Մական: Դարեջանը: Հացի փող: Ջիպ: Կամաց: Շատ կամաց: Երևի անձանոթը տուն է փնտրում: Ծանր-ծանր անվաղողերի վրա: Ջիպն այն օրն էլ անցավ: Այն օրն էլ ծանր-ծանր անվաղողերի վրա: Որ հանկարծ չչրջվի: Երբ անցավ, ես սալահատակին ընկած մարդ տեսա՝ զինվորական բատինկաներով՝ կապերն արձակած: Անցա: Հեռացա: Ո՞ղջ, թե՛ մեռած: Չգիտեմ: Ինչո՞ւ հեռացա: Խոնավություն: Խոնավություն: Հետո շուռ եկա: Բայց մինչ այդ էի հեռացել: Ջիպը կանգ առավ: Նայում եմ: Նայում եմ: Հետո նորից ծանր շարժվեց: Դանդաղ: Ծանրորեն: Հայացքը հետևում է: Իմ հայացքը: Աչքերը հառած: Հետևում է: Հիշեցնում է: Ի՞նչ է հիշեցնում: Հա՛: Հիշում եմ: Եվ կամ ինչպես՝ չեմ հիշի: Անպայման պիտի հիշեմ: Շոգենավ՝ ծովում: Շառագունած ամպեր: Կարմրի մեջ մխրձված մռայլ, մռայլի մեջ՝ կարմիր: Մի թեթև էլ

կանաչ քսված: Երկնքում: Թույլ կանաչն ավելի է սրում սև-կարմիր ամպերը: Ծովը՝ մուգ կապույտ: Երկու-երեք տեղ: Ծովն էլ է խփում մուգ կանաչի: Որպես խոշոր բիժ՝ խառնվել է նաև ցեխագույնը: Ծովի խորքում ծնված ու մակերևույթին հանգրվանած դարսեղարս, խիտ-խիտ ալիքներ: Ալիքներից բռնած ժերմակ փրփուր: Ճերմակ փրփուր: Ահա երևաց մի ճայ: Կորավ: Ես՝ զառիվայրին: Մենակ: Աչքս՝ շոգենավին: Շոգենավը բարձրանում է: Ալիքից գլորվեց: Իջավ: Հեռանում է ինձնից: Անձրևում է: Անձրև: Հոնքերիցս իջնող անձրևի կաթիլը չի թողնում, որ աչքս թարթեմ: Այտոսկրերիս՝ անձրևաշիթեր: Պարանոցիս: Ականջիս մոտ: Ականջիս մեջ: Որդի նման ողջ կաթի: Շարժվող: Թաց: Պլստան փորով լողացող: Ճայթյուն: Հրագույն: Ինչպե՛ս: Սպասում: Բուտո՞ւ՛ուխխխխխ: Բուտո՞ւ՛ուխխխխխ: Անպայման կլինի: Անկարելի է, որ չլինի: Ինչ-որ վատ բանի: Նախանշան: Որպես ավարտ: Չարագույժ: Հայացք՝ շոգենավին: Շոգենավը վեր է ելնում: Ալիքը գլորում է: Քշեց: Իջավ: Հեռանում է ինձնից: Վայր ընկավ: Ասես ձոր գլորվեց: Որպես թե՛ ծովում ցեխագույն մի փոքր բիժ: Ծովը

հատած: Ծովին խառնված: Չոր: Չորի միջով՝ գետ: Աչքի պոչով զգալի: Փոքր էր: Հոսում էր դեպի ծով: Ցեխագույն դարձած: Փրփրած: Ժամանակ առ ժամանակ փլվող հողը՝ շառաչունով՝ դեպի գետ: Շառաչունի ձայնը՝ որպես երանգ մյուս ձայներին: Անձրևի ձայն էլ որպես երանգ: Ալիքներին էլ: Ամպերում տարուբերվող թռչունների չուն ևս՝ ամպերի մեջ դատապարտված: Զառիվերներից՝ փողրակներ, որոնց մեջ նորածին անհամար վտակներ են սուրում դեպի վարարած գետը: Լանջի վրա ծառ է կախված: Մի տեսակ ծոռված, այլակերպված: Արմատով հանդերձ, ատամի նման միանգամից աճած ու տզեղ, այլակերպ: Այնուհետև՝ շառաչունով՝ դեպի գետ: Վարար շոխեղով: Գետը գրկում է ծառին, առնում իր մեջ: Հետո դուրս է շարտում: Տանում է: Կորցնում: Գետը բերում է նաև դիակներ: Ատմնների: Անասունների: Այս ու այնտեղ՝ մոլեգնած, կատաղած ջրի մեջ՝ գլուխներ: Նպատակամուղ: Չեռքեր: Վեր պարզված սմբակներ: Ուռած-փքված մերկ որովայններ: Հայացք՝ շոգենավին: Շոգենավը՝ հեռվում: Ինձնից հեռու է: Ծովի մեջ՝ հոգնաբեկ հավք՝ երկնքից պոկված,

երկնակախ: Գահավիժող: Մի հարվածով պայ-  
քարած ու հետո քարացած: Ծանր-ծանր՝ դեպի  
ծով: Պայքարի վերջին փրկագինը: Թևածալ:  
Այստեղ է: Այստեղ է: Երկուսը միասին: Վերջին  
փրկագնին ուղեկից՝ վերջին փրկագին: Շոգե-  
նավը գլորվեց ալիքի վրայով: Իջավ: Հեռանում  
է: Փրկագնի հաճախականություն: Ակնասևեռ:  
Դատապարտվածության մեջ՝ դատապարտվա-  
ծություն: Շոգենավը՝ հեռվում: Հեռանում է ինձ-  
նից: Ապահովության զգացողություն: Տանը:  
Հանգիստ: Խաղաղ: Սրտամոտ: Հեռանում է:  
Վարձք: Փրկություն: Աստված: Հեռանում է ինձ-  
նից: Հայացք: Ուղեկցում: Հեռանում է ինձնից:  
Հայացք: Իմ հայացքը: Ակնասևեռ հայացքն է  
ինձ հիշեցնում: Հայացք փողոցին: Չմեռ: Կա-  
մուրջ: Ծառեր: Թաց ասֆալտ: Ջիպ: Անցավ: Հա-  
րազատ, սրտամոտ զգացողություն: Այսպես  
հանկարծակի ձեռքիցս թռած: Կորավ: Անհետա-  
ցավ: Հեռու է: Անդրոն: Անդրոյից հարազատու-  
թյան պակաս զգացի: Անդրոն: Այն ե՛րբ էր, որ  
հանդիպեց ինձ ու Վախոյին: Հա՛: Երբ գնում էինք  
չղախ Նանայի մոտ՝ մեր միսը վաճառելու ու երբ  
դրանից առաջ Մաքսիմեի ընկերոջ

սրճարանում էինք քարշ գալիս՝ հոգի վաճառե-  
լու: Անդրոն: Մեր դասարանցի Անդրոն:  
«Ռուսթավելի» մետրոյի մոտ: Ռուսթավելի:  
Ռեմբրանտ: Ռախմանինով: Ռուլան: Ռեյգան:  
Ռեպին: Ռոսսինի: Ռաստրոպովիչ: Ռուրկի: Ռին-  
գո: Բիթլզներ: Մեր շատ սիրելի խումբը: Սերունդ:  
Սերունդը սերնդացել ու սերնդացման մեջ սերն-  
դացնում է սերնդականներին: Նորից՝ Նանան:  
Սերունդը սերունդ է դարձել: Վախոն ինձ զան-  
գեց: Արի՛, ասաց, պետք ես: Ու ընկալույզը դրեց:  
Վախոն: Տամուկ աչքեր: Ուռած ակնախոռոչներ:  
Ընկճվածություն: Աչքերիս նայել չի կարողա-  
նում: Պիտի դեն նետեմ՝ ասաց, կմեռնեմ, բայց  
դեն կչարտեմ: Երկու օր անընդհատ ողբում էր:  
Նստած էր կռացած: Օրորվում էր: Նայում էր  
հատակին ու տնքում էր: Քրտնած: Քրտնքի մեջ  
կորած: Պառկում էր: Պառկած: Մի կերպ ննջում  
էր: Հետո նորից աչքերը բացում: Վեր էր կենում:  
Քայլում սենյակում: Քրտինքը վրան: Քրտնքի  
մեջ կորած: Ձեռքը բռունցք անում՝ պատին էր  
խփում: Ցավով ցավ էր հանգստացնում: Նորից  
էր նայում: Հատակին: Նվում էր, տնքում, հեծե-  
ծում: Ճոճվում էր: Վեր էր կենում: Քրտինք:

Քրտնքի մեջ կորած: Վեր էր կենում: Ջուգարանում: Սրտխառնոց: Քրտնքոտ: Քրտնքի մեջ կորած: Ձեռքը բռունցք անում՝ պատին էր խփում: Ցավով ցավ էր հանգստացնում: Քրտնքի մեջ կորած: Ճոճվում էր: Երերում էր: Հատակին էր նայում: Երրորդ օրն արդեն երեսիս նայեց: Խմեցինք: Քնեց: Տեսքն ավելի լավ էր: Միառժամանակ քաշվում էր դուրս գալ փողոց: Հետո դուրս եկանք: Միասին: Ո՞ր գնանք՝ հարցրեցի Վախոյին: Ուր որ գնում էինք մանկության օրերին, - ասաց Վախոն, - արի քայլենք Ռուսթավելի փողոտայով ու Լադիձեի ջրերից խմենք: Անդրոն: «Ռուսթավելի» մետրոյի մոտ: Ճաղատ է արդեն: Մագերը՝ բլանժե: Դաստակից կախ՝ «պեղեռաստկա»: Ի՛նչ կապ ունի այստեղ «տկա»-ն: «Պե-դե-ռաստկա» - սա ճիշտ ձև չի: Վախոն է այդպես ասում: Ես չգիտեմ անգամ, թե այդ «պեղեռաստկան» ընդհանրապես ինչի՞ համար է: Հա՛: Երևի կամ փաստաթղթեր դնելու կամ բջջայինի: Չգիտեմ: Չի հետաքրքրում: Կաշվե գոտիով կախում են դաստակից: Քայլելիս՝ դրանք օրորվում են: Դրա համար էլ մի տեսակ տարօրինակ են քայլում: «Պեղեռաստկայի»

ոիթմին հընթաց: Վախոն տանել չի կարողանում: Դրա համար էլ բարդ բառ էր դարձնում ու ավելացնում՝ «տկա»-ն: Անդրոն ու բլանժեն: Անդրոն ու իր դաստակից կախ «պեղեռաստկան»: Դեռևս սովետական իշխանության օրոք էր հասցրել Չեխիայից աղջիկ բերել: Դրանից հետո չեմ էլ տեսել: Այսինքն՝ ոչ էլ հետաքրքիր էր: Մի տեսակ անմարդամոտ տղա էր: Բայց դա չէր պատճառը, որ ընկերներ ունենալու ցանկություն չունեիր: Ընդհակառակը: Այդ հարցին մոտենում էր բավականին գիտակ, կարդացած մարդու ըմբռնումով: Քաղաքագետի նման: Այո՛: Հենց այդպես: Քաղաքագետի նման: Եթե ընկերանամ սրա կամ նրա հետ, ինձ ավելի ապահով կզգամ: Մոտավորապես այսպես: Իրոք քաղաքագետի նման: Անդրոն ամեն կերպ ձգտում էր բարեկամություն անել Վախոյի հետ: Ինձ հետ էլ: Սակայն ինձ հետ այն պատճառով, որ ինձնից անցներ Վախոյին: Այո՛: Քաղաքական գործչի նման: Կեղծիք: Տիպություն: Դյուրըմբռնելի: Համակերպվածություն կեղծիքի հետ: Ստիպված հետևում ես, թե ուր կիրավորի քեզ: Ինքդ երեսյա ես: Քեզ թվում է, թե դա հեշտ է: Բայց,

այնուամենայնիվ, տհաճ զգացողությամբ ես համակվում: Գիտես, որ կեղծ է: Սարքովի է: Իհարկե: Ամեն ինչ հաշվարկված: Նախօրոք մշակված ծրագիր է ներկայացնում քեզ: Գնանք խինկալանոց, ես փող ունեմ: Կամ՝ կինո գնանք, ես փող ունեմ: Կամ՝ ո՛ր գնանք: Ոչ էլ տեղ կար գնալու: Ասենք՝ ձիարշավարան: Թեև երբեք չի առաջարկել ձիարշավարան գնալ: Ոչ էլ թատրոն: Զարմանք: Ողջունում: Նորից զարմանք, որը կրկին զարմանք չէ: Ուսին ձեռք զարկելով ասվող բառեր՝ գնանք ռեստորան: Ասում է Անդրոն: Փող ունե՛ս՝ ծիծաղում է Վախոն: Անդրոն չի ծիծաղում: Անդրոն փոխվել է: Մի տեսակ ինքնավստահ: Հավասարակշռված: Հասունացած: Վախոյի ծիծաղն այլ կերպ է հնչում: Նվաստացուցիչ: Հենց իրեն՝ Վախոյին նվաստացնող: Ինձ էլ: Ես սա զգում եմ: Անդրոն էլ: Սակայն Անդրոն չի ծիծաղում: Անդրոն փոխվել է: Ես ու Վախոն վաղուց չենք եղել ռեստորանում: Մենք քաշվում ենք: Ի՞նչ վերևից է Անդրոն դիմում մատուցողին: Միաժամանակ՝ իբրև թե քաղաքավարի: Միաժամանակ՝ խստաբարո՝ ի՞նչ ունեք: Իսկ այսինչ բանը չունե՞ք: Ինչո՞ւ չունեք: Լավ, թող լինի այն,

ինչ կա: Ու շրջում է դժգոհ հայացքը: Ես զգում եմ, որ Վախոն ուզում է վարվել առաջվա Վախոյի նման: Չի կարողանում: Դրա համար էլ երևի հանդուրժում է շատ կոպիտ Վախոյին՝ էս ի՞նչ է, այ տղա, էս ինչո՞ւ ես էս բլանժեն թողել, կամ էլ՝ բա էդ «պեղեռաստկան» ինչո՞ւ ես ձեռքիցդ կախել: Վախոն «պեղեռաստկա» բառը շատ ընդգծված է ասում: Անդրոն աչքերով ժպտում է: Անդրոն հասկանում է, թե ի՞նչ է թաքնված այս կոպիտ վերաբերմունքի ետևում: Ես էլ եմ հասկանում: Վախոն էլ: Վախոյի կոպտությունը հնչում է որպես ծիծաղ: Անդրոն մեզ նկարներ է ցույց տալիս: Իր բնակարանը Պրահայում: Կնոջ հետ: Երկու դուստրերը: Վրացերեն չեն խոսում, բայց գիտեն, որ վրացի են: Հատկապես կրտսերը գիտի, որ վրացի է: Ի՞նչ է նշանակում՝ հատկապես կրտսերը գիտի: Չեմ հարցնում: Լռում եմ: Վախոն էլ է լռում: Հիմա մեծ մասամբ Անդրոն է խոսում: Լուսանկարչական ապարատների վաճառքով է զբաղվում: Լավ գործ է: Կայուն: Չեխիան շատ է առաջ գնացել: Ի՞նչ ասի, լեզվի պրոբլեմ էլ չունի, որովհետև չեխերենը քարոզ լեզու չէ: Չեխիայում Արևմուտքը շատ

Ներդրումներ է արել: Որովհետև Չեխիան եվրոպայի սիրտն է: Առանց ներդրումների երկրի տնտեսություն չի զարգանա: Նրան բացարձակապես չի հետաքրքրում, թե ով է Չեխիայի նախագահը: Վացլավ Հավելը չի: Ես էլ եմ միանում նրանց զրոյցին: Ժպտում է: Այո՛, Վացլավ Հավելն է, բայց բանն այդ չէ: Բանն այն է, որ մարդիկ իրենց գործն անում են լուռ: Այդ թվում՝ նախագահը: Նա էլ նույնպիսի քաղաքացի է, ինչպես և ինքը՝ Անդրոն: Ահա՛ թե բանն ինչ է: Իսկ ընդհանրապես սկզբից դժվար է եղել, իսկ հետո գնալով առաջ է գնացել: Լավ ընտելացել է: Հիմա հիանալի աշխատանք ունի: Նորմալ վարձատրություն: Բնակարան: Մեքենա: Կինն էլ իր մեքենան: Մեծ աղջկան էլ է խոստացել, ու հենց հասնի Չեխիա, նրա համար էլ անպայման կգնի: Փոքրի համար դեռ վաղ է, թե չէ դա էլ մի պրոբլեմ չէ: Խմում ենք: Խոսում է: Շատ է խոսում: Աչքին ինչ ընկնում, դրա մասին էլ կարող է խոսել: Խմե՛լ: Քիչ է խմում: Բայց, այդուամենայնիվ, հարբեց: Շատ ուտելուց խուսափում է, որովհետև հակված է գիրության: Մարդ պիտի միշտ «ֆորմայի» մեջ լինի: Եվրոպայում արտաքին

տեսքին կարևորություն չատ են տալիս: Եթե «ֆորմայի» մեջ չես, վե՛րջ, հաշիվդ պարզ է: Բոլորովին այլ փոխհարաբերություններ են գործնական, պրակտիկ: Բոլորովին այնպես չէ, ինչպես՝ Վրաստանում: Որտեղ միայն ուտելու մասին են մտածում: Չէ՛: Այնտեղ ուրիշ է: Իսկ ընդհանրապես, նրան այնտեղ էլ պետք եկավ վրացական «ժիլկան»՝ ջիղը: Շա՛տ պետք եկավ: Վրացին Վրաստանում բանի պետք չէ: Իսկ ահա արտասահմանում՝ ապրի՛ ու ապրի՛: Դե նրան էլ հարգում են: Վաստակել է այդ հարգանքը: Մի բանի անգամ վրացավարի է վարվել, հավանել են: Քեզ հատուկ դրսևորելու կարիք չկա, բայց ինքնատիպ կոլորիտ հանդես բերելն էլ չի խանգարի: Ինքնատիպ կոլորիտ: Միանշանակ: Տեսնես սա ի՞նչ է՝ նշանակում: Չեմ հարցնում: Խոսում է: Հետո հայացքով փնտրում է մատուցողին: Մինչև հիմա որտե՛ղ է պատվիրած ուտելիքը: Սա ի՞նչ սպասարկում է: Ի վերջո, իրեն վիրավորված է զգում: Ոտքի է ելնում: Գնում է պարզաբանելու: «Պեղեռաստկան» թողնում է սեղանին: Հիմա սրա գլխին չտամ՝ ասում է Վախոն ու նայում Անդրոյի ետևից: Անդրոն շուտով

վերադառնում է: Դեմքից երևում է, որ դժգոհ չէ: Էլի խոսում է: Էս ի՞նչ կրակ ու պատիժ է. վերջն էս երկրում խելքի չեկա՞ն: Դեռ օդանավակայանում զգաց, թե ինչ քաքի մեջ ընկավ: Բա մաքսայիններն ինչի՞ նման են: Անընդհատ ինչ-որ պատճառ են փնտրում էդ մուրացկանները: Բայց լավ դաս տվեց: Բա չէ՛, կոպ տար, համբերներ: Անձնագիրը ցույց տվե՞ց: Էն էլ ո՞նց ցույց տվեց: Չեխիայի՛ քաղաքացի է: Բա չէ՛: Լավ տեղը դրեց: Բա դեղատները: Ինչի՞ նման են այստեղի դեղատները: Որ մեռնի, էդ կրպակներից դեղ չի գնի: Բա օ՞ղը: Մի՞թե կարելի է շնչել այս թունավոր օդը: Ի տարբերություն Թբիլիսիի, Պրահայում 10-20 անգամ ավելի շատ մեքենա է երթևեկում, բայց օդն այսքան թունավորված չէ: Այնտեղ վաճառում են նորմալ բենզին: Ես դրանց ցավը տանեմ: Ա՛յ, հենց մենակ դրա համար: Չէ՛: Լավ է՝ ժամանակին հասցրեց այստեղից հեռանալ: Կամ քաղաքն ինչի՞ նման է: Կամ մարդիկ ինչի՞ նման են դառել: Ինչո՞ւ չեն թափում սեփական տան մոտ կուտակված աղբը: Սրա մեջ ի՞նչ դժվար բան կա: Սա էլ հո մե՞ծ բան չէ՛: Այնտեղ՝ Պրահայում փողոցներն օճառով են լվանում,

իսկ այստե՞ղ... Բա էլ ո՞ր էիր գալիս, բրշկվում էստեղ՝ ասում է Վախոն: Աչքերի խորոց խորքից, ինչ-որ տեղից մի նապաստակ նայեց թաքուն այդ պահին ու նորից կորավ: Անդրոն այլևս այն Անդրոն չէ, ուստի և իրեն նվաստացած է զգում: Ի՞նչ է նշանակում՝ բրշկվում... Դա ի՞նչ արտահայտություն է՝ բրշկվել... Ոչ թե բրշկվել է, այլ եկել է ծնողներին տեսության: Դու եկել ես ոչ թե ծնողներիդ տեսության, այլ նրա համար, որ քո նմանները քեզ լսեն, ու երբ դու վարկաբեկում ես այս երկիրը, բերանով ծը՛, ծը՛, ծը՛ անեն: Անդրոն ավելի է վիրավորվում: Անդրոն համարում է, որ իր հայրենիքը ոչ մեկից պակաս էլ չի սիրում: Դեռ ավելին, հնարավոր է, որ ուրիշներից էլ շատ է սիրում և հենց այն պատճառով է այսպես միշտն ասում, որ իր երկրի լավն է ուզում: Գիտե՞նք արդյոք ես ու Վախոն կամ մի ուրիշը, թե նա Պրահայում քանի՞ վրացու է օգնության ձեռք մեկնեց: Չգիտենք: Սո՛ւս, տո՛՛ գանդո՞ն,– ասում է Վախոն,– դու իրավունք չունես էս երկրի մասին էդպես խոսելու: Դու ոչ էլ էն մարդն ես, որ ինչ-որ մեկին օգնության ձեռք մեկնես: Անդրոն նորից է պատրաստվում ինչ-որ բան ասել: Վախոն

ձեռքը տանում է դեպի Անդրոյի բլանժեն: Մի փոքր դեպի իրեն է քաշում: Ձենդ կտրի՛, քանի դեռ չեմ շոել եդ «պեղեռաստկիդ» մեջ,- ասում է Վախոն: Անդրոն լռում է: Հիմա արդեն Անդրոն նման է առաջվա Անդրոյին: Ինչո՞ւ: Որովհետև ծիծաղում է: Էս ո՛վ եք եղել, այ՛ մարդ, էս ի՞նչ մարդիկ եք դուք... չէ՛, մենք փոխվող պտուղ չենք... անհնար է: Չէ մի չէ՛, քեզ նման փոխվեմ ու հըլը մի բան էլ բլանժե թողնեմ, ձեռքիցս էլ «պեղեռաստկա» կախեմ՝ ասում է Վախոն արդեն խաղաղ ձայնով, որովհետև իր դեմ տեսնում է առաջվա Անդրոյին: Հիմա արդեն նա կատակում է: Բայց էս ի՞նչ լավ կթու կով ե՛ն եղել դու, հա՛... Հա, բայց ես իմ հարազատ համադասարանցուն ո՞նց կթեմ: Ասում ու աչքերով ծիծաղում է: Անդրոն էլ է ծիծաղում ու նմանվում մանկութ օրերի Անդրոյին: Վախոն այնքան հաճախ է հիշատակում կթել բառը, որ հնարավոր է, որ այդպիսի բան մտքից անցնում էլ է... Անդրոն, այնուամենայնիվ, հին օրերի Անդրոն չէ: Բավական է, յալլա՛, կորի գնա՛ այստեղից, ու էլի իր սրտով սիրած տեղում կլինի: Կեղծիք: Կեղծիք: Կեղծիքը հոգնեցնում է ինձ: Վախոյից էլ

Անդրոյից էլ: Վախոյից, որովհետև այս մասին հենց սկզբից էր մտածում: Անդրոյից, որովհետև նա ոտքից գլուխ է կեղծիք: Ճշմարտությունն ասաց: Կարծում եք՝ ճշմարտությունն չէ՞ր ասածը, բայց մեկ է, կեղծ է: Ջարմանալի բան է ստացվում: Անդրոն ճշմարտությունն ասաց, բայց Անդրոն ծիշտ չէ: Հա՛: Չէ՞: Մարդ արարածը սովորաբար այնպես վառված, այնպես զգացմունքով չի խոսում, երբ ինքն անձամբ չի տապալվել յուղում: Ասում են՝ յարեն տիրոջն է ցավ տալիս: Անդրոն ճշմարտությունը դարձրել է մատի փաթաթան, որպեսզի թոզ փչի մեր աչքերին: Իբրև թե մեզ ինչ-որ բան էր հասկացնում: Էլի ու էլի նույն սանձարձակ էմոցիայով: Իրավունք չունեք: Իրավունք: Իրավունքը մեծ բառ է: Ճշմարտությունն ասելու համար իրավունք պիտի ունենալ: Վախոն ուներ այդ իրավունքը: Թրփիլխյան պատերազմից հետո նա բախում ունեցավ իր համագվարդիականների հետ: Այդ շրջանում Վախոն տառապում էր անքնությունից: Ջղագրգիռ էր դարձել: Իսկ ջղագրգիռ մարդն, ինչպես հայտնի է, ամեն բառ հիվանդագին է ընդունում, ամեն արարքի էլ իր տալիս հազցնում:

Հրավիրել էին ջոկատի ժողովին: Ինձ էլ տարավ: Գնացինք: Կիրովի այգում էր: Պարզվեց, որ գվարդիականներին բատինկաներ են բաժանում: Նվիրեցին: Պոլիէթիլենի տոպրակի մեջ փաթաթած: Ես այս ռուսական բատինկաները պատից կկախեմ, որ հաճախ հիշեմ, որ վրացու վրա չպիտի կրակեմ՝ ասաց Վախոն: Ո՛ւմ մասին ես ասում, էդ փտածների՞՝ ասաց ջոկի հրամանատարը: Վախոն ձեռքով հարվածեց հրամանատարին: Հրամանատարն ընկավ: Հետո մեզ էլ ձեծեցին: Անգեն: Կրակոց չեղավ: Ոչ էլ դուբինկայով գլխին խփել: Ուտքերով ձեծեցին: Ծեծեցին ու գնացին: Գուցե այսօր արդեն քնել կարողանամ՝ ասաց Վախոն: Թեև, միևնույն է, չքնեց: Երկար ժամանակ տանջվում էր անքնությունից: Աչքերի տակ սևացել էր: Մի օր էլ ասաց՝ արի եկեղացական կյանք վարենք: Ես ու Վախոն քաղաքում: Հյուրանոց «Թբիլիսի»: Միայն պատերը: Սևացած: Քարուքանդ տներ: Փլատակներից գոլորշի է բարձրանում: Բուդ: Թանձր ու միգպատ: Արդեն որքան ժամանակ է այս տներն ավերված են, բայց բուրդ դեռ բարձրանում է: Ավելի բարձր, քան տներն իրենք էին մինչև

ավերակ դառնալը: Ու սարերից բարձրացող վիթխարի ամպերի նման անընդհատ ձևափոխվում: Ահա՛, հիմա դևի է նման: Չարաղետ դևի: Փոխվում է ձևը: Բայց, այնուամենայնիվ, դևի է նման: Ավերակների մեջ մարդիկ այնպես լուռու մունջ են գնում-գալիս, ասես պաշտամունքային ծես իրականացնելիս լինեն: Ես ու Վախոն մոտենում ենք եկեղեցուն: Մուրացիկներ: Խումբ-խումբ: Միանման դեմքերով: Որպես մի բիժ՝ ընդհանուր համապատկերում: Եկեղեցում ահագին բազմություն է: Պատարագ է: Ես ու Վախոն առաջ ենք անցնում: Մեր ձեռքերում մոմեր են: Այն ժամանակ նկատեցինք: Չնկատել հնարավոր չէր: Ինքն այնպես էր անում, որ իրեն նկատեն: Սարկավագը: Սարկավագը: Սարկավագը՝ սարկավագի հագուստի մեջ: Դեմքը՝ պզուկոտ: Բոյով: Երկար ու ծղոտագույն մազերով: Սակռակավոր: Բայց ասես նման է կռվելու պատրաստ կոռնկի: Իր բարձրությունից այնպես է նայում ներքև, ասես կտուցով հարվածել է պատրաստվում: Շրջվում է դեպի քիչ այն կողմ կանգնած մի կնոջ՝ քալբատոնո՛ւ, մոմը պիտի ձեռքի մեջ պահել: Կինն անակնկալի եկավ: Չկարողացավ

աչքերի մեջ նայել: Վերև նայեց: Սարկավագն անցավ առաջ: Հիմա անցավ ուրիշներին՝ սա ի՞նչ ողորմություն տվող է... Էլի առաջ անցավ: Հետո մոմ վառեց: Նորից առաջ անցավ: Գլխաշո՛ր էլ չեն ծածկում: Դռները բաց են եկեղեցի մտնում: Նայեց չորս կողմը: Տմբումբացրեց գլուխը: Գնաց: Ժողովուրդն անմիջապես ճամփա տվեց: Առաջ անցավ: Նորից հայտնվեց: Գնում-գալիս՝ մեր շուրջն է պտտվում: Այնքան է պտտվում, ինչքան ժողովուրդն իրեն հնարավորություն է տալիս: Դեմքը՝ խստահայաց: Սակոռակի նման: Կտուցը՝ հարվածի պատրաստ կռունկի նման: Ինչ-որ մեկին հանդիմանեց: Երեխայական համբերությամբ ինչ-որ բան՝ բացատրեց: Գնաց: Վերադարձավ: Պարզ երևում է, որ դուրը գալիս է, որ ուշադրություն է գրավում: Մի տղամարդ հարցնում է, թե հանգուցյալի ո՞ր մասում պիտի դնել մոմը: Խաչի մոտ՝ պատասխանում է նա, խաչի մոտ: Ահագին մարդ ես, էդ էլ չգիտե՞ս: Տղամարդը գնաց: Սարկավագը խստաբարո դեմք ընդունեց: Էս ժողովուրդն ինձ կգժվեցնի: Հասարակ բանն ի՞նչ է, էդ էլ չգիտեն: Փոքրիկ տղայի բարոյոյթ, որին տվել են խելք բաժանելու

և անպատիժ մնալու հնարավորություն: Գնում է: Նորից է գալիս: Ամենուր է: Այստեղ: Այնտեղ: Ոչինչ աննկատ չի մնում նրա աչքից: Ես ու վախոն մոմեր ենք վառում և եկեղեցուց դուրս գալիս: Մենք այլևս կարիք չունենք միմյանց հետ խոսելու այն մասին, որ այսօր չենք գա քահանայի մոտ ու չենք անցնի եկեղեցական կյանքի: Դա սուտ կլինի: Թողնենք գալիքին: Ավելի լավ կլինի: Հետո: Երբևիցե: Նա մնացել է առաջվա վախոն: Ես էլ առաջվանն եմ մնացել: Մտորումի, գիտակցումի իրավունք: Իրավունքն իրոք մեծ բառ է: Սիրո նման: Խոհի ու մտորումի իրավունք միայն սերը ունի: Ճղճիմ է: Տափակ է: Երևի: Հետաքրքիր չէ: Սեփական մաշկի վրա զգացած: Նախկինների հասարակությունը զգացնել է տալիս: Գաղափարախոսի թափուր տեղ՝ նախկինների հասարակության մեջ: Այս տեղի համար պայքարում են շատերը: Կուսակցություններ: Հասարակական կազմակերպություններ: Տարբեր կրոնական խմբավորումներ: Ես՝ հեռուստացուցին սևեռված: Հեռուստացուցից դուրս նետվող ինքնավստահություն՝ սեփական ճշմարտության հանդեպ: Գժվել կարելի է:

Խենթանում եմ: Այսքան քարոզ: Այսքան քարոզաբանություն: Այսքան քարոզվող: Եվ ամենահետաքրքիրն այն է, որ ոչ մեկի քարոզածն էլ մի նշույլ, մի թիզ կասկած անգամ չի հարուցում: Ես հիշում եմ, որ Նախկինների հասարակության անդամ եմ ու մի քիչ թեթևանում եմ, որովհետև գտնում եմ ինձ հետաքրքրող պատասխանը: Թեև խաղաղվելու ոչ մի բան էլ չկա, քանզի ոչ ոք չգիտի, թե որտեղ է այս պղտոր գետի պղտոր հունը: Ես գենետիկորեն քրիստոնյա եմ ու ժամանակ առ ժամանակ այն եկեղեցու ընդերքում եմ սփոփանք փնտրում, որն ինձ պահ են տվել իմ Նախնիք: Ես գիտեմ, որ մեկը պատերազմներում սուր է ճոճել, մեկը՝ չարչարանքի մահով Նահատակվել, ինչ-որ մեկն էլ եկեղեցական գիրքն է արտագրել: Եթե անգամ այս ամենը չի արել, ապա գոնե Սուրբ ծննդյանը բլիթ է հասցրել թխել ու իր տանն Ալելուիա երգել: Հետո Կարմիր ուրբաթին հավկիթ է ներկել, Ջատկից հետո էլ գերեզմանոց գնացել: Ինձ մատուցեցին կարմիր ձու ու ասացին՝ դու գրրի, որդյա՛կս, քո վարձքը շատ է ավելի: Ահա այսպե՛ս մեծացած: Այս ամենի հետ կապված: Տատիս գուրգուրած

սրբապատկերից իմ մեջ տպավորված Աստծու պատկերը: Ինչպիսի աթեիստական հասարակության մեջ էլ մարդը մեծանա, Նա, ի վերջո, Աստծու մասին է մտածում: Երբ Աստծու մասին եմ խորհում, ես անմիջապես տեսնում եմ տատիս գուրգուրած սրբապատկերից ինձ նայող դեմքը: Նրան եմ դիմում, ուստի և մտնում եմ այնպիսի եկեղեցի, որտեղ սրտով նման սրբապատկեր եմ տեսնում: Եկեղեցու շեմին կանգնած են մուրացկաններ: Նախկինների հասարակության մեջ մուրացկանները շատացել են: Նախկինների հասարակության մեջ ընդհանրապես մուրացկանի հոգեբանությունն է իշխում: Մարդիկ փնտրտուքի մեջ են: Չեն գտնում: Փնտրում են: Չեն գտնում: Ընկնում են հոռետեսության գիրկը: Նորից են սկսում փնտրել: Ի վերջո, ինչ-որ մեկը տեղ է տալիս քեզ: Նստեցիր: Հարմարվեցիր: Ճիշտ է, մինչ կհարմարվեիր, աղաչանք-պաղատանքով, կաշառքով ու եսիմ ինչով ճանապարհ անցար, ու աստիճանաբար տեղն ընկավ արժանապատվությունդ: Բանզի հիմա էլ հայտնվեց քեզ խնդրող: Եվ այսպես: Այս պտուտածիրում: Այս շրջապտուտում: Ամենօրյա

այս համապատկերում: Ո՛վ է նա: Նա նրա ի՛նչն է: Ի՛նչ կարող է տալ: Կամ ի՛նչ կարող է վերցնել: Ի՛նչ տեսանկյունից մոտենանք: Ինչպե՛ս անցնենք, որ մի բան էլ մեզ ողորման: Այո՛: Այս առօրյա համապատկերը կեղծիքի նման նամշահոտ է: Հոգիներն են նամշած: Դատարկապորտ երեսպաշտությունից: Երբ շատ եմ հոգնում, ես եկեղեցու ընդերքում եմ գտնում իմ հանգստությունը: Թեև մինչև եկեղեցի մտնելս, պիտի դիմանամ մուրացկանների հայացքներին: Նախկինների հասարակության մեջ ակնառու մուրացիկներ: Հո միայն փող չէ, որ նվիրում ես: Դու նաև հավատ ես ներարկում, որ ինքը՝ այս մուրացիկը, այն մյուս մուրացիկից, ում կողքին կանգնած է ինքը, ավելի լավ մուրացիկ է: Այստեղ ամեն ինչ մակերեսային է, առերևույթ: Ըստ մեկնած ձեռքի պլաստիկայի: Դա էլ է արվեստ: Դա էլ է ռիթմ: Պիտի ճկուն լինես: Ունենաս մշակված, խղճահարություն հարուցող ինտոնացիա: Մոլեռանդության աստիճանի կարողանաս ողորմելի մարդու դեմք սարքել: Դա քեզ կօգնի: Սա էլ է առևտուր: Քանզի նա էլ է քեզ ինչ-որ բան առաջարկում: Իր մուրացկանությունը: Իր

ունեցածն է քեզ ներկայացնում: Կարեկցանք առաջացնելու իր հմտությունը: Քո վրա ինչ-որ բան է ծախում: Վաճառում է այն, ինչը դու ի վիճակի ես առնել: Թեթրիներով: Խուրդա փողով: Մանրադրամով: Դու գնորդն ես: Նա վաճառողն է: Այս պլաստիկայով: Այս ոճով: Այս ձայնով: Այս դիմակով: Այս կերպ: Իսկ նա առևտրականների հետ միասին սրան էլ է վռնդել: Կարող էր անել այսպես: Նա մարդու վերափոխված Աստված էր: Իսկ ես մարդ եմ, ու մանրադրամը պիտի բաժանեմ ինձ լայն մեկնված ձեռքերի միջև: Նա ուներ վռնդելու իրավունք, քանզի ժշմարիտ սիրով էր սիրում նրանց: Ու երբ մի քանիսին ծո՞րակից բռնած դուրս շարտեց, ապա դրանով ոչ թե վնասեց մարդկանց, այլ փրկեց նրանց ընչաքաղցությունից ու կեղծիքից: Այո՛: Պատժելու, դատաստանի իրավունք էլ միայն սերը ունի: Ես դրա իրավունքը չունեմ: Երբ ես տեսնում եմ մուրացիկների աղճատված դեմքերը, մենակ մի բան եմ տեսչում՝ շտապ դուրս գալ եկեղեցուց: Կամ՝ եթե մոտս մանրադրամ ունենամ, ապա գնեմ այն, ինչ նրանք են վաճառում: Որ ձեռք քաշեն ինձնից: Այո՛: Գլխիցս ռադ անեմ, հեռացնեմ:

Եթե փող չեմ ունենում, հայացքս մի տեսակ օտարոտի է դառնում: Երկու դեպքում էլ ուղեղս թելադրում է հեռանալ նրանցից: Թեև երրորդ ճանապարհն էլ կա՝ նույն մուրացկանության ճանապարհը. ես էլ նրանց նման պարապ-սարապ նստեմ և այն հույսով փող նվիրեմ, որ հետո հաշվի առնվի նրա հետ հանդիպման ժամանակ: Այդպես է: Եվ ոչ մի դեպքում էլ սերը չէ, որ ուղղորդում է իմ վարմունքը: Դրա համար էլ չունեմ ո՛չ դատաստանի, ո՛չ էլ վրդովվելու, գայրանալու իրավունք: Երբ բացահայտ խարդախության հետ եմ առերեսվում: Նա մարդու կերպարանքով Աստված էր: Եվ հենց սիրո համար վրդովվեց: Ուստի չէր ստեղծում այն, ինչ ստեղծում էր: Ոչ թե փարիսեցիություն, այլ Հորի անկեղծությունն էր խնդրում մարդուց: Աղետալի վիճակում հայտնված մարդու անկեղծությունը: Այն ամենը, ինչն իսկապես տեսավ, ցնցեցին ու դառնացրին նրան: Այո՛: Անկեղծություն էր խնդրում: Եվ միայն անկեղծությամբ էր արդարացնում իր արածը: Դրանից ավելին չէր ուզում: Ուզում էր այն, ինչ խլել էր ինքն իր ձեռքով: Հարապատիկ ավելի էր պահանջում:

Անսահման ավելի շատ ու թանկագին անկեղծություն: Անկեղծություն: Նախկինների հասարակության մեջ: Անկեղծ լինել ու խնդրել կարող է միայն մեկը: Բոլորի անկեղծությունն անհնար է: Իսկ նախկինների հասարակությունը միավորումների հասարակություն է: Մարդկանց ուղղորդում է մենության վախը: Դրա համար էլ միավորվում են տարբեր կուսակցություններ ու հասարակական կազմակերպություններ: Գլխավոր գաղափարախոսի թափուր տեղի համար միմյանց հետ սուր պատերազմի մեջ խրված: Կուսակցությունների ռազմավարական նպատակներ: Արհմիությունների ռազմավարական նպատակներ: Տարբեր սոցիալական խավերի տարբեր ռազմավարական նպատակներ: Ամենուր մոլի, անհագուրդ ընչաքաղցություն: Ամեն մեկն ունի իր նպատակն ու իր ծճարտությունը: Արդարությանը հետամուտ մարդն այստեղ գլուխ է կորցնում: Ըստրազանգվածի մի միավոր, մի բաղադրիչ: Եթե ոչ, ապա գոնե կուսակցության ակտիվիստ: Կամ է՛լ կուսակցության առաջնորդ: Այո՛: Առաջնորդ: Խորապես համոզված իր ծճարտության մեջ: Դրա համար էլ

կոկորդում լի մաղձ՝ չարամտորեն նայելով իր մրցակցին: Լավ է ճանաչում: Լավ է ճանաչում, որովհետև ինքզինքն էլ լավ է ճանաչում: Այն, ինչ ինքն է գիջել, նույնն էլ նա է գիջել: Անձնական: Մարդկային: Զուտ իրենը: Անհատականը: Զիջել է: Ինչ-որ բանի կամ ինչ-որ մեկի շահերն է պաշտպանել: Հիմա միմյանց նեղում են: Իրար մրցակից են: Սա է: Նա է: Հեռուստաէկրանից: Գնա՛ գալիս եմ: Ինքնահաստատման բնագո: Ինքնափրկության բնագո: Ամենուր վախ է զգացվում: Յուրաքանչյուր հայացքի դիմաց քողարկված է վախ: Յուրաքանչյուր մարդու խոսքի դեմ վախն է աղաղակում: Մարդիկ՝ վախից չարացած: Աչքերը վախից մշուշված: Վախով վախ սերմանողներ: Գիտեր: Գիտեր, թե որտեղ է եղել ամեն մեղքի սկիզբը: Դրա համար էլ մարդուն ասաց՝ նայիր երկնի հավքերին: Նայիր արտի ծփանքին: Մի՛ ալեկոծվիր: Մի՛ ալեկոծվիր: Մի՛ վախեցիր: Կուռք դարձրած շահեր: Կամ կուռքի զոհասեղանին դրված քո ամենամեծ պարզևը, ինչով նա քեզ շնորհել է քո սրտի զարկը: Քո՛ միտքը: Միայն քոնը: Քանզի մեկն ես: Ծնված: Կուզես մեղք անվանիր: Կուզես սխալ:

Սակայն, միևնույն է, քո կողմից ցավագին ապրված: Քո՛ կողմից: Այդ ցավն էլ հո դու ես: Դու: Մի հոգի: Մի մարդ, որն ի վերջո մեն-մենակ պիտի կանգնի Նրա առաջ: Նա չի խաբվի: Չես կարող խաբել Նրան: Չես կարողանա արդարացնել քեզ, որ դու մենակ չես եղել: Որ քեզ հետ ուրիշներն էլ կային: Որ շատերը կային քո նման: Նա քեզ դա չի ների: Չի խաբվի, որովհետև լավ գիտի, թե ինչն է քեզ կապել, միացրել նրանց: Ոչ թե սերը, ինչը նա հենց ի սկզբանե էր մատուցում քեզ, այլ՝ վախը: Վախով միավորվածները միմյանց հայացքի մեջ վախ են մոռանում: Վախով միավորվածները՝ ընդդեմ վախով միավորվածների: Դեմքերին՝ փսլինք ու լորձ: Ճշմարտության անունով: Ով ումից ավելի առաջ կանցնի: Ո՛ւմ ձայնն է ավելի թափով: Ո՛ւմ կարծիքն է ավելի հանրամատչելի հեռուստադիտողին, որպեսզի ավելի խտանան իրենց շարքերը: Որպեսզի ավելի շատ ուժ հավաքեն: Որ հետո ոտքի տակ տան: Սրան: Նրան: Կամ ինչ-որ մեկին: Որպեսզի իրենց երբեք ոտքի տակ չտան: Երբեք քացու տակ չտան: Իրենք լինեն միավորված ու համախումբ: Միասին: Լինեն հանրամատչելի: Բոլորին

տեսանելի: Բայց երբ հասնում են այս ամենին, պառակտումն արդեն իրենց մեջ է սկսվում: Ճեղք: Անհնար է, որ բոլորը գոհանան: Անհնար է, որովհետև ոչ թե սիրով, այլ վախով ու ատելությամբ են միավորված: Շատ էին սպասում, քիչ ստացան: Մարդկային ընչաքաղցություն: Սկսվեց: Գլորվեց: Գնաց: Նոր շրջապտույտ: Նոր տարածայնություններ: Նոր դեմքեր, նոր պերսոնաժներ, որոնք իբրև թե նոր, բայց իրականում հին, հնամենի գաղափարներ են առաջ քաշում, նոր զգեստ հարմարեցնում հին կաղապարներին: Այո՛, հարմարեցնում, սակայն ժամանակավորապես, որովհետև նրանք էլ վախով ուղղորդված են դեկավարվում: Եվ մի օր անպայման կերևա, որ հնամաշ է նրանց հագուստը: Մարմնի մերկությունն էլ: Մի օր անպայման սկանջիդ խեցին կծակի նրանց սին խոսքերի դատարկությունը: Եվ ավելին՝ քեզ կցնցի նրանց փուչ հոգիների հետ հանդիպումը: Դատարկ հոգի: Վախից ու չարությունից այնպես պարփակված, այնպես ներամփոփ, որ սիրո մի նշույլ չող անգամ չի տեղավորվի այնտեղ: Դատարկ հոգին երբեք չի դիմի իր երկրին այնպես, ինչպես

մի օր նա, այն մարդն ասաց. «Իմ լավ հայրենիք, ինչո՞ւ ես տխուր»<sup>2</sup>: Հենց վախից չարացածները դրդեցին նրան օր ծերության կուսակցություն ստեղծել: Միաձայն իրար անցան, արձագանքեցին: Միասնաբար առերեսվեցին: Իրենց կարծիքով՝ ամենավտանգավոր հակառակորդի սիրով լի սրտին: Դեմ գնացին իրենց սիրով միավորել ցանկացողին: Աչքերը սիրով լայն բացած այն մարդուն, որն իսկապես ուներ զայրանալու և պահանջելու իրավունք, քանզի նրանց նման էլ սարսափահար էր, որ արտաքսված է Հայրական դրախտից: Իմ սերը չբավարարեց ու դրանից ուժասպառ, նախկինների հասարակության անդամ դարձա: Հիմա նստել եմ բազկաթոռի մեջ և երկու միմյանց հակառակորդ քաղաքագետների շաղակրատանքի վրա եմ ժամանակ սպանում: Շշմեցուցիչ ինքնավստահություն՝ առ սեփական ճշմարտացիությունը: Ճիշտ է: Շատ ճիշտ է: Չափազանց ճիշտ է: Սա էլ: Նա էլ: Եթե անդունդի եզրին կանգնած հայրենիքը, ազգն ու երկիրը փրկի, ապա միայն սրա

2 Սա Իլիա Ճավճավաձեի հայրնի արտահայտությունն է, Իլիան է ասել (ծնթ. թրգմ.):

կուսակցությունը կփրկի: Թեև ո՛չ: Ներո՛ղ եղեք: Անդունդի եզրին կանգնած հայրենիքը ոչ թե այս, այլ այն մյուս կուսակցությունը կփրկի: Ոչ էլ նրա: Չէ մի չէ՛: Նրա՛: Բարբաջանք: Բարբաջանք: Այս բարբաջանքին ունկնդիր ու ակնդիր մարդն ուզած-չուզած ինչ-որ մեկի կողքին է կանգնում: Այս պահից էլ նա դառնում է պոտենցիալ ռազմավար: Ըստրազանգված-էլեկտորատի մի միավոր: Մի բաղկացուցիչ մաս: Սա նրանք էլ գիտեն՝ առաջնորդները: Փոքրից սկսում, մեծ են ուզում դառնալ: Դրա համար էլ քինոտ են նայում մրցակցին: Կոկորդի մեջ սեղմված արցունք: Կամ սպառնալիք: Ով ինչպես կարող է: Կամ վերամբարձ հեզնանքով: Վերևից նայող: Ով ինչպես կարող է: Պայքարի ինչ զինանոցի որ տիրապետում է: Ինչպես կհաջողվի: Անբարո կայսրության ընդերքից ակունքված գետ: Փլուզվող հողից ցեխագունացած: Դիակներ է բերում: Այս ու այնտեղ տղամարդու գլուխ է երևում: Ինչ-որ մի ձեռք: Ծերացած, մերկ որովայն: Ստից դեպի սուտ: Վախը սուտ գիտի նաև: Վախ: Վախով ղեկավարվողներ: Վախից չարացածներ: Վախից ընչաքաղց դարձած: Գնա՛, քանի դեռ

ժամանակն է: Գնա՛, այլապես մի ուրիշն էլ է քո նման վախեցած է և կարող է առաջանցել քեզ: Գնա՛, այնտեղից հավաքիր բերք, որտեղ չես ցանել: Այսպես է ընդունված նախկինների հասարակության մեջ: Անսամուսություն չեն համարի: Ընդհակառակը՝ հզորությանը կվերագրեն: Ո՛վ է ավելի հզոր: Ով արդեն հասցրել ու հիմա արդեն յուրային է: Անհասանելի է այլոց: Նստած է՝ ամուր գենք ու զրահով, պաշտպանիչ հագուստով: Քեզ է նայում ճշմարիտ աչքերով ու քեզ խրոխտ խոսք ասում: Սուտ-կեղծիքի ճշմարիտ աչքեր: Սուտ ու կեղծիքի կողմից փնտրված, գտած անհրաժեշտ բառեր: Սա նրանով է շահեկան, ինչը ձեռք բերել իր խարդախությամբ: Նա, ով առերեսվում է այս բանին, չի բավարարվում նրանով, ինչ ձեռք է բերել է իր խարդախությամբ: Պղտոր գետ: Դարձյալ պղտոր: Փլուզվող հողից ցեխագույն դարձած: Մարդ: Մարդիկ: Այս ու այնտեղ դուրս պրծած գլուխներ: Ջրից՝ սպառնալից դուրս ցցված ձեռք: Դիակի մերկ, ուռած որովայն: Նոր պետություն՝ աշխարհի քարտեզին: Ծնկները՝ դեռ թույլ: Դրսի աչքերին՝ լավ պատառ: Տարբեր պետությունների

կենսական շահեր, որոնք միջօրեականների պես սնում են նրան: Գոտիների են բաժանում: Ըստ ուղղանկյունների կամ քառանկյունների: Հավետով պատառներով: Դանակ-պատառաքաղով: Դանակ-պատառաքաղով: Ցավ է տալիս ինձ: Ցավ: Ցավում է: Ցավ: Ցավն է ցավում, քանզի սուր է: Ազգային էներգիան՝ նարկոզած ազահությամբ, փոխադարձ ընդդիմությամբ, նիհիլիզմով: Երկնքից կաթսաներով թափվող հայիոյանքներ մոր հասցեին: Մինչդեռ դու՛ անկարող: Անկարող: Անկարող, քանզի ներսում, քո երկրում վախով ես կառավարվում: Տարբեր կուսակցությունների ռազմավարական շահեր: Վախով կառավարողներից անպակաս անբարտավանություն: Անգործության մատնված ժողովուրդը՝ մեծ քաղաքականության մեջ: Հակառակ դեպքում՝ բանվորական «բիրժայում»: Ծանրությունից քարշ եկող ձեռքեր: Ծանրությունից կքված մեջք: Տխուր, մտասևեռ աչքերից քեզ է նայում նախամարդու սովը: Ժունալիստի ուրախացած ձայնը՝ սկանդա՛լ, սկանդա՛լ, սկանդա՛լ: Մի կուսակցության ակտիվիստը ծեծել է մյուս կուսակցության ակտիվիստին: Ի՛նչ ես

ասում: Իսկապե՛ս ծեծել է: Հա՛: Էն էլ ո՛նց: Ներսում, խորհրդարանի ընդունարանում: Հետո՛: Իսկ նա՛: Նա էլ է խփե՛: Բայց, ասում են, սրա խփածն ուրիշ է: Ղոչա՛ր: Ուրեմն լավ կովող է: Հա՛, իսկապես զիլ է: Իմ լավ հայրենիք, ինչո՞ւ ես այսպես տխուր: Այս բառերի հեղինակը առանց աշխարհի քարտեզի էլ լավ տեսնում էր, թե ում է դիմում: Այնպես, ինչպես մարդը՝ մարդուն: Դրա համար էլ լի էր կարեկցանքով: Դրա համար էլ քեզ հույս էր ներշնչում: Աստվա՛ճ իմ, որտեղի՞ց հիշեցի այս մարդուն: Դրա ժամանա՛կն էր: Աստվա՛ճ իմ, ես խեղդվում եմ այս գավառական տափակությունից: Ինչպե՛ս չեմ կարող մոռանալ: Օ՛, մայ գաղ: Հա՛: Չեմ կարող մոռանալ: Ի՛նչ նշանակություն ունի՞ ո՞ր դարից է խոսում հետդ: Կարևորն այն է, որ հետդ մարդ է խոսում: Մարդկային կարեկցանքի հույս է քեզ ներշնչում, ներարկում: Այնպես է քեզ նեղում-անհանգստացնում, ինչպես անձնական անարգանք-անպատվությունը: Այնպես են օտարացե, ինչպես այլ մոլորակից հասած հնչյուններ: Խեղդում են: Ժանտահոտ սկանդալների ձայներ են տարածել: Սողոմզոմորացած աչքերի

թարթումներ: Օտար մեղեդուն հարմարեցված վրացական գորսալիզմ: Խռպոտ խոսափողներից: Աննկարագրելի պատվախնդրություն՝ ամբիցիոզություն: Մենություն: Մենություն: Եկեղեցու խորքում մենակ՝ սրբապատկերի առաջ: Եկեղեցու մուտքի մոտ՝ մուրացկաններ: Քո վրա փլված կյանք: Ֆշշացող: Քսի տվող: Քիչ է մնում շորդ վրայիցդ հանեն: Կոկորդի մեջ՝ արցունք: Աչքդ ինձ ընկավ: Ինձ տեսար: Իմ ձայնից է կախված երկրի փրկությունը: Դու քո ձայնը տուր: Մնացածն իմ գործն է: Դու քո ձայնը տուր, թե չէ՝ էն ոչուփուչն արդեն օգտվել է իմ կարգախոսներից և էլեկտրատի իմ բաժինը կարագի պես հարե: Չայն տուր, եթե ոչ՝ քո մեղքով այս երկիրը կկործանվի: Իմ մեղքը: Իմ հանցանքը: Այնուամենայնիվ, համակարգն ինձ քարշ տվեց: Քարշ տվեց, որովհետև ուժերս չբավարարեցին: Թույլ դուրս եկա, չդիմացա, և դրան նպաստեց նաև այն, որ ջրապտույտ է, ու երբ մեկը քեզ տանում է, նա նաև կքաշի-կհրի: Հենց Թբիլիսիում խնայած երկուլարիանոցներով՝ դեպի էրզնեթի: Հետո, ետդարձի ճանապարհին՝ Թբիլիսի գալիս, բաժանում ես այս երկուլարիանոցները՝

մեղքի այս շատ փոքր թղթերը, որոնք և՛ քեզ, և՛ բլրկպոստերում պարապ-սարապ կանգնած ուտիկաններին վերածում են նույն համակարգի հարազատ զավակների: Կեղծիք: Կեղծիք: Կեղծիք: Այն ժամանակ էլ էիր այսպես կանգնած: Ոչ թե այսպես, այլ դրա համար: Կեղծիքին հետամուտ: Կեղծիքին հանձնված: Վերջին դատաստանի սպասման մեջ: Միալար անձրևի տակ: Մենակ: Աչքին անհասանելի անծայրածիր ծովում միակ շոգենավին աչքերդ հառած: Հենակես: Իմ հենակետը հանուն գոյության պայքարն է: Այսպես վարվեցի: Նախկինների հասարակության մեջ այս տեղն ընտրեցի: Ըստրեցի՞, թե՞ բաժին ընկավ: Ի՞նչ նշանակություն ունի: Կարևորն այն է, որ ես անկարող եմ: Ծանր է մեղքը: Իմ լռության մեջ հիմա մեղքով ծանրացած մարդու հոգեբանություն է: Իսկ առաջ այլ կերպ էր: Ե՛րբ: Չգիտեմ: Վաղուց: Գուցե և մինչև իմ ծնվելն է: Գուցե հեռավոր անցյալում: Այո՞: Կար: Ծարժում: Ծարժում՝ լռության մեջ: Հեքիաթային գույների հորձանք: Հեքիաթային ձայների, որոնք վերածվեցին հոգնածության: Հայացքը՝ մշուշված: Պղտոր հայացքը՝ խեղճացած: Նստած է մի



հարցրեց ջուկի հրամանատարը: Չգիտեմ ասաց Վախոն, իմ բատինկաները մնացին Կիրովի այգում, հո մի բանով պիտի հիշե՞մ, որ վրացու վրա երբեք չկրակեմ: Ջուկատի հրամանատարը ծիծաղեց ու հագավ Վախոյի հին, կրունկները մաշված կոշիկները: Տուն էլ դրանցով գնաց: Ո՛չ: Տուն մեքենաներով գնացին: Դրա համար էլ տրտնջալու հարկ չեղավ: Հաջող՝ ասաց Վախոն, երբ նրանց ճանապարհեցինք, — մինչև մյուս պատերազմն ինձ էլ չեք տեսնի: Ծիծաղեցին: Համբուրվեցին: Թեև Վախոն իրոք հեռացել էր նրանցից: Հետո եկան սովի ժամանակները, անհաց վիճակ, հացի հերթեր: Վախոն որոշեց մի մեծ գործ ձեռնարկել: Վախոն իրենից դուրս է: Հենց սովի ժամանակ էլ որոշեց ինչ-որ բացառիկ բան անել: Այդ ժամանակ էլ իմացավ, որ ինչ-որ մարդիկ վաճառել են իրենց երիկամներն ու լավ փող են շինել: Այս մտքից Վախոն կսկծու եղավ: Հիվանդացավ: Ես էլ էի ուզում երիկամ վաճառել, բայց ի տարբերություն Վախոյի, ոչ թե գործ սկսելու, այլ պարզապես գոյությունս պահպանելու, հեռուատացույց նայել կարողանալու համար: Հետո Վախոն ինձ ծանոթացրեց չղախ Նանայի հետ:

Որտե՞ղ հանդիպեցինք: Մարջանիշվիլու մետրոյի մոտ: Մարջանիշվիլի: Մարատ: Մայակովսկի: Մենդելսոն: Միցկեվիչ: Մորիլիո: Մամնե: Մանդելշտամ: Մուսաղիլնի: Միկոյան: Ի՛նչ կապ ունի Միկոյանը: Ծիծաղեցինք: Համաձայնվում ենք: Կամ Քեթինոն է գիջում ինձ: Կամ ես եմ գիջում Քեթինոյին: Քեթինոն ինձ ոչինչ չի ասում: Ես էլ Քեթինոյին ոչինչ չեմ ասում: Եվ կամ ի՛նչ պիտի ասեի: Գնում եմ երիկամս վաճառելու: Քեթի՞: Հա՛: Ծիծաղելի է: Վախոյի մեքենայի մեջ: Վախոն՝ դեկին: Ես՝ նրա կողքին: Երևաց: Երկար վերարկուով: Գոռոզ-գոռոզ: Մեղրագույն ներկած մազերով: Աջ ձեռքին՝ բռնակով ձեռնափայտ: Վերարկուն հին էր: Դա հեռվից էլ լավ նկատելի էր: Վախոն դուրս եկավ մեքենայից: Պատրաստական դիմավորում է Վախոյին: Ժպտաց: Չեռքը մեկնեց: Միասին եկան դեպի մեքենան: Բացեց ետևի դռնակը: Բա՛րև ձեզ՝ ասաց ու քաղցր-մեղցր աչքերով ժպտաց ինձ: Բարև ձե՛զզզզզզզզզզ: Այս «զ»-ի մեջ լսելի է ցանկություն: Հաճելի տպավորություն թողնելու ցանկություն: Ինչ-որ թախիժ զգացի: Գուցեև չզգայի, եթե այսքան գոռոզավարի չլիներ: Հետո

մեջքով շրջվեց: Նստեց մեքենայի նստատեղին: Մի ոտքը՝ դժվարությամբ տեղավորեց, մյուսը՝ հեշտ: Ձեռնափայտը դրեց ծնկներին: Դուռը փակեց: Ժպտաց: Նորից թախիծ զգացի: Եթե այսքան խոշոր ջիներ ու լավ տպավորություն գործելու համար այսքան ջանադիր, գուցեև չզգայի: Մեղրագույն ներկած մազեր: Քաղցր աչքեր: Մեծ կոճակներով վերարկու: Կանաչ: Մի քիչ մաշված: Բացահայտ՝ հին: Վարվում էր կախեթեցու պես: Հաճախ էր օգտագործում «անձնավորություն» բառը: Նա այնպիսի անձնավորություն է, որ... Ես այնպիսի անձնավորություն եմ, որ... Կամ՝ ես ի՞նչ պատասխան տամ այն անձնավորությանը... Ո՞ր անձնավորության մասին է խոսքը... Ինչ-որ մեկի, որի անունը չուլախ Նանան չի ուզում ասել: Ինչո՞ւ չի ուզում: Ինչո՞ւ չի ասի: Որովհետև նա • այնպիսի անձնավորություն է, որի անունը չի կարելի բարձրաձայն ասել: Որովհետև չուլախ Նանան բազմաթիվ խորհրդավոր գործարքների մեջ է: Փողային հաշիվների մեջ: Դեռևս այն ժամանակ, երբ այս երկիրը հաստատված էլ չէր աշխարհի քարտեզին, չուլախ Նանան լայն

գործունեություն էր ծավալում Կովկասյան բիրժայում: Վարկ: Կուպոն: Դոլար: Տոկոս: Չուլախ Նանան արտասահմանում աշխատանք փնտրողների համար վիզաներ է սարքում: Չուլախ Նանան հիմա ամեն ինչ անում է, որովհետև մի անխիղճ-անաստվածի պատճառով ահագին պարտք ունի, իսկ չուլախ Նանան այնպիսի անձնավորություն է, որ ավելի լավ է մեռնի, քան թե պարտքը չվերադարձնի: Մեզ հետ ամեն ինչի մասին խոսում է երիկամից բացի: Վարկ: Տոկոսով պարտք: Այն ինչ-որ անձնավորությունների մասին, որոնց հետ նա ծանոթ է իր բոլոր գործարքների բերումով, ու նրանք բոլորն էլ չուլախ Նանային ահավոր հավատում են: Վախոն հիշեցնում է, թե ինչի համար ենք եկել: Ա՛ա՛ա՛, երիկամ, - ասում է չուլախ Նանան: Մի տեսակ է ասում: Մի տեսակ չուզելով խոսել այդ մասին: Փողի շահավետ փոխանակում է առաջարկում մեզ: Դրանից հետո ամերիկյան սիգարետների մեծ պարտիայից է խոսում մեր հետ: Նա ինչ-որ տեղից կարող է ծարել շատ էժան գնով: Ես ու Վախոն ուզում ենք վաճառել մեր երիկամները: Ես ու Վախոն մի-մի երիկամով էլ կապրենք՝ յուր

կգնանք: Իսկ ի՞նչ կարժենա երիկանը: Երիկանը,- ասում է չղախ Նանան: Այդ մասին առայժմ ոչինչ ասել չի կարող մեզ: Բայց երևի իմացել է, որ յուրաքանչյուրիս կմնա հինգ հազար դոլար: Հինգ հազարով մեծ գործ չես սկսի: Ինչո՞ւ հինգ հազար: Բա ինչքա՞ն: Տա՛նք: Ոչ: Հենց՝ հինգ: Որովհետև այն անձնավորությանն էլ հո ինչ-որ բան պիտի մնա, չէ՞: Ով պիտի գլուխ բերի այս գործը: Ի՞նչ անձնավորություն: Սա արդեն չի ասի Չղախ Նանան: Որովհետև նա այսպիսի անձնավորություն է, որ... Ոչ թե մեզ չի վստահում... Վստահում է, բայց դե... Բոլոր դեպքերում, էլի... Բայց գոնե այն ասի չղախ Նանան, թե որտե՞ղ են ուզում մեր երիկամները: Երևի գիտի, որ Մոսկվայի մասնավոր կլինիկաներում են ուզում: Մաքրություն: Տեր-տիրություն: Հոգածություն: Մտունդ: Վերակենդանացման շրջան: Հետև էլ յուրաքանչյուրիս՝ հինգ-հինգ հազար դոլար: Հինգին գումարած հինգ հավասար է տասի: Հետո չղախ Նանան առաջարկում է աշխատանքի մեկնել արտասահման: Հոլանդիա: Բելգիա: Գերմանիա: Իսկ սրա համար չղախ Նանային անհրաժեշտ է որոշակի գումար: Ես ու

Վախոն այն կողմ անցնելու փող չունենք: Ես ու Վախոն այս կողմում ենք սպասում փողի, որովհետև երկուսս միասին չորս երիկամ ունենք և պիտի զիջենք չորսից երկուսը: Ես երբեք չեմ մտածել, որ երիկամ ունենք: Երևի այն պատճառով, որ նա ինձ երբեք չի անհանգստացրել: Դրա համար էլ ինձ իշխեց տհաճ զգացողություն: Կարծես թե մեկին դավաճանում էի: Ո՞ւմ էի դավաճանում: Ո՞ւմ... Իմ երիկամին: Իսկ երիկամս ինձ երբեք չի դավաճանել: Իմն է եղել միշտ, հիմա ուրիշի՞նը պիտի դառնա: Այսպես անմեղ, այսպես անպրորբեմ ու այսպես սուսուփուս: Այսքան հավատարիմ ու գործունյա, այսքան աշխատունակ: Հետո չղախ Նանան թերթեց իր մաշված ծոցատետրը, մեր հեռախոսահամարները գրեց, հենց նույն տեղում գիծ քաշեց ու մանր տառերով գրեց՝ երիկամ: Մոսկվայի մասնավոր կլինիկա՝ պիտի գնաս, իմ լավ երիկամ: Մաքուր, ծեփ-ծերմակ սավանի, մանրանիվ պատգարակի վրա պառկած՝ քեզ վիրահատարան են գլորում: Վիրահատարան: Նարկոզից մշուշվում են աչքերս: Հետո՝ հիվանդասենյակ: Հոգատար բուժքույրերի հսկողության տակ:

Հինգ հազար դուլարի սպասման մեջ: Կողքի շրջված պատկած: Բայց արդեն առանց երիկամիդ: Ես ու երիկամս իրար ձեռքով անում, մնաս բարով ենք անում: Ես ու երիկամս բաժանվեցինք որպես փայտտերեր: Երիկամս ինձ պարտք մնաց հինգ հազար դուլար: Փակեց հաշիվն ու իր ծամփով գնաց: Երիկամս օրինապահ բիզնեսմեն է: Նա հո մենակ իմ հետ չփակեց իր հաշիվը: Նա հաշիվը փակեց նաև չուլախ Նանայի հետ, նաև այն անձնավորության հետ, որի անունը չի ուզում բարձրաձայնել չուլախ Նանան: Մինչև մեքենայի դուռը բացելը, մի անգամ էլ հիշեցրեց իրեն: Հանկարծ աչքերի մեջ ինչ-որ շող պսպղաց՝ տղաներ, տղաներ, - իրար անցավ միանգամից, - Վակենում 5 սենյականոց բնակարան ուզողի տեղ հո չգիտե՞ք: Ձե՛, քայքատոնո Նանա, մենք, մեր երիկամներինը չլինի, ես ու Վախոն էլ լուրջ բիզնեսմեններ ենք: Ու երբ պատրաստվում ենք երիկամ վաճառել, մակերություն չենք անում: Դե լավ, ուրեմն կապի մեջ կլինենք: Հեռախոսով: Հետո բացեց մեքենայի դռակը: Դժվարությամբ առաջ քաշվեց: Ձեռնափայտին հենվեց: Ոտքը մարմնից դժվարությամբ առաջ

տարավ: Հետո նորից փվեց մեքենայի փափուկ նստոցին: Ձեռնափայտին ավելի լավ հենված: Ավելի նպատակամետ, ավելի վճռական: Ավելի վստահ առաջանցումով: Մեծ կոճակներով վերարկուի մեջ մի տեսակ ինքնաբավ, գոռոզ տեսք ստացավ: Հետո կռացավ: Ժպտաց մեզ: Ձեռքով արեց մեզ և արժանապատիվ կաղությանբ անցավ փողոցը: Անցնում էր, և այդ պահին մի անբացատրելի լուռ թախիժ էր ուղեկցում նրան: Այդպես բարձրահասակ ու գոռոզ որ չլիներ, երևի չզգայի թախիժը: Ու վերջ: Կորավ րազմության մեջ: Վախոն մեքենան լարել չի շտապում: Ինչպես ես, նա էլ հայացքը հառել է փողոցին: Սա, - ասում եմ ես, - ինչպես երևում է, ինքն էլ հաճույքով կվաճառի իր երիկամը: Վախոն ասում է, որ նրան էլ կօգտագործի, ով իրեն ցույց է տվել չուլախ Նանայի մոտ տանող ճանապարհն ու նրան էլ կքաշի գործի մեջ: Այնուհետև Վախոն լարում է մեքենան: Մենք գնում ենք: Այդ կնոջը տեսնելուց հետո մի զարմանալի միտք է համակել ինձ: Ո՛չ: Ո՛չ թե միտք, այլ հավատ առ այն, որ ես ինչ-որ բան ունեմ: Որ ես ինչ-որ մի բանի տեր եմ: Որ իմ մարմնի մի որոշակի մասն

ինչ-որ գումար արժե: Խենթի հոյս: Այո՛: Հարավոր է՝ խելագարի հոյս է, բայց հոյսն, այնուամենայնիվ, հոյս է: Հույսը յուրօրինակ բալասան է: Չսայած հենց սկզբից էլ պարզ էր, թե ում հետ գործ ունենք, բայց, այնուամենայնիվ, ինչ-որ բան փոխելու սպասումով եմ համակված: Հենակետ: Հենակետ: Հենակետ: Իմ հենակետն իմ ամենօրյա սպասումն է: Թեկուզև այն բանի սպասումը, որ մի գեղեցիկ օր էլ չուլախ Նանան կզանգի ինձ, քաղցր-մեղցր, ծորուն ծայնով կհարցնի որպիսությունս, սպա և կավետի, որ այն անձնավորությունն ամեն ինչ կարգավորել է: Ինձ չի էլ հետաքրքրի, թե ով է այդ անձնավորությունը: Կարևորն այն է, որ գործը գլուխ է բերել: Երիկամներ վաճառողների բազմահագարանոց բանակի մեջ ընտրել են հենց իմ ու Վախտի երիկամները: Ինչո՞ւ: Որովհետև ես ու Վախտն իրոք աշխատունակ, առողջ ու անսակարկ երիկամներ ունենք: Երբ այսպես եմ մտածում, իմ երիկամը դեռ ինձ է պատկանում, դեռ իմն է: Դեռ նրան չեմ լքել: Դու հիմա ասա՛, թե խելագարի հոյս: Բայց մեկ է՝ հույսը հոյս է: Քեթինոն բզբզում է իր նոտաների տետրը, սակայն

ես զգում եմ, որ նա ալեհավաքի նման որսում է ինձնից ճառագայթվող հույսը: Նման պահերին Քեթինոյի հայացքը փափկում է, ու նա դառնում է առաջվա Քեթինոն: Այս երեկոն իմ ու Քեթինոյի ծմեռվանից փախցրած երեկոներից մեկն է: Ինձ հիմա չի հետաքրքրում երկու հակոտնյա կուսակցությունների քաղաքական գործիչների շաղակրատանքը: Ես հողաթափերը չեմ շարտում հեռուստացույցի ուղղությամբ: Չեմ հայիցում: Դեմքս չեմ ծռռոում: Ես հիմա սրտանց ծիծաղում եմ: Ծիծաղում է և Քեթինոն: Որովհետև նա իմ ծիծաղից կեղծիքի նոտա չի որսացել: Քեթինոյի համար սա էլ բավական է, որ դրանով նմանվի առաջվա Քեթինոյին: Ինձ մինչև վերջ վստահող Քեթինոյին: Քեթինոյին հարցնես, նա հիմա էլ է ինձ ապավինում: Բայց ես գիտեմ՝ սա ուրիշ ապավինություն է: Ոչ թե ապավինություն, այլ ինչ-որ բան հավատացնելու միջոց: Այո՛, բատոնո՛, ոնց կասես: Լա՛վ: Թող այդպես լինի: Ադպես լինի, ու նույնիսկ այդպես է: Փլվում եմ բազկաթռոյի մեջ: Հայացքս՝ հեռուստացույցին հառած: Հետն էլ լուռ հոյս եմ ճառագայթում, որը Քեթինոն ալեհավաքի պես

անմիջապես որսում է: Մեկ էլ հանկարծ անհուսության կնճիռներով է ակոսվում ճակատս: Բայց դարձյալ՝ հայացքս հեռուստացույցին: Սրանց շաղակրատանքին: Սրանց անպատկառությանը: Անգթությանը: Իրենց ժշմարտության մեջ՝ խորապես համոզված և վերամբարձ կոմերիտական բառերի ոգևորությունից փայլող աչքերին հայացքս հառած: Հետո, երբ որևէ մեկը շատ է չափն անցնում, ես ամոթից կախում եմ գլուխս: Ուստի և ջղանությունից ծեռքով ճանկոում, ծոմոում եմ դեմքս: Այն օրն էլ ահա այսպես նստած էի, երբ Վախոն եկավ: Ե՞րբ էր: Վերջերս: Վերջերս: Հենց ներս մտավ, անմիջապես զգացի, որ մի բան կա: Մի տեսակ թափառ հայացք ուներ: Մի քիչ խոսեցինք: Վերջում պարզվեց՝ ինչու է եկել: Ընտրությունները մոտենում են: Քաղաքական մի կուսակցություն հետաքրքրվել է իմ անձով: Ո՞նց որ, Վախո՛: Իբր ես էդ ի՞նչ մի անձնավորություն եմ, որ... Ասում ու չղախ նանային եմ հիշեցնում: Դրանով ուզում եմ ասել, որ լեզուն ատամների տակ պահի: Վախոն իրար է խառնվում: Ջղայնանում է: Ի՞նչ կապ ունի այստեղ չղախ նանան: Այդ կնոջ հետ

հանդիպումից անցել է տասը-տասներկու տարի: Ինչո՞ւ չեմ կարողանում մոռանալ: Չղախ նանան հանձնվել է անցյալին: Աստծու ողորմածությամբ մեր երիկամներն էլ էլի մեզ հետ են: Մեզ են պատկանում: Եվ, ընդհանրապես, արդեն ժամանակն է, որ ինչ-որ բան փոխենք մեր կյանքում: Առաջ չես գնա, եթե որևէ լուրջ ուժի չապավինես: Էս տարիքի մարդիկ՝ մինչև ե՞րբ պիտի քարշ գանք Էրզնեթիի տոնավաճառում: Ինքն արդեն ամաչում է դրանից: Մի՞թե ես կորցրել եմ ամոթի զգացումը: Ինձնից բեթար նա չի տանում էդ բոզությունը: Լավ, Վախո: Ասա՛, ախպեր, լսում եմ: Ասում եմ ես: Վախոն ինձ է նայում կասկածոտ աչքերով: Վախոյին թվում է, թե իմ կողմից ասած «ախպեր» բառի մեջ հեզնանք կա, ու դրանից շատ է վրդովվում: Մե՛ժ բան. մի երկու խոսք էլ ասեմ է՛ն կուսակցության մասին: Մի քիչ էլ թող գովեմ, ի՞նչ կպատահի, որ... Մարդիկ, տե՛ս, ինչ բարի աչքով են նայում ինձ: Փող իհարկե չեն տա: Բայց գործի համար պետքական մարդիկ են: Թեև փող տալն էլ բացառված չէ, որովհետև նրանք փնտրում են ուղղակի լավ իմիջ ունեցող մարդկանց: Իմիջ: Իմիջ: Իմիջ:

Ո՛վ է քեզ սովորեցրել այդ բառը, Վախո՛ւ: Վախոն ավելի է կատաղում: Նա ինձ ասում է, որ ես երեկվա մարդ եմ: Ավելին: Երեկ չէ առաջին օրվա: Ես համաձայնվում եմ Վախոյի հետ: Իսկապես երեկվա: Ո՛չ: Նախանցյալ օրվա: Դրա համար էլ ասում եմ՝ Վախո՛ւ, ա՛րի կլինի դու ինքդ մի բա՛ն ասա էդ կուսակցության մասին: Վախոն ուսերն է թոթվում: Եթե իրենով լինեին հետաքրքրված, այդ դեպքում ինչո՞ւ կգար ինձ մոտ: Նրանք հենց գրող են փնտրում: Իսկ ինքը՝ Վախոն, կյանքում պատնվածք գրած չկա: Նա միայն կովել է: Պատերազմել է: Իսկ նրանց ինչ-ներին է պետք ռազմիկը: Այն էլ այնպիսի ռազմիկ, որը պարտվել է երեք պատերազմում: Այդ կուսակցությունից մի ակտիվիստ կին է ինձ հիշել: Այդ քալբատոնին էլ գրող է: Վաղուցվանից է ինձ ճանաչում: Առաջ մեթոդիստ էր Արվեստի ստուդիայում: Հետո անգործ մնաց: Ու ահա սկսել է մելոդրամներ գրել: Հիմա մի հեռուստաընկերություն նրան պատվիրել է նաև սերիալներ գրել: Բայց կարևորն այն է, որ ինձ հիշում է ու համարում, որ ինձ նման մարդն աղբարկղերից կախվելու համար չի: Վախոն ասում է, որ իմ

բարօրությունը կախված է այս հանդիպումից: Վախոն շատ է փոխվել: Որովհետև նրա հայացքի մեջ ես երբեք չեմ նկատել այսպիսի կեղծիք: Ես հեռվից էլ լսում եմ նրա ձայնը: Ես մտածում եմ այն մասին, որ այս հասարակությունն իսկապես նախկինների հասարակություն է: Եվ ականջիս մեջ ընկած բառն ավելի է ծակում: Աղբարկղի վրա: Աղբարկղի վրա: Աղբարկղի վրա: Կոլտնտեսային շուկայի դիմացի տարածքում՝ երեք միանման կրպակներ: Միանման թարեքներին՝ միանման ապրանք: Լեյլան: Մական: Դարեջանը: Ես՝ իմ մեծ մեշոկով: Ո՛ւմ մոտ: Լեյլայի կրպակում: Տրտնջում է: Տրտնջում է: Հայացքը փողոցին: Երկաթի ոչ շատ մեծ աղբարկղ: Հենց այստեղ՝ մի վտիտ պառավ: Կանգնել ու ակնդետ նայում է արկղին: Սմքած: Սմքած: Չորուկ: Փստրող հայացքը հառած աղբարկղին: Հետո ձգվում է: Կանգնում է ոտնաթաթերի վրա ու նայում աղբարկղի մեջ: Ձեռքն իջեցնում է վար: Չի հասնում: Բռնվում է աղբարկղի եզրից: Ու կախվում է: Թափահարում է ոտքերը: Սրտաճմլիկորեն ճարպիկ է այս ծեր կինը: Աղբահավաք մեքենան առավոտյան կմտտենա

երկաթե ոչ այնքան մեծ աղբարկղին: Աղբը կթափեն մեքենայի մեջ ու կտանեն Մոխաթավերդիի աղբանոց: Վախոն: Վախոյի հին ժիգուլին: Արևախանձ, լերկ բլուրների համայնապատկերը և Մոխաթավերդիի աղբանոցը: Ապակե կոտրտված բանկաներով: Հավի մսից պոկոտած ոսկորներով: Լրագրի մեջ փաթաթած հիգիենիկ փաթեթներով: Կորիզներով: Չուլուփալասով: Ձեռքերը պոկած, աչքերը հանած տիկնիկների խուլ լռությամբ: Երկաթե մահճակալների այսուայնկողմ ընկած ճաղեր: Հին լրագրերի «ծածանում»: Գաղջ, նեխած օդից գլխապտույտ օրորվող մարդկանց այսուայնտեղ դեգերումներ: Սերմնագռավների երամի՛ մենության զգացողություն ներշնչող կռռոցներով: Ես: Վախոն: Վախոյի հին ժիգուլին՝ խոր ձմեռվա այլանդակ ակունքի մեջ խրված: Ե՛րբ ծնվեց այս տեսիլքը: Տեսի՛լք, թե՛ երագ: Երևի մեքենայի մեջ, մինչև աղբակնոց հասնելը: Հա՛, մեքենայի մեջ քնած ժամանակ հյուրընկալեց: Խավարի հեռավորությունից լույս տվող: Ճակատագրի համառությամբ ուղեկցող, վիթխարի կենդանու ողնաշարին նստած փոքրիկ

շիկահավիկ՝ երկար կտուցով ծիտիկ: Այս ու այնտեղ անասունի միս: Նա էլ սպիտակ ու անգոր: Փորի մոտ՝ կախված մտով, ոտքերի մոտ էլ: Իսկ ծիտիկը նստած է: Ժամանակ առ ժամանակ ծիտիկը գլուխը թափահարում է: Երկարակտուց: Կարմրադոշիկ: Փոքրիկ: Հետո տեսիլքը չքվեց, և ես հայտնվեցի աղբակոյտի վրա: Ես: Վախոն: Վախոյի հին ժիգուլին: Վախոյի հին ժիգուլին և Մոխաթավերդիի աղբանոցը: Թռավ սերմնագռավը, թռավ: Կռռաց: Տեղը փոխեց: Հայացքն անցավ սերմնագռավին: Մարդիկ: Մեկը նստել, սիգարետ է ծխում: Մյուսը քայլում է: Քայլում է երրորդն էլ: Դեգերում է: Գլխապտույտ գարշահոտից օրորվող, այսուայնկողմ դեգերող մարդիկ: Գլխանոցով բաժկոնով, քթին շարՖ կապած մարդը ձեռնափայտով քրքրում է աղբը: Ինչ-որ բան գտավ: Սկսեց տնտղել: Թողեց: Մեզ նայեց: Մեզ է նայում: Անծայրածիր, խոր ձմեռվա հատակին ընկած ջրաբույսերի պես ժլատ առաջ շարժվող: Մշուշի մեջ: Մշուշի մեջ: Մենք նույնպես: Մի բծով: Մշուշին հընթաց: Այն կողմում՝ մեքենա: Սպիտակ: Երկու կով: Մենք բլուրոս՝ ձմռան հատակին: Մշուշի մեջ: Մշուշի մեջ: Մեզ:

Նստածը վեր կացավ: Սիգարետը շարտեց: Գլխանոցով բաժկոնավորը նորից ձեռնափայտով քրքրում է աղբը: Այստեղ ի՞նչ գործ ունեինք: Վախոն նայում է աղբակույտին: Առանց աչքերը հեռացնելու աղբակույտից, պատասխանում է՝ դու չէի՞ր ասում, որ քեզ կտանեն աղբանոց: Պատասխանում ու լռում է: Նայում է աղբակույտին: Հիշվում է: Հանդիպում այն քալբատոնիի հետ: Ի՞նչ էր անումը: Հա՛: Մաքսիմե՛: Իսկ ինչո՞ւ տղամարդու անուն: Դու մի ասա՛ մականուն է: Ճակատին՝ դրած ակնոց: Սև շալվար: Ոտքը՝ ոտքին: Մատների արանքում՝ բարակ սիգարետ: Սպիտակ վզով սվիտեր ու վզին ստեղծագործական հնարանքով փաթաթած վարդագույն շարֆ: Նիհար: Թեթև: Հաճախ ժպտում է: Այդ ժամանակ երևում են կնճիռները: Ակնանկյուններում: Անհարմար էի զգում Մաքսիմե անվանել: Ժպտաց: Կնճիռները պարզ երևացին: Լավ բան մտածեց Վախոն: Այո՛, լավ: Այո՛: Ի՞նչ խոսք: Վերա թաղամասում: Մաքսիմեի ընկերոջ սրճարանում: Կանաչ մահուդապատ պատեր: Ոսկեգույն բռնակներ: Ինչ-որ կարմիր բան էլ են հիշում: Գուցե աթոռները: Չգիտեմ,

բայց նախասրահում ինչ-որ կարմիր էլ կար: Մաքսիմեն մեզ ասում է, որ Վրաստանում մելոդրամներ գրել չեն կարող: Ինչո՞ւ չեն կարող գրել: Մտղամը չգիտեմ՝ դրա համար: Մելոդրամային թեթևություն է պետք: Պարզունակ խարդավանք: Շատ սեր ու թեթևություն: Էս է ու Էս: Ուղեղ մաշելու հարկ չկա: Կյանքն այնպես է, ինչպես որ է: Ինչպիսի՞ն է կյանքը: Ճիշտ այնպիսին, ինչպիսին որ կա: Ա՛հա՛: Այո՛: Թեթև աչքով պիտի նայես, և այն էլ թույլ առ թույլ, ու կթեթևանա: Ինչի՞ն նայենք թեթև աչքով: Ինչի՞ն ու... Ամեն ինչին: Վախոն ժպտում է Մաքսիմեին: Վախոյի դեմքին երբեք չեմ տեսել այսպիսի ժպիտ: Վախոն չի կարող այն Վախոն լինել: Երևի ես էլ ես չեմ, որովհետև համաձայնվում եմ Վախոյի հետ: Հիմա սրճարանում ենք: Կանաչ մահուդաձածկ պատեր: Ոսկեգույն բռնակներ: Ինչ-որ կարմիր մի բան էլ՝ նախասրահում: Սուրճ ու նարնջի հյութ են բերում: Մաքսիմեն տնավարի ժպտում է մատուցողին: Աչքերի անկյուններում՝ կնճիռներ: Ցանկություն ջախելի պես անկաշկանդ երևալ: Ստեղծագործորեն վզին փաթաթած վարդագույն շարֆ: Սուրճը քաղցր է:

Կոկորդում քաղցրով կանգ առած: Նարնջի հյութ են վրայից ըմպում: Սա էլ է քաղցր: Սուրճի սառը քաղցրությունը հարվածեց կոկորդիս: Ինձ թվում է, թե իմ ձեռքերը քաղցրությունից շիրտովել են: Հիշում եմ՝ ձեռքով կպա ոսկերիզ բռնակներին: Երևի դրանք էլ քաղցր էին: Ինչո՞ւ: Ի՞նչ իմանամ: Այնուամենայնիվ, անհարմար եմ զգում Մաքսիմե ասել: Տեսնես ի՞նչ է խելքը փչել այսպիսի կեղծանուն դնել իրեն: Ժպտում է: Հեռուստասերիալն է մտածել տվել: Ո՞ր հեռուստասերիալը: Այ՛ էն, որտեղ գլխավոր հերոսը Նիկիտան է: Հիմա եմ հասկանում՝ բանն ինչ է: Քալբատոնո՞ Մաքսիմե, դուք իրոք նման եք քալբատոնո Նիկիտային: Հա՛, նման է, չէ՞: Հա՛, ինչ-որ բանով: Իսկապես նման է: Վախոյի կակածելի հայացքը՝ բա որ հանկարծ ինչ-որ մի բա՛ն: Սուրճը քաղցր է: Նարնջի հյութն էլ: Երկուսը միասին կանգ են առել կոկորդիս: Ձեռքերս էլ ասես շիրտովել են: Ինչո՞ւ: Չգիտեմ: Ինչի՞ եմ կպել: Չգիտեմ: Քաղցր է: Քաղցրի մեջ նստած սիգարետի հոտ: Ես ծխող եմ: Չի կարող պատահել, որ սիգարետի հոտն ինձ ջղայնացնի: Սակայն սա ուրիշ հոտ է: Քաղցրի մեջ նստած սիգարետի

հոտ: Ներծծված: Նա էլ է կպած, ասես սոսնձված: Հա՛, սոսնձված: Սոսնձված հոտ: Հսարավո՞ր է, որ հոտը սոսնձված լինի: Երևի հնարավոր է: Որովհետև այս սրճարանում այսպիսի հոտ է: Մաքսիմեի ստեղծագործորեն վզին փաթաթած շարֆը: Մաքսիմեի չարածճի միտքը և էֆեկտորեն ընտրված գրական կեղծանունը: Երևի ընկերուհիների հետ բամբաստյուց է այս գաղափարը ծնվել մեջը: Երևի ոգևորվել է իր հնարանքով ու գտածով: Սրամտությամբ: Հա՛, երևի: Մատների արանքում՝ բարակ սիգարետ: Ցանկություն՝ ստեղծագործության մասին զրուցելու: Այսպիսի անմիջականությամբ: Այսպիսի թեթևությամբ: Այսպես տնավարի: Հիմա ի՞նչ եմ անում: Ոչինչ չեմ անում: Ինչո՞ւ: Որովհետև: Ո՛չ: Այսպես չեն պատասխանում: Կմտածեն՝ անկիրթ եմ: Չգիտեմ ինչու ոչինչ չեմ անում: Այսպես չի կարելի, մի քիչ թեթև է պետք նայել կյանքին: Չպիտի ասելիք այդ բառը: Ամեն ինչ այս բառի մեղքով է: Երևի Մաքսիմեի ճակատին դրված ակնոցն էլ, ստեղծագործորեն վզին փաթաթած վարդագույն շարֆն էլ: Մինչև մեր հանդիպումը

Մաքսիմեն կանգնած էր հայելու մոտ: Է՛ն հագնեմ, թե՛ Է՛ն: Երևի սա ավելի հարմար է: Չէ՛: Է՛ն: Հա՛, Է՛ն: Սրա մեջ ավելի արտահայտիչ եմ երևում: Մաքսիմեի պես արտահայտիչ: «Էֆեկտնի»: Մելոդրամաների հեղինակի, ում բնավ անծանոթ չէ ինքնահեզնանքը: Ընդհակառակը: Գաղտնիքը բացվում է այն ժամանակ, երբ ինքն է հեզնում իր մելոդրամաները: Խելացի է: Հասկացավ, որ այս գործին անհրաժեշտ է թեթևություն: Հա՛: Երևի: Այն կուսակցության ակտիվիստությանն էլ թեթևություն է անհրաժեշտ, որի առաջնորդներն ինձ կրկին վերադարձնում են այնտեղ՝ միասնական, եղբայրական ընտանիք: Սաղավարտավոր զինվորները՝ թևնակների տափակ երեսով անխոցելի վահաններով՝ տղո՛ւ, տղո՛ւ, տղու... Մե՛կ, երկո՛ւ: Մե՛կ, երկո՛ւ: Մարդկանց կիսում են մեջտեղից: Իրարից: Հետո սրած վահաններով հատում են: Հատում են: Հատում են: Արյան հոտ եկավ: Նախասրահում՝ քաղցրի հետ մակարդված արյուն: Գիտե՛ս ինչ լավ մարդիկ են՝ հարցնում է ինձ Մաքսիմեն: Այո, գիտեմ: Գիտե՛ս, որ ժամանակը բուժում է: Հա՛, գիտեմ: Գիտե՛ս, որ նրանք ոչ մի կապ չունենին:

Հա՛, գիտեմ: Գիտե՛ս, որ հիմա գլուխդ թափահարում ես՝ ի նշան համաձայնության: Հա՛, գիտեմ: Գիտե՛ս, որ քաղցր սուրճը դեմ է անել կոկորդիս: Հա՛, գիտեմ: Գիտե՛ս, որ ծակատող սառը քրտինքով է պատել: Հա՛, գիտեմ: Գիտե՛ս, որ այս կյանքին թեթև պիտի նայես: Հա՛, գիտեմ: Գիտե՛ս, որ Մաքսիմեի ակնոցն ըսկել է հատակին: Հա՛, գիտեմ: Գիտե՛ս, որ վարդագույն շարֆի վրա բիծ է թողել բերանիցդ դուրս թած սուրճի կաթիլը: Հա՛, գիտեմ: Գիտե՛ս, որ շփոթված Մաքսիմեն հա մի գլուխ կրկնում է՝ ոչի՛նչ, ոչի՛նչ: Հա՛, գիտեմ: Գիտե՛ս, որ սրճարանից հեռացրել ես ձմեռվա ցուրտը և օդը բռնել, պոկոտել ես ատամներով: Հա՛, գիտեմ: Գիտե՛ս, որ երեսը շիկնած վախոն լարում է մեքենան և հարցնում քեզ՝ ի՛նչ պատահեց քեզ, տո՛՛ մոռնողիկ: Ի՛նչ է պատահել ինձ: Ոչինչ էլ չի պատահել: Սուրճը շատ քաղցր էր: Նարնջի հյութն էլ: Սիգարետի ծանր հոտը նստում էր սրճարանի մահուդապատ պատերին: Ինչ-որ կարմրի վրա էլ: Ոսկեգույն, կլորավուն բռնակներին էլ: Բռնակներին չի կարող նստել սիգարետի հոտը: Հա՞՞: Հա՛, անհնար է: Այդ դեպքում չգիտեմ՝ ինչ է ինձ

պատահել: Կամ էլ՝ գիտեմ: Սրտխառնոցի իրավունքից օգտվեցի: Ես կշտամբելու կամ պահանջելու իրավունք չունեմ, բայց սրտխառնոցի իրավունք ունեմ: Վախոն լոում է: Ես էլ: Եվ հետո ես ինքս էլ չգիտեմ՝ ինչու եմ հարցնում ակնոցը հո չկտորվեց: Ակնոց ես փնտրելու: Ոչինչ էլ չեմ փնտրի: Օղի եմ ուզում: Օղի Վախոն էլ է ուզում: Մանրեագերծման համար: Մանրեագերծման նման: Հա՛: Այսպես ենք ուզում: Վախոն մեքենան կանգնեցնում է խանութի մոտ: Վախոն գնում է մեկ շիշ օղի: Պլաստմասե բաժակներ: Հաց ու երշիկ, որը հենց տեղում անմիջապես կտրատել է տալիս վաճառողին: Վախոյի մոտ էլի փող է մնում: Դրա համար էլ երկրորդ շիշ օղին ու մանանեխ է գնում: Վախոն փող չունի: Փող ես էլ չունեմ: Ես ու Վախոն նստում ենք մեքենայի մեջ: Դիդի Դիդոմի գնացող մայրուղու վրա կանգնեցնում ենք մեքենան և բացում օղու շիշը: Մաքսիմեի մեյնուն հե՛րն եմ անիծել՝ ասում է Վախոն: Աչքով է անում ինձ: Պլաստմասե բաժակը խփում իմ պլաստմասե բաժակին ու մի կումով խմում: Ես էլ եմ խմում: Հետո Վախոն ծիծաղում է: Հինգ դոլարանոց պոռնիկներից միշտ

սրտխառնուք եմ զգացել: Ասում է Վախոն: Հա՛, երևի դրա մեղքն էլ է: Չգիտեմ: Երկրորդ բաժակն էլ եմ խմում: Հացի վրա քսած մանանեխն ու երշիկն ենք ներս տալիս: Մանրեագերծումը սկսվեց, որովհետև ինչ-որ բան մաքրվեց: Վախոն էլ առաջվա նման ծիծաղում է: Թեև երրորդ բաժակից հետո կծկվում է և ասում՝ չեմ կարող ներս քաշել, չեմ կարողանում, կրկնում է նորից՝ երևի փախչենք-գնանք այստեղից: Հիմա դեպի ինձ է շրջում դեմքը: Ո՛ր պիտի փախչենք, Վախո՛՛ հարցնում եմ ես: Միևնույնն է՝ ասում է Վախոն: Հոլանդիա: Բելգիա: Գերմանիա: Չէ՛: Ես ինձ այս երկրից բացի ոչ մի տեղ չեմ պատկերացնում: Պատասխանում եմ ես: Այստեղ հո լա՛վ ես պատկերացնում քեզ՝ հարցնում է ինձ Վախոն: Հա՛ ասում եմ Վախոյին: Այստեղ գոնե այն եմ զգում, որ մարդ եմ ես: Վախոն զարմացած ինձ է նայում: Երբ մարդու համար երիկամի վաճառքը ավելի հեշտ է դառնում, քան հոգու վաճառքը, սա նշանակում է, որ մարդ ես՝ ասում եմ ես: Վախոն ցուցամատը դնում է քունքին և ասում, որ ես գիժ եմ: Էս կյանքից բան չհասկացա: Բառասունին մոտ մարդ՝ երկրորդ կուրսի

ուսանողի գաղափարներով եմ ապրում: Հետո էլի ծիծաղում է: Մարդը, ծիծաղելով ասում է վախո՛ն, հենց սրանով էլ տարբերվում է կենդանական աշխարհից: Մարդու կենացը: Բաժակը բաժակիս է խփում: Հետո ակնդետ նայում է ինձ ու հարցնում՝ տեսնես եթե ակտիվիստ Մաքսիմեին գաղափարապես հակադիր մի ուրիշ ակտիվիստի տեսնեմ, նրանի՞ց էլ սիրտս կխառնի: Գաղափար: Գաղափարական: Գաղափարականացած: Ես չգիտեմ՝ ինչի՞ գաղափարակիր եմ կամ արդյոք գաղափարականացված եմ ընդհանրապես: Երևում է՝ գաղափարակիր եմ, այո՛, ե՛մ, բայց ինչ-որ բան ինձ գրգռում է սրտխառնուքի աստիճան: Գուցե ջղերիս մեղքն է: Հա՛: Գուցե ես ջղեր եմ: Եթե այդպես է, իմ ջղերը մի մարդու ջղեր են: Իսկ իմ հիշողությունը մի մարդու հիշողություն է: Ես կամ: Միս-մարմին ու հոգի: Մսին-մարմնին հաճելի չէ պլաստմասե բաժակով բենզինի պես ծանր օդին խմելը, սակայն հաճելի է, երբ օդու հետ միասին սև հացին մանանեխ քսած երշիկ է ներս տալիս: Հոգուն հաճելի է, երբ հարբածի համառությամբ հավատում է, որ ինքը դեռ մարդ է: Գուցե հենց «մարդ»

բառը որոշակի գաղափարախոսություն է: Գուցե մարդ են նպատակն էլ, հետևանքն էլ: Եթե այդպես է, այդ դեպքում սա նրա գաղափարախոսությունն է, ով մարդուն ստեղծել է ու հնարել: Այս դեպքում ես հիշում եմ, որ իսկապես տիեզերքի մի մասնիկ եմ: Իզուր են մտածում, որ գիսավոր աստղերը երկրագնդի վրա չեն ընկնում: Ինչպե՛ն չէ: Հենց մայր հողի վրա էլ ընկնում են: Ինչ-որ կոնկրետ տեղում, որն առաջին հերթին սեփական օջախ են անվանում, ապա և՛ սեփական հայրենիք: Ես այստեղ եմ ընկել: Ես երբեմն հայացքս հառում եմ դեպի հիշողություն, երբ նորապսակ մայրս ու հայրս, կայարանի ռեստորանում նստած, գինի էին խմում: Ծնողներս հաճախ էին գալիս այստեղ, որպեսզի այն զգացողությունն ունենան, թե ինչ-որ տեղ են ճանապարհորդում: Հայրս գինին խմում էր կում-կում՝ ապակյա բարձր, երկար շշից: Մայրս սիրահարված աչքերով նայում էր հորս: Հետո, երբ ինչ-որ գնացք էր շարժվում, ծնողներս նայում էին նրա ետևից: Մարդիկ արդեն տեղավորվում էին իրենց նեղ վագոնախցերում: Մեկը ճամպրուկ էր տեղավորում վերևի թարեքին: Մեկի մոտ էլ

հենց նույն պահին ուտելու ախորժակն էր բացվում, և հանպատրաստից ընթրիքն էր հանում պայուսակից: Մի ուրիշն էլ, պատուհանի մոտ նստած, այնպես զարմացած ու հիացած էր նայում կայարանին, որ կմտածեիր, թե իսկի կայարան էլ չի դեմը ու կյանքում առաջին անգամ է գնացք նստում: Հետո հայրս փակում էր հաշիվը, և ծնողներս, ռեստորանից դուրս գալով, պայմանավորվածության համաձայն, լուռ գրոսնում էին կառամատուցով: Իսկ ես երկնքից հետևում էի նրանց, քանզի գարունով ներծծված օդը և գնացքների սուր հոտն ինձ արդեն զգացնել էր տալիս, որ մոտ է ժամը: Հետո ես տեսա պոչն իրեն քաշած մի ոչ ազնվացեղ շուն, որը մի քիչ ծուռ-ծուռ վազում էր կառամատուցով: Կարծես թե կույր լիներ: Կամ ինչ-որ մեկի կողմից ղեկավարվող: Նա շատ մոտիկից անցավ մորս կողքով: Ինձ նույնիսկ թվաց, թե կպավ մորս ոտքին, և սրանից ինքն էլ վախեցած՝ է՛լ ավելի սրեց ականջները: Է՛լ ավելի քաշեց պոչը, քայլերն արագացրեց ու կորավ աչքից: Մայրս վախեցած հպվեց հորս: Հայրս ծիծաղեց: Հետո մայրս էլ ծիծաղեց: Կանգնել ու ծիծաղում էին: Մայրս ձեռքը

դնում էր կրծքին: Հորիցս ավելի շատ էր ծիծաղում: Հետո հայրս ձեռքով արեց, փաթաթվեց մորս, մի քանի քայլ արեցին, նորից պայթեց ծիծաղը, և երբ մի քիչ հանգստացան, զարմանալիորեն միաժամանակ վերև նայեցին: Ես հասկացա, որ եկել է ժամը, և տեղիցս շարժվեցի: Մինչ իմ ծնողներն այսպես միասին կնայեին դեպի երկինք, ես հաճախ էի մտածում, թե ինչպիսին պիտի լինի սլացքը: Մեծ: Որոշակի: Գլխապտույտ առաջացնող: Գլխապտույտ բերող հստակություն, որի մեջ միասին ու պայծառ պտտվեցին աստղերը, ծովերը, սառցալեռները, անտառները, լեռները, գյուղերը, շների վնասոցը, րվեժի թախծոտ մեղեդին, ծառին կույուհուպ սկյուռի երկյուղած աչքերը, դաշտերը, քաղաքները, դեպի ինձ ժլատ ոգևորությամբ ձգված ձեռքերը, որոնք փամփուշտի պես ուղեղիս մեջ էին շամփրում տարբեր ցանկություններ: Ես մի կողմ նետեցի բոլոր ցանկությունները, քանզի ես տեսա մորս երջանիկ դեմքը և հորս անխոս աչքերը: Ես գիտեի, որ այնժամ նրանք ինձ պահեցին որպես երազանք, ու դրա համար էլ ես կայացա: Դրա համար էլ ես մարդկային դեմք

առա: Դրա համար էլ վայր ընկա այստեղ: Այս երկիր: Այս քաղաք: Վերայի՛ վրա: Կալանդան լիողոց, թիվ քսաներկու տան մեջ: Երկրորդ հարկում կառուցված երկաթե գողտրիկ պատշգամբի վրա կախված բարձրուղեջ չինարին ասես անտեսանելի էր դարձնում տունը, սակայն ես, այնուամենայնիվ, նկատեցի այն: Նկատեցի, որովհետև տերևների վրա էր սփռված լույսի շողը, և այդ լույսը այնպե՛ս տաք էր, այնպիսի՛ խաղաղ ինքնավստահությամբ ինձ սպասող և այնպե՛ս իմը, որ անկարելի էր, որ չնկատեի: Իմ աստղը,–ասաց մայրս: Ես հասկացա, որ նա ամենաառաջինը ծանաչեց ինձ և դրա համար էլ նրան անվանեցի մայրիկ: Հայրս ժպտալով նայում էր ինձ: Մայրս մեկ ինձ էր նայում, մեկ՝ հայացքը հառում հորս: Ոռի համը հանած իմ տղեն,– կատակեց հայրս, հետո նախ մորս համբուրեց, ապա՝ ինձ: Այնժամ ես հասկացա, որ նա իմ հայրն էր ու դրա համար էլ անվանեցի հայրիկ: Ցույց տվե՛ք, այ՛ մարդ, հլը մի ցույց տվե՛ք,–ասաց պապս: Մայրս ու տատիկս բարուրս քանդեցին: Պապս ոտքերիս արանքը խրեց իր արծվաքիթը և ագահորեն հոտ քաշեց ինձնից:

Այնժամ ես լաց եղա, որովհետև. պապիկիս բեղերը ծակեցին ինձ: Մի մատ երեխա է դեռ՝ ասաց տատիկս: Ես զգացի, որ մայրս ինչ-որ բան էր ուզում ասել, բայց գերադասեց լռել, քանի որ քաշվեց պապիկիցս և միայն հասցրեց ինձ կրծքին սեղմել: Հետո պապս ինձ թողեց: Բարձրացրեց երջանկությունից շողացող դեմքը և երկու անգամ կրկնեց՝ «ապավե՛նս»: Սը՛սս, գա՛նձս, սը՛սս, կյա՛նքս,–ջանում էր ինձ հանգստացնել տատիկս: Ես հասկացա, որ պապիկիս անունը պապիկ էր, իսկ տատիկինս՝ տատիկ, սակայն մեկ է, ձայնս չկտրեցի, քանզի ինչքան ավելի հաճախ էի լսում այս բառերը, ավելի էի համոզվում, որ նրանցն էի ես՝ մի անգամ երկնքից պոկված աստղս, ծնողներիս կողմից միաժամանակ պահած երազանքը, նրանց սիրո պտուղը՝ մորս էության մեջ քնից արթնացած, մորս, հորս, պապիկ-տատիկների, նրսնց ծնողների, նրանց ծնողների ծնողների, ավելի անդին, էլի անդին, աշխարհաստեղծման օրից ուղեկցված, նախ-նյացս բոլորի գլխով անցածների վկան ու մասնակիցը: Նրանց կենաց հաջորդականությունը, նրանց մեղքն ու վարձքը, նրանց գլխով

անցած-դարձածներն ու կենաց պատմությունը զարմացնում է ինձ ժամանակ առ ժամանակ, քանզի բացահայտորեն իմ գլխով անցածը և ժամանակավորապես մոռացվածն է հիշեցնում: Նրանց անձայն խոստովանած սրբությունները իմ սրբություններն են, որը գուցե չեմ կրել բավարար արժանապատվությամբ, սակայն, երբ ես չկարողացա կրել, ամոթից կարմրեցի, վառվեցի, իսկ երբ կարգավորեցի ու կրեցի իմ բեռը, էլ ավելի ուժեղացա ու մեջքս ուղղեցի: Գաղափարախոսությունը երևի նրանց էլ է անհրաժեշտ, ովքեր վախենում են կորցնել իրենց գենետիկ հիշողությունը: Գաղափարախոսությունը նրանց էլ է անհրաժեշտ, ովքեր վախենում են կորցնել իրենց սրբությունները: Գաղափարախոսությունը կառուցում է համակարգեր: Գաղափարախոսությունը ստեղծում է ռեժիմներ: Գաղափարախոսությունը ծնում է նոր գաղափարախոսություն: Կամ գաղափարախոսությունն ընդհանրապես պայքարում է ընդդեմ այս աշխարհում առկա գաղափարախոսության և հաստատում է, որ մարդը ապագաղափարականացված պիտի լինի: Սա էլ է հո

գաղափարախոսություն: Ոչ պակաս խստորեն պայքարող իր կողմից ընդունված կարծրականները պաշտպանելու համար, քան կարող է դա անել ամենագաղափարախոս գաղափարախոսությունը: Ես ծնվեցի ու մեծացա այն ժամանակաշրջանում, երբ փտում-նեխում էր կոմունիստական գաղափարախոսությունը: Հիմա ես նախկինների հասարակության արժանավոր անդամ եմ և ապրում եմ այն գաղափարախոսության մշուշում, որն աշխարհի մասշտաբով տապալեց կոմունիստական գաղափարախոսությունը: Այնտեղ էլ եմ զգում օտարություն: Այստեղ էլ եմ օտար, քանզի, ինչպես երևում է, իմ գաղափարախոսությունն այնպիսի մարդու գաղափարախոսություն է, ում միայն սերը կարող է թելադրել ուրիշի հետ միաձուլվել: Երկրագնդով մեկ ճանապարհորդելիս, չգիտես ինչու, ես այն տարածքում հայտնվեցի, որտեղ օտար մարդկանց միայն վախն ու ատելությունն են միավորում: Վախն ու ատելությունը քանդուքարափ են անում: Ավերակների մեջ ես մարդկանց եմ տեսնում՝ առանձին-առանձին կանգնած: Նրանց մեջ տեսնում եմ, թե ինչպես

են շահել վախով ու ատելությամբ միավորվածները, վախից ընչաքաղցները: Հա՛: Շահել են, օգտվել են: Այնտեղից են քաղել, որտեղ չեն ցանել: Իսկ եթե ցանել են, ապա միայն ընչաքաղցություն, չարիք ու ստորություն: Մեկն էլ չի հարցնում է, թե ի՞նչ են ցանել ու ի՞նչ են քաղում, որովհետև իշխանությունն էլ է վախից ու ագահությունից գլուխը կորցրել: Իսկ մի մարդ կանգնել ավերակների մեջ ու հիշում է: Ի՞նչ է հիշում: Հիշում է, որ այն ժամանակ, երբ պետությունը դեռ նոր էր հաստատվում աշխարհի քարտեզին, հոյսով լի էր ու հուզախոռով, ժամանակ չուներ առաստաղ ամրացնելու կամ նոր տան հիմք գցելու: Հիշում է, որ հետո էլ ժամանակ չունեցավ, քանի որ իրար հաջորդեցին պատերազմն ու պարտությունը: Հա՛, ժամանակ չունեք: Այս քանը մտածելուց անգամ սարսռում էր: Խղճուկ: Արժանապատվությունը ոտնահարված, բռնադատված ոգով: Ոչ էլ հետո ունեցավ ժամանակ, քանի որ աչք ու ձեռքի միջև անգամ կեղծվեցին հարաբերությունները: Հա՛ դե, չունեք ժամանակ, կամ չգիտեք կամ ոչ էլ երբևէ կկարողանար անել այն, ինչն այս ընչաքաղց, չինովսիկացած,

գիշատչորեն առևտրականացած-վաճառականացած կյանքն էր հրամցնում: Հետո գործը հասավ լինել-չլինելու խնդրին, և նա էլ ստիպված եղավ մի բան մտածել: Անցավ իր արժանապատվության վրայով, սակայն, ինչպես երևում է, անհարմար զգաց դրանից և դրա համար էլ ընտրեց ամենացածր, ամենաանսկատ աստիճանն այն համակարգում, որը մի փոքր, բայց, այնուամենայնիվ, մատուցում էր ինչ-որ բան, թող որ վռիկ, թող որ կարտոֆիլ, որն իր կինը կկլպեր, կխաշեր, հետո խյուս կեփեր ու կուտեցներ իրենց որդուն: Թեև այս պատմությունը սրանով չի ավարտվում: Հիմա տղամարդն ինքը կանի իր խոհարարությունը: Խաշած կարտոֆիլի ջուրը չի թողնի, որ կինը թափի: Մի քիչ ձեթ կլցնի այդ խաշած ջրի մեջ: Կանաչի կկտրտի: Արմատներն էլ: Արմատներն էլ: Համարյա մինչև վերջ: Աղ ու պղպեղ կխառնի: Հետո ինչ-որ կերպ աչքերը կհառի կղզիների նման տեղ-տեղ հավաքված ձեթին, որն իջևանել է խաշած ջրի վրա: Կհասկանա, որ անգոր է եղել ձմեռվա անհաղորդ խլություն-դաժանության դեմ: Մտքերին չի տրվի: Կաշխուժանա: Կնոցը ձայն կտա՝

այ՛, ինչքան բան է պատրաստվում կարտոֆիլից: Կասի ու կծիծաղի: Կծիծաղի, որ թաքցնի իր անզորությունը պաղ հայելու պես իր վիճակն արտացոլող կնոջից: Ճաշի կնստեն: Սուսուփուս կուտեն: Լուռ: Անձայն: Հայացքներն իրարից փախցրած: Չեմ ուզում՝ կասի տղան և կարտոֆիլի խյուսի ափսեն մի կողմ կղնի: Երեկ էլ սրանից կերավ: Երեկ չէ առաջին օրն էլ: Դրանից առաջ էլ: Հա՛, ու ի՞նչ զարմանալի բան է, որ չուզենա: Մարդը կուչուհուպ է լինում ինչ-որ չարիքի սպասումով: Նա էլ երկար սպասել չի տալիս: Կե՛ր՝ կռվում է կինը տղայի հետ: Կե՛ր, հո գիտես, ուրիշ բան չկա: Ճմլվում է տղամարդու սիրտը: Կնոջ բերանից դուրս թռած խոսքը գնդակի պես է հարվածում նրան: Թոյնի պես: Ամենաահավոր թոյնի: Հիշում է՝ ժամանակներ առաջ որն էր բերում քարանձավ: Կարոտվում են այն ժամանակները: Անիծում է իր անզորությունը, իր տկարությունը, որովհետև մոռացել է որսորդությունը: Մոռացել է արհեստը: Մոռացել է՝ ինչպես էր փորում, մշակում հողը և նա էլ էր երախտագետ՝ կեր էր տալիս իրեն: Չգիտի: Ոչինչ չգիտի: Գրող է: Այնպիսի արհեստի տեր, որի կարիքը չունի

Նախկինների հասարակությունը: Ոչ էլ որևէ մեկին կարող է դատապարտել, հանդիմանել սրա համար, քանզի նախկինների հասարակությունը շատ ռիթմիկ, շատ արագաշարժ, շատ ճարպիկ հասարակություն է: Օրըստօրե ավելի շատ մխրճված իր որոնումների մեջ: Իսկ իր գործն արագ-արագ լինել չի կարող: Իր գործը մի՛տք է պահանջում: Մի՛տք է պետք: Որսորդի համառությամբ սպասում է անհրաժեշտ: Դե՛, դրա համար էլ չեն համապատասխանում իրար ինքն ու նախկինների հասարակությունը: Տարբեր ռիթմերով են առաջ գնում: Կամ ավելի շուտ այն որակով են համընկնում իրար, որն իրեն մատուցում է խաշած կարտոֆիլի՝ կանաչու կտրտած արմատներով լի ջուրը: Այն օրվա իր գոյությունը: Օրեցօր ինչ-որ բանով պահպանվող գոյություն: Օրըստօրե այն միտքը, թե ինչո՞վ պահպանես գոյությունդ, ինչպե՛ս մատուցես մարմնին սնունդ, որ նա վայր չընկնի: Ջհանդամն իր գլուխը: Տղային մատուցի մի բան, որ մեծանա: Իր որդուն: Իր միս ու արյանը: Իր սիրուց պահպանված աստղին, որն իր հայտնվելու ու մանկական առաջին լացի հետ հասկացրեց, ձայն տվեց այն

մարդուն, ով հիմա ինքն է գոյության ծանր բեռի բեռնակիրը: Այս գործառույթը վզից կախվեց՝ իր անցյալի ու ապագայի արանքում: Իր միսն էր ուզում վաճառել, սակայն այնպիսի միջնորդի հանդիպեց, որն ինքն էլ իր միսն էր վաճառում: Իր սեփական միսը: Միայն թե նա չգիտեր, թե ում պիտի վաճառեր, և ընդհանրապես, ո՞ւմ էր պետք էս անտեր երկկամը: Նա հոգին էլ էր վաճառում, սակայն իր սիրտը խառնեց, վատ զգաց և դրանով էլ երևի փրկվեց: Թեև, այնուամենայնիվ, վաճառել է հոգին: Մանր մաքսանենգ է: Հայրենիքից գոռով գջլած, տոնավաճառ դարձած հողի վրա այնպես է քարշ գալիս, որ կարծես ոչինչ էլ չկա: Վշագործ մեշոկ է տանում իր հետ: Ռուսական արտադրության «տուշոնկաներով» է այն լցնում: Կամ՝ հնդկացորենով, կամ՝ մակարոնով, շաքարով, վերմիշելով: Մեշոկը գցում է շալակը: Իրեն ուղեկցող տոնավաճառային ռաբիս երգերի հետ: Հաղթական, հուռացած, անտարբեր հայացքների հետ: Անզորության ցավի հետ: Նաև՝ մեջքից լսելի ծիծաղի, որը երևի իր հասցեին էլ չի հնչում: Բայց, մեկ է, վառում է ուտերն ու ծոծրակը: Ոչ էլ շրջվում է:

Հետաքրքիր չէ անըմբռնելին: Առաջ կանցնի: Առաջ կանցնի: Բեռնախցիկը կբացի: Մեշոկից կդատարկի ապրանքը: Բեռնախցիկը փակում է: Ճանապարհին պարապ-սարապ կանգնած բլրկադուստերի մոտ բաժանելու երկուպարիանոցներ է փնտրում գրպանում: Նստում է: Մեքենայի մեջ: Սառում է հայացքը: Գլխի է ընկնում, որ հենց դրա համար էլ կանգնած էր բլրի վրա: Միալար անձրևի տակ, միակ շոգենավին աչքը հառած: Հեռվից էլ գիտակցում էր, թե այդ պահին իր մեջ ինչ էր կատարվում: Մեղսալի: Մեղսալի: Մեղկորեն մեղսալի: Մի անգամ արդեն դարձած ձկների կերակուր: Այնուամենայնիվ, ոտքի կանգնած: Այնուամենայնիվ, վերադարձած: Միևնույն է, ցանկացող, որ մարդ զգա իրեն: Մի մարդ: Մի մարդ: Անապատի տապից խարկված մի հոգնած հոգի: Բուրգերի նման դասավորված գաղափարական համակարգերի միջև թափառող մի հոգնած մարմին: Մի տղամարդ: Մի մարդ, որը ոչ միայն կենսաբանական գոյապահպանության է ձգտում, այլև ստիպում է դեզերել մենակյացին, դեզերել տառապյալին, որպեսզի նա հավատ չկորցնի: Քար չդառնա:

Շարեշար դասավորված համակարգի մի մաս չդառնա: Որպեսզի չհատվի: Չավարտվի: Քարի չփոխակերպվի: Քանզի եղել է, կա ու պիտի փոխանցվի, պիտի շարունակվի: Համաշխարհայնացման սովերն ամենամեծն է: Այդ սովերում, մոլեկուլների պես փոքրացած մարդիկ՝ այբուբենակարգված մի ցնցող, կանոնիկ հերթականությամբ: Սովերը մեծ է: Սովերը բոլորին կտեղավորի: Սովերն աճում է: Իսկ նա դեգերում է: Որպես բեզարած հոգի: Որպես բեզարած մարմին: Հոգևած երակներին ուղեկից հոգևած արյամբ: Այնուամենայնիվ, արյան հույսն ունի, թող որ այն հոգևած արյան, որն իր մեջ կրում է գեթ փոքրիկ մի գնդիկ անգամ: Այդ գնդիկը հինհին իրադարձություններ է հիշում, արկածներ է հիշում, ու քանի որ հիշում է, նաև հավատում է, որ արժե իր դեգերումը, իր փնտրտուքը: Հենց այդ գնդիկն է արյունը վերածում մարդկային արյան: Դրա՛ մեջ է հոգին: Իսկ այնտեղ, ուր հոգի կա, սեր կա նաև: Իսկ հիմա ասես ամեն ոք ու ամեն ինչ պայման են կապել, որ չարացնեն մարդուն ու հոգին հանեն: Մինչդեռ անհոգի մարդն ինքնըստինքյան դատապարտված է

հիշողության կորստի: Հիշողությունը կորցրած մարդն էլ ապագա չունի: Դրա համար էլ նա հաճախ է սևեռվում որդու վրա: Պրպտուն հայացքով փնտրում է այն փոքրիկ գնդիկը, որի հույսին է այսօր մնացել: Իր հոր հայացքն է հիշում: Իր վրա լռելյայն սևեռված: Ինչ-որ բան համառորեն փնտրող իր դեմքին կամ վարմունքին: Կհասկանա, որ իր հայրն էլ յուրովի էր պայքարում ձմռան դեմ: Հո թողե՛լ է նման հայացք: Ու նաև արյանն ուղեկից փոքրիկ գնդիկ: Այն հուշը նաև, որ, պահարանի մեջ փակված, ինչպես էր հոր՝ իր վրայով այնքան մեծ պիջակի թևքերը դնում ուսերին: Հա՛: Թողել է: Բայց բոլորից շատ էլի այն հայացքն է իրեն հիշեցնել տալիս: Ինչ-որ բան փնտրող: Պահակած: Բարության ու հույսի շողով հեռվից լուսավորող: Այն ժամանակ իր հայրն էր ներկայի բեռնակիրը: Այսօր հենց ինքն է: Նստել է հիմա մեքենայի մեջ, մի ձեռքում բռնել է պլաստմասե բաժակը, մյուսում սև հացի ու երջիկի կտորը, նայում է Դիդի Դիդոմիի մայրուղու կենտրոնում աճած եղևնուտին ու մտածում այն մասին, որ գուցե իսկապես աղբակույտի մեջ է իր նման մարդու տեղը: Հա՛: Գուցե: Քանզի

Մաքսիմեի հետ հանդիպումից հետո դատարկվել է ինքը, այն դատարկ շի պես, որ ուրախացած բռնել էր իր ձեռքերում երկաթե ոչ մեծ աղբարկղի վրա կոացած սրտաժմլիկորեն ճարպիկ այն պառավ կինը: Երեք թեթրիանոց դատարկ շիջ որն ունի հինգ հազար դոլար արժողությամբ երիկամ: Չզանգահարեց չոլախ Նանան: Չէ՛, - մերժում է չոլախ Նանան, - ինչո՞ւ պիտի գանգեի, որ... Հրե՛ս, իմ ոտքով եմ եկել: Վերջապես իմ երիկամն ուզո՞ւմ են, թե՞ ոչ, քալքատոնո՞ւ Նանա: Այ՛ մարդ, դո՞ւ չպիտի ծախսեիր իմ երիկամը, - հայտարարում է չոլախ Նանան, կնքված փաստաթղթի պես ցույց տալիս ծոցատետրը և ասում՝ այ՛, հոգուդ մեռնեմ, հրե՛ս, էս քո հեռախոսը, էս էլ քո հասցեն, քո անուն-ազգանունը, այ՛, էստեղ էլ գրված՝ ե-րի-կամ: Իսկապես, գուցե դո՞ւ օգնես ինձ վաճառել երիկամ: Չոլախ Նանան այնպիսի անձնավորություն է, որ պարտքի տակ չի մնա: Չէ՛, չէ՞՞ ժխտողական ասում է Նանան, - էդ դուք պիտի վաճառեք իմ երիկամը, վայ՛ ինձ, գլո՞րխս չմեռնի, - խեղճանում է չոլախ Նանայի հայացքը, - ես էլ ի՛նչ հույսեր ունեի: Ախր, չգիտեմ որտեղ թաքնվել էս

պարտքատերերիցս: Արի՛, ասում եմ, իմ մեշոկի մեջ պահեմ քեզ: Կարելի՞ է: Ուրախանում է չոլախ Նանան՝ Աստվա՛ծ քեզ օգնական: Հետո հետևում է ինձ և արժանապատիվ կաղությանը համեցեք լինում մեշոկիս մեջ: Այսպես է: Իմ մեշոկն իր մեջ տեղավորում է ամենքին ու ամեն ինչ: «Տուշոնկաներն» ու հնդկացորենն էլ հո ինքնըստինքյան: Չոլախ Նանային էլ: Կամ գուցե թախիծն էլ, որ այս գոռոզ կնոջն ուղեկցեց փողոցում: Իմ մեշոկում էսվերն է՛ նաև: «Օհ» բացականչության նման կտրուկ ու ջերմ: Մեկ՛ ուրախ-զվարթ: Մեկ՛ կատակող: Մեկ՛ աշխատող, ու մեկ էլ՛ ռազմիկ: Ցածրահասակ, բայց շատ բեռ բարձող: Բա՛րև, էսվեր: Օ՛հ, բա՛րև: էսվեր, ո՞նց ես: Օ՛հ, ոչի՛նչ: Դո՞ւ ես ինձ պատմել դողապիս Շակոփայի մասին: Չէ՛, ես չեմ ծանաչում նման մարդու: Ես էլ չեմ ծանաչում նման մարդու, էսվեր: Բայց նրա հոհռոցը լսում եմ: Ծիծաղում հա՛՛ ծիծաղում է: Ծիծաղում հա՛՛ ծիծաղում է: Իսկ իմ աչքը պաղում է: Ես հիմա զառանցում եմ, էսվեր՛, որովհետև հիշում եմ Մադոննային ու իմ տղայական պատանու-թյունը: Երբեք չի վերադառնա տղայական

պատանությունը, քանզի գնացել է պատանությունը: Ո՛չ: Պատանությունը խելագարվել է: Բատկայի «պարտյանկաների» հոտը եկավ: Ոսկեատամնավորի լպիրշ ծիծաղը նվաստացնում էր ինձ: Ես ու իմ պատանությունը հորաքրոջս ու իր ամուսնու գերեզմանների նման հեռու-հեռացել ենք իրարից: Հիմա այստեղ ես եմ: Այստեղ իմ տղայական պատանությունն է: Իսկ մեր արանքում ռուսի քանակն է: Խաղաղապահ բանակ են ասում: Հա՛ դե, ցավում է, էնվեր, իմ ոտնահարված տղայական պատանությունն է ցավում: Ցավում է: Ցավ: Ցավում է: Ցավ: Ցավն է ցավում, քանզի սուր է այն ու անհույս... դատարկ շիշ հայթայթած պառավ կնոջ վաղվա օրվա պես անհույս: Մաքսիմե՛, տո բո՛գ, ծախվեի պիտի քեզ, հա՛, բայց լավ է, սիրտս խառնեց, և գուցե դա էլ փրկեց ինձ: Թեև դու ի՛նչ անես, երբ այս սրճարան բեզարած մարմի՛նս քարշ տվեց բեզարած հոգուս: Մահողածածկ պատեր: Դռների ոսկերիզ բռնակներ: Ինչ-որ կարմիր բան էլ՝ նախասրահում: Ամեն ինչ կպչուն էր: Քաղցր ու կպչուն: Ուզում եմ մոռանալ քեզ, սակայն չեմ մոռանում, որովհետև դու՝ էլ

տեղավորվեցիր իմ մեշոկում՝ ոտքդ՝ ոտքիդ, սկսեցիր բարակ սիգարետ խաղացնել մատներիդ արանքում, լավ հարմարվեցիր քո վարդագույն շարձով և հիմա այնտեղից այնպես ես նայում ինձ, ինչպես մե՛ղքն է ընդհանրապես նայում վախով ղեկավարվող հասարակությանը... Ժպիտո՛վ: Թեթև՛, թեթև՛: Մաքսիմե՛ի պես արտահայտիչ: Քեզ կզուգավորեի, Մաքսիմե, և գիտե՛ս ում հետ: Էն, որ «պեղեռաստկան» թողնում է սեղանի վրա և, այնուամենայնիվ, այնպես է քայլում, որ ասես դարձյալ «պեղեռաստկա» կա ձեռքին: Լավ կհասկանայիք իրար: Մի տեսակ հանդիսավոր կընթանայիք այս աշխարհի չարյաց հետ: Անսիրտ-անհոգի կբամբասեիք: Մերթ ընդ մերթ ծը՛-ծը՛-ծը՛ կանեիք շրթունքներով, ժամանակ առ ժամանակ էլ գլուխներդ կտմբտմբացնեիք: Լավ կմտերմանայիք, քանի որ այն երկվորյակների պես նման եք իրար, որոնցից մեկին ես առաջին անվանեցի, մյուսին էլ՝ երկրորդ: Աղչի՛, Մայա՛: Աղչի՛, Մանանա՛: Դո՛ւք էլ եք էստեղ: Բա՛րև, աղջիկներ: Դե հիմա ասեք, ո՞ր մեկդ եք առաջինը և ո՞ր մեկդ՝ երկրորդը: Էն ժամանակ ո՞նց ասացի... Բա որ չիղչե՛մ: Թեև

ինչ նշանակություն ունի: Նրանցից հո ավելի լավն եք: Այո, իսկապես: Ձեզ ուղղակի այն է դուր գալիս, ինչ մակերևույթին է, և, չնեղանա՞ք, բայց առանց լրիվ հասկանալու եք ձեռք զցում որևէ մի բանի: Էքստրասենսությունն ինչ-որ արտակարգ բա՞ն է նշանակում: Էքստրասենսներ եք դառնում: Ժողովուրդը սկսեց շարժվել դեպի եկեղեցի՞: Հավատացյալներ դարձաք: Ազգային շարժումը վրաններ՞ բացեց: Այստեղ պիտի լինեք: Պոռնկությունը բիզնես կոչվեց: Պոռնիկ դարձաք: Բջջայիններով եք ժամերով շաղակրատում: Ու դեռ մի բան էլ՝ ամենանորաո՞ճ բջջայինն եք ուզում: Ողորմելիներ՞ եք դուք, ողորմելիներ: Գուցեն երջանիկներ, թեև չեմ կարծում, որովհետև ձեր մտքի կիզակետն այստեղ է, որտեղ ինչ-որ բան առաջինն է ընկնում ձեր աչքով և առաջինը դառնում լսելի ձեր ականջներին: Լսվում բարձրաձայն: Ա՛յ, Էսպեսի բաներ, ի՛ն Մայա: Ա՛յ, հենց այսպես, ի՛ն Մանա-նա: Իսկ թե որի՞դ առաջին անվանեցի և որի՞դ երկրորդ, սա իսկապես ոչ մի նշանակություն չունի անվայության հոտը, որը նման է կարագի հոտի, մեկիցդ էլ է գալիս, մյուսիցդ էլ: Այդ հոտը

ինձ էլ դիպավ: Հա՛ դե, սա էլ՝ այս հոտն էլ այստեղ, իմ մեշոկի մեջ: Իմ վշագործ մեշոկում: Ահա՛, բարձր ոտքերի վրա կանգնած, կռունկի նման պտտվում է սարկավազը: Այնպիսի զննող հայացքով է նայում ամեն ինչի, ասես ուզում է հարվածել կտուցով: Հետո ասես դժգոհությունից կարմրատակում է ու շարունակում պտտվել եկեղեցով մեկ: Տեսողում է: Դե հիմա այստեղ, ներսում էլ քրքրի՛, այստեղ էլ զննի՛, այստեղ ավելի շատ բան կտեսնես, քան դրսում ես տեսնում: Գնա՛, հա՛, զնա՛, ա՛յ այդպես: Մ՛նա այստեղ՝ վշագործ մեշոկում, իսկ ես հիմա պիտի ճաշեմ: Բա՛րև ձեզ, կարտոֆիլի խաշած ջրի մեջ կտրատած կանաչեղենի արմատներ, որ այսքան թույլ կանաչով ներկում եք եռացած ջրում «բացվող» օսլան: Ուտելիք լինելուց բացի դուք նաև իմ ափսոսալի մեղկությունն եք ու արժանապատվությունը: Դե՛, լո՛ղ տվեք այսպես, կղզյակների պես տեղ-տեղ առանձնացող ձեթի ու հացի հետ միասին, որոնք պատամիկներով կկտրատեմ, կփափկացնեմ, գդալով կվերցնեմ, կփչեմ, հով կանեմ և օրավուր գոյություն կպահպանեմ: Կպահպանեմ, քանզի միայն մարմին հո չե՞մ,

հոգի եմ նաև: Հոգուս մեջ թափանցող սարսուռը հոգուս գոյությունն է ինձ հիշեցնում, և հենց դա էլ պահպանում է ինձ: Սա օգնում է: Այն մեկի հոգին, որը ժամանակ առ ժամանակ այն եկեղեցում է փրկություն փնտրում, որտեղ իր տատի գուրգուրած սրբապատկետի նման պատկեր է սրտով տեսնում: Եկեղեցու առաջ՝ մուրացկաններ: Պահպանե՛ք կուսակցական կարգապահություն և միասին վրա մի՛ տվեք: Վերջիվերջո կուսակցություն ստեղծե՛ք, մուրացկաններ: Այս երկիրն աշխարհի քարտեզին հաստատվելու օրվանից ի վեր, կուսակցությունները մուրացկանությունից բացի ոչինչ չեն արել, դուք ումից եք պակաս, որ... Հեռուստացոյց, իմ հնամենի՝ հեռուստացոյց, դու ի՞նչ անես, որ անսպասելի ինձ համակած ամոթից ինքս էլ գրգռված ծամածոռում եմ դեմքս: Ո՛չ: Դու ոչ մի կապ չունես: Դու պարզապես այն ես արտացոլում, ինչ այս աղմկուս կյանքն է քեզ մատուցում՝ սկանդալ, սկանդալ, սկանդալ: Ինքնագովազդ: Գովազդ: Սկանդալ: Սկանդալ: Սողոմոնորացած աչքերի թարթում: Ինքնագովազդ: Գովազդ: Դամտապատապա՛: Դո՛ւմպատապատա: Դումպա՛տապատա: Դո՛ւմպա: Գնա՛ց:

Գորսալիզմ: Ու ի՞նչ փափկասուն: Վա՛յ ինձ: Սողոմոնորացած: Գորսալիզմ: Գովազդ: Օտար ռիթմին հարմարեցրած վրացական սկանդալ: Ինքնագովազդ: Քաղաքական թոք-շոու: Չայնոլ ի՛նձ տուր, ինդորո՛ւմ եմ: Դամ-տա-պա-տա: Գովազդ: Էս է ու էս, հեռուստացոյց իմ, իրոք որ իմ հնամենի, աչքիցս երբեք չկտրվող, իմ ու Քեթի-Նոյի ձմռան իրիկունների համամասնակից, էլեկտրաէներգիայի կլանիչ, «բոյեվիկներով» ու մելոդրամային սերիալներով լեցուն, բայց, այնումենայնիվ՝ նայվող, այնուամենայնիվ՝ աչքից չկտրվող, չգիտեմ էլ՝ ինչու: Դե հիմա, արի՛, համեցիր իմ մեշոկի մեջ ու այնտեղ թարթիր աչքերդ: Թեև ոչ, մի րոպե համբերիր, նախագահի ձեռքը պիտի սեղմեմ: Բա՛րև, բատոնո՛՛ նախագահ: Էս ի՞նչ էլ փափուկ ձեռք եք ունեցել, բատոնո՛: Այո՛, բատոնո՛, այո՛, աշխարհի նոր վերաբաժանում: Հասկանում ենք: Այո՛: Իսկապես: Հասկանում ենք, որ դուք էլ եք հասկանում: Մի՛ հուզվեք, մենք համառ, ամրապինդ ցեղ ենք, ու կհաղթահարենք: Անկասկած՝ կհաղթահարենք: Այո՛, ինչպես մինչև հիմա դիմացել ենք, այդպես էլ կդիմանանք: Միայն թե, պարո՛ն,

մկան ծերտի գաղջ հոտն է մեզ տանջում: Ծանր հոտ է: Խեղդող: Նվաստացնող: Իսկ ձեզ չի՞ հասնում այդ հոտը: Առնետներ: Առնետներ: Գո՞ծիների պես չաղացած: Կառավարական գրասենյակի միջանցքում երկու ոտքերի վրա են քայլում: Խորհրդարանի միջանցքում էլ: Ընդհանրապես, միջանցքներում գնալ-գալ սիրում են: Ինչպես երևում է: Դեմքերն այնպես վարդագույն է, որ իրոք խոճկոր կկարծեք: Երևի խոճկորներ են: Չէ՞: Իշամկներ: Այո՞, իշամկներ: Մկան ծերտի հոտով են մատնում իրենց: Ծանր հոտ է: Խեղդող: Նվաստացնող: Ծանր: Միասին պաշարեն՝ Այո՞, բատոնո՞, բայց ինչպե՞ս պայքարենք միասին: Համբերությամբ: Բարի՛: Ես ու Քեթինոն առանց այն էլ շատ համբերատար ենք: Լավ մնացեք: Հաջո՞ղ: Ի դեպ, իսկապես փափուկ ձեռք եք ունեցել, բատոնո՞: Հեջ դարդ չանե՞ք, կղիմանանք: Հա՞, Քեթի՛: Քեթինո: Քեթևան: Հո կղիմանանք: Ինչպես որ մինչև հիմա դիմացել ենք, այդպես էլ էլ սրանից հետո կղիմանանք: Չէ՞: Հիշո՞ւմ ես այն իրիկունք, Քեթի՛: Գուցե չես էլ հիշում, իսկ ես չեմ մոռանում: Մինչև երեխային կքնեցնեիր, ջուր եռացրեցիր:

եռացրած ջուրը լցրեցիր «գրեկայի» մեջ: Հետո «գրեկան» տարար ու երեխայի անկողինը տաքացրեցիր: Նախ՝ ոտքերի մոտ: Հետո՞ գոտկատեղի: Հետո՞ վերև, ուսերի մոտ: Հետո նորից ոտքերի մոտ տարար: Երեխային պատկեցրեցիր անկողնում: Ճակատը պաչեցիր: Բարի երագներ մաղթեցիր ու խոհանոց մտար: Ես այն ժամանակ հոյսով էի լի: Լուռ և հոյսով: Քանզի իմ երիկամն ինձ էր պատկանում, իմ ձեռքին էր: Դու ալեհավաքի պես որսացիր ինձնից ծառագայթվող հոյսը, ու հայացքդ փափկեց: Այդ գիշեր ես ու դու չձանրացրինք մեր ուղեղը և չարձագանքեցինք մեր մտքում հայտնի մարդկանց ազգանունների մեր խաղին՝ ան-ով սկսվող կամ բան-ով, էն-ով կամ վին-ով: Այդ գիշեր ես ու դու միմյանց վերադարձրեցինք մեր սեփական մարմինների զգացողությունը և գծուծ ձմեռվանից ինչ-որ մի բան գոնե պոկեցինք: Հա՛: Այդպես էր: Հետո նորից ջուր տաքացրեցիր: Կոկա-կոլայի շշի մեջ լցրեցիր: Շիշը չարչարանքի ձայներ հանեց, մեջքն ասես կոտրվեց: Գլխաշորդ փաթաթեցիր շշին, լանջիդ դրեցիր ու հետևեցիր ինձ: Քեթի՛, այս ձմեռն, այսուամենայնիվ, մեր

ձմեռն է: Ու քանզի մերն է, պիտի խլենք նրանից մեր ամեն ժամը, ամեն օրը, ամեն րոպեն ու ամեն իրիկունը: Սա դու էլ գիտես, ես էլ, քանի որ մա՛րդ ենք, ու քանի որ մարդ ենք, դարձյալ ձգտում ենք դեպի մարդկային երջանկություն, ինչպես բաղեղը՝ ծառի կատարին: Քեթի՛, գիտե՛ս, մեր սիրո զեղումներում ես միշտ այն լուծությունն եմ հիշում, որով դու վարակեցիր ինձ: Ես միշտ հիշում եմ այն անսպասելի օտարումը, անկողնուց միանգամից վեր ցատկելը և մահճակալի մի անկյունում դառնորեն տխուր միայնությամբ կուչ գալը: Հետո իմ ոտքի վրա էլ զգացի շշից թափվող ջրի տաքությունը ու ապա՝ թացությունը, ապա և՛ հեռավոր «դվիժոկների» դողալուց ճոճությունը, որ համնում էր մեզ: Իսկ դու նստած էիր մահճակալի անկյունում և ժամանակ առ ժամանակ կրկնում էիր՝ ա՛խ, էս կյանքի... Ա՛խ, էս կյանքի... Ես ջանում էի ծիծաղով ցրել այսպես հանկարծ վրա հասած գիշերը, բայց իմ ծիծաղը կեղծ էր, և դա դու անմիջապես զգացիր, դրա համար էլ դարձար ավելի հեռավոր, ավելի օտար ու ավելի անհասանելի: Դրա համար էլ քո ձայնը լավեց այսպես

մենավոր ու այսպես դառնաղի՛ ա՛խ, էս կյանքին, ա՛խ, էս կյանքին ի՛նչ ասեմ, Քեթի՛... Այս կյանքն էլ, ահա՛, իմ մեշոկում: Իմ վշագործ մեշոկում՝ իմ կյանքը: Իմ վշագործ մեշոկում՝ իմ ցավը: Իմ թախիծն ու տխրությունը: Իմ մեշոկում՝ իմ սրտխառնուքը: Իմ օտարումը: Իմ մեշոկում՝ իմ տղայի շնչակտուր, հատ-հատ արտաբերած բառերը՝ կմեռնե՛մ, ես հիմա կմեռնե՛մ: Իմ մեշոկում՝ ինձ համար անձանտթ մարդկանց դեմքեր, իմ մեշոկում՝ իմ վաճառել չկարողացած երիկամն ու իմ չծախված հոգին: Իմ մեշոկում՝ իմ անզորությունն ու իմ անճարակությունը: Իմ մեշոկում՝ «տուշոնկա»-ներ, հնդկացորեն, բլոկներով սիգարետներ, մակարոնն ու շաքար: Իմ մեշոկում՝ իմ պարտությունը, ոսկետատամնավորի լպիրշ ծիծաղը, բատկայի «պարտյանկան», ու իմ անզորությունը: Իմ մեշոկում՝ իմ գառանցանքներն ու մի քանի անգամ տեսած տեսիլքը՝ վիթխարի կենդանու կմախքը: Ողնաշարին փոքրիկ ծիտիկ է՛նստած: Երկարակտուց: Կարմրադոշիկ: Բոլորովին էլ նման չէ լեշակերի: Լեշ ուտում է ահարկու, փայլուն, սև անզղը: Սերմնագռավն էլ ագռավի ցեղից է: Ղա՛-ղա՛ արեց,

Նորից դա՛-դա՛ արեց, տեղը փոխեց: Թռավ՝ աչքը սերմնագռավին: Լերկ սարերի համայնապատկերը և Մուխաթգվերդիի աղբանոցը: Գարշահոտից տարուբերվող դեզերումներ: Էհեն՛, ո՛վ աստղեր, գորշ ձմեռվա մառախլապատ օրվա ետևում մնացած իմ քույր-եղբայրներ: Ի՛նչ գործ ունեի ես այստեղ: Ի՛նչո՞ւ եկա: Հա՛: Ստիպեցի: Իսկապես ստիպեցի: Աղբակոյտի վրա: Վախո՛, ախպե՛րս: Աղբակոյտի վրա: Ե՛րբ ստիպեցի: Մեքենայի մեջ: Հա՛: Մեքենայի մեջ: Մեքենայի մեջ, հարբած-հարբած՝ ստիպեցի: Հետո քունս տարավ: Չգիտեմ՝ քո՞ն էր, թե՞ տեսիլք: Աչքերս բացեցի: Ի՛նչ գործ ունեինք այստեղ՝ հարցրեցի Վախոյին: Դու չասացի՞ր, տար ինձ աղբակոյտի մոտ՝ առանց աչքը կտրելու աղբակոյտից պատասխանեց Վախոն: Մի որոշ ժամանակ՝ այսպես: Հետո սկսեց նայել երկու կովերին ու կանգ առավ նրանց կողքին կանգնած սպիտակ մեքենայի մոտ: Ու մի տեսակ դարդոտ ասաց. աղբակոյտն էլ իր հանդիսատեսն ունի: Դեմքը շրջեց դեպի ինձ: Կարմրած, հարբած ու հոգնած աչքեր ունեցր: Այսպիսի աչքերում արցունքները հեշտ են կուտակվում: Ջրակալեց հայացքը: Ու սկսեց՝

պիտի գնա այստեղից: Հոլանդիա: Կամ Բելգիա: Կամ Գերմանիա: Ջառ ու ջհանդամը: Որտեղ որ կընդունեն, այնտեղ էլ կգնա: Որպես գաղթական կհանձնվի: Կվաճառի բնակարանը, կվաճառի այն հին մեքենան, ամեն ինչ կվաճառի, եթե ընդհանրապես մի բան գտնի ու ռադ կլինի այստեղից: Հոգնել է արդեն: Իր կյանքի տասներկու տարին երկի՛նքն է կուլ տվել, թե՛ հողը, դա էլ չի հասկացել: Դե՛, ուրեմն, կգնա, քանզի այստեղ օտար է ինքը: Հա՛ դե կգնա, որովհետև օղն այլևս չի բավականացնում այս ծանծաղուտում: Անպայման կգնա, քանզի պարտվել է բոլոր պատերազմներում ու ձեռք բերել պարտված մարդու բարդույթ: Կգնա, անպայման կգնա, որովհետև ինքն էլ մարդ է և ուզում է մի անգամ գոնե ապրել իսկական մարդկային կյանքի երջանկությունը: Ինձ էլ նույնն է խորհուրդ տալիս: Թե չէ՛ հո տեսնո՞ւմ ես: Հո չե՛ս կուրացել: Հո պարզ տեսնո՞ւմ եմ էս անտերը: Գուցե իսկապես քոռացե՞լ ես: Հա՞: Քոռացել ե՛ս: Հա՞: Քո՛ն եմ: Ապուշ եմ: Հիմար եմ: Եվ կամ ի՛նչ եմ ընդհանրապես: Գուցե պատասխանե՛մ: Դրա համար էլ լռել եմ, որովհետև ընդհանրապես ոչ մի բան չեմ

պատկերացնում: Ոջնչությունն եմ: Հա՛: Ոջնչությունն: Բուք: խելագար: Ե՛ս եմ ամեն ինչում մեղավոր: Հենց ե՛ս: Իմ հիմար պատկերացումներով խղճի ու նամուսի մասին: Իմ քար հայացքով, որը ջանում է հիշել գոյություն չունեցածը: Մինչև այսօր ինձ հանդուրժում էր հանուն մեր ընկերության, բայց հիմա ինքն էլ է գերհոգնել: Չի՛ կարողանում: Մա՛րդ է, դրա համար էլ չի կարող: Աղբանոցը չէ մարդու հասանելիքը: Աղբանոցը մարդու կողմից օգտագործված ապրանքների հասանելիքն է ու բաժինը: Իսկ ինձ, ինչպես երևում է, դուր է գալիս այստեղ լինելը: Հա՛: Երևի դուր է գալիս, որովհետև ահա այսպես կպա մեքենայից՝ այստեղ գալու համար: Կպա, ու բերեց ինձ: Եկանք: Այստեղ ենք: Երևի սա էլ ինչ-որ մի բանի նախանշան է: Երևի այն էլ ասե՛մ, որ Վախոյի տեղն էլ է աղբակույտի վրա: Ընդհանրապես, այս վերջին ժամանակները, ես փոխվել եմ: Այ՛, է՛ն, ախպե՛րս, - ինչպես ասացի, ի՛նչ հեգնանքով դիմեցի Վախոյին: Ինչո՞ւ եմ հայացքս փախցնում: Հանկարծ ոչինչ չխառնեմ: Հո լա՛վ եմ հասկանում, որ ոչինչ չխառնեմ: Հա՛: Սա Վախոն է, իսկ ես ո՞վ եմ ընդհանրապես: Ո՞վ է ինձ

կորցրել: Հիմա՛ր: Անճարա՛կ: Անբա՛ն: Կովելու գլուխ էլ չունեմ, թե չէ: Էսքան կշտամբանքի ո՞նց կդիմանայի: Անճարակ եմ՝ դրա համար: Ես Վախոյին ասում եմ, որ նա էլ ինձ նման անճարակ է ու անբան: Վախոյի աչքերն ավելի են պղտորվում: Վարանումով բացում է դուռը: Դուրս է գալիս: Գնում է մեքենայի առջևից: Նորից շրջվում, բացում է դուռն ու ասում, որ դուրս գամ մեքենայից: Գաղջ աղբակույտի նեխած ձեռքն ասես հասավ ինձ, ու քթիս խփեց գարշահոտը: Ես դուրս եմ գալիս մեքենայից ու կանգնում Վախոյին դեմառդեմ: Վախոն բռունցքով խփում է քթիս: Քաոս: Պայթյուն: Իմ աչքին պայթյունը դառնում է քաոս: Հետո սև-սպիտակ ալիքներ: Սև-սպիտակ ալիքներից Վախոն վերադարձավ: Ո՛չ: Միայն Վախոյի դեմքը: Մեքենային եմ հենված: Եթե մեքենան չլիներ, կընկնեի: Ոսկոր: Ցավ: Պնչերիցս շրթունքներիս վրա իջնող թանձր արյունն աղի է: Վախոն ուշադիր ինձ է նայում: Մոտիկից: Իմ դեմքին մոտ և զննական հառած նրա հայացքը, դեմքը: Ո՛չ: Հիմա՛ նպատակամետ: Անպաշտպան: Բաց: Բայց շատ ավելի մոտիկ, որ դիմանա իմ հարվածին:

Ներքևից խփում եմ: Պատճառ կար, ու խփում եմ: Ներքևից՝ ծնտոխն: Ոչ այնքան ուժեղ, քանզի քթիցս հորդացող արյունն ու սև-սպիտակ ալիք-ներն ուժս խլել են: Նախ Վախոյի գլուխը ետ գնաց, հետո էլ մարմինը չկարողացավ պահել ու ընկավ: Զարմացա: Չէի սպասի: Բայց երևում է, Վախոն իսկապես ուժասպառ ու հարբած էր, դրա համար էլ ընկավ: Մոտեցա: Նայեցի: Սառուցից ճաքճքված գետնի վրա էր պառկած, լայն բացել էր աչքերն ու երկնքին էր նայում: Նստեցի կողքին: Հողը երկաթի նման պինդ էր: Քթիցս թափվող արյունն աղբակույտի գաղջ հոտը զգացնել չէր տալիս: Կզնամ, ասաց Վախոն, անպայման կզնամ: Հետո ինձ նայեց՝ ես կզտնեմ իմ փրկությունը, բա դու ի՞նչ պիտի անես, ասաց ու նորից նայեց երկնքին: Ինչ մնացել է՝ հանձնիր, միառժամանակ յուր կտանի, իսկ ես արդեն պիտի գնամ՝ ասաց քիչ անց: Մի որոշ ժամանակ մնացինք այդպես: Նա՛ պառկած ու հայացքը հառած երկնքին: Ես՝ նրա կողքին, երկաթի պես պինդ գետնին նստած: Ա՛յ, սերմնագռավները թռան: Ե՛րբ, ե՛րբ, - ասաց Վախոն: Իսկապես թռան: Կոռացին, անցան:

Իսկ ինձ իմ լռությունը հիշեցրեց, որ ես կարող եմ շարժվել քար անշարժության մեջ: Սա՛ եմ ես: Ու քանի որ սա եմ, ես կարող եմ նույնիսկ առանց տեղիցս շարժվելու ճամփորդել այսպես: Ինչպե՛ս չեմ կարող: Կարող եմ: Մի անգամ չէ, որ այսպես ճանապարհորդել եմ: Հիմա էլ կճանապարհորդեմ ու այն ճամփով կզնամ, որով անցա փողոցով այն վերջին անգամ: Բոլորովին էլ չեմ շարժվի տեղիցս ու այնպես կզնամ: Ե՛րբ եմ վերջին անգամ եղել փողոցում: Մի շաբաթ առաջ: Թե՛՞ հինգ օր առաջ: Հա՛: Մոտավորապես: Սալահատակին՝ մարդ: Անցա: Հեռացա: Կողքով անցա: Ինչո՞ւ: Մեշոկը պիտի բերեի շուկա: Լեյլան: Մական: Դարեջանը: Առօրյա նույնականություն: Հացի փող: Դրա համար գնացի: Մեշոկս կախեցի ու գնացի: Կամուրջ: Հա՛: Կամրջով գնացի: Գնում եմ կամրջով: Կամրջի տակով Քուռն է հոսում: Քուռը կակաոյի գույն ունի: Պիոներական ճամբար: Ընդհանուր թեյամանից կակաո են լցնում: Կակաո: Կակաո: Թեյամանին տիրություն անող, մազերը նոր կտրած տղան քիթն է վեր տնկում ցուցամատով: Նույն ձեռքի մատնեմատով ու բութ մատով աչքերի ծայրերը վար

քաշում: Փոքրիկ կապիկ: Մակակա: Կարմրահետույք կապիկը պիոններական ծամբարում խեղկատակություն է անում: Տաք, առանց շաքարի կակաո՝ ընդհանուր թեյամանից: Գուցե դրա համար էլ ինձ թվում է, թե Քուռն էլ պիտի տաք լինի: Չէ: Սառն է: Հիմա ամեն ինչ սառն է: Սառնությունը սրում է իրականության զգացողությունը: Ցրտի միջով եմ գնում: Ես ու փողոցը փաթաթվում ենք իրար ցրտով: Փողոցն ինձնից է մրսում: Ես փողոցից եմ մրսում: Մի նկարի մեջ ենք: Մի շրջանակի: Ես՝ խիստ դիմագծերով շարժվող: Ընդհանուր շրջանակում: Որտեղ էլ որ տեղափոխվես, սառնության ֆոնը չի խախտվի: Անպամած երկինք: Ձմեռ: Հալչող ձյունից թաց սալահատակ: Խոնավություն: Ցուրտ: Ցուրտը համատարած իրականությունն է: Ես շարժվում եմ այդ իրականության մեջ: Համատարած իրականությունը փողոցն է: Փողոց: Կամուրջ: Ես: Գետ: Շալակիս՝ մեշոկ: Խոնավության զգացողություն՝ ոտքերիս մեջ: Խոնավությունը՝ ցեխոտ: Մի քիչ որ կանգնեմ, խոնավությունը կներծծվի արյանս մեջ: Նախ՝ որպես խոնավություն: Ապա՝ որպես ցուրտ: Սարսուռ՝ արյանս մեջ: Սկսում եմ

հիվանդանայ: Հիվանդանում եմ: Գրիպ: Հոդերիս մեջ՝ ցավագին տկարություն: Խոնավ երեսաքիչ: Ապրել չես ուզում: Ջուրն էլ զգացնել տվեց, ավելի սրեց խոնավությունը: Մոտիկ է: Հեռու է գնում: Քուռը հեռվից է գալիս ու հեռու է գնում: Ես էլ իմ ծամփով եմ գնում: Արդեն քանի ժամանակ է այսպես: Մի մեշոկով: Մի ծանապարհով: Մի ցրտի մեջ: Նա գետ է, ես՝ մարդ: Երբ կամուրջն անցնեմ, կմոռանամ: Մոռացությունն էլ իրականություն է: Համատարած իրականության մեջ մոռացություն կա: Անցիր, կմոռանաս: Հետո իրեն կհիշեցնի: Անսպասելի լույս կտա խավարի խորքից: Ջիպ: Մեծ: Պլպլան: Մուգ ապակիներով: Ծանր անվադողերի վրա, որ հանկարծ չշրջվի: Հայացքս հետևում է: Հայացքը հիշեցնում է: Հա՛: Հիշում եմ: Եվ կամ ինչպե՛ս կարող եմ չհիշել: Անպայման պիտի հիշեմ: Որդի լպրծուն փորի նման կաթիլ՝ ականջիս մեջ: Անձրև: Անձրևի մեջ: Սարալանջին: Մենակ: Աչքս հառած միակ շոգենավին: Ջիպը՝ ծանր անվադողերի վրա: Իջավ: Առափնյայի կողմից: Աչքիցս կորավ: Առջևում՝ մեքենայի ծանապարհ: Հայացքս՝ ծախ: Ազատ է: Մի քայլ առաջ: Գնում եմ:

Ճանապարհի կեսին եմ: Հայացքս՝ աջ: Ազատ է: Գնում եմ: Քարշ եմ տալիս մեշոկս: Մի քիչ առաջ ընկած: Մեշոկի բերանը՝ երկու ձեռքով բռնած: Մայթ: Փողոց: Գնում եմ: Հիմա այլ իրականության մեջ եմ: Ուրիշ շրջանակում: Իրականություն է փողոցը: Աջ կողմում՝ տուն: Ձախ կողմում՝ սկյոր ծառեր: Ես: Մեշոկը՝ շալակիս: Խոնավությունը ոտքերիս մեջ եմ զգում: Եթե կանգնեմ, ապա խոնավությունը կներծծվի արյանս մեջ: Նախ՝ որպես խոնավություն: Ապա՝ որպես ցուրտ: Գնում եմ: Տեսնում եմ: Սալահատակին: Մարդ: Կռացած: Դեմքը չի երևում: Մոխրագույն անձրևանոց: Կապերն արձակած բատինկաներ: Կենդանի: Մեռած: Կենդանի: Չգիտեմ: Չեմ կարող կանգ առնել: Խոնավությունը կներծծվի արյանս մեջ: Չեմ կարող կանգ առնել: Լեյլան: Մական: Դարեջանը: Հացի փող: Գնում եմ: Հեռանում եմ: Կենդանի: Մեռած: Չգիտեմ: Գնում եմ: Իր պրոբլեմն է: Գնում եմ: Մեշոկի բերանը երկու ձեռքով բռնած: Հեռանում եմ: Որտեղից՝ եկավ այս արտահայտությունը: Իր պրոբլեմն է: Ժամանակի բնավորությունը: Բառից զգացվող ժամանակի շունչը: Խոսակցական լեզուն փոխվում է:

Ժամանակը փոխում է լեզուն: Շանս: Շանսեր: Շանսովներ: Շանսայիններ: Իր պրոբլեմն է: Իմ պրոբլեմն է: Ուրիշի պրոբլեմն է: Առաջ ուղիղ ասում էին՝ գնա՛, ախպեր ջան՛, ծամփադ անցիր: Վերջին անգամ եմ զգուշացնում, այ՛ ախպեր: Կիսով չափ դուրս հանած խանչալի նման արխայիկ բառ՝ ախպեր: Չէ՛: Հիմա այդպես չեն դիմում: Այսօր ասում են՝ գիտեք ի՞նչ, դա Ձեր պրոբլեմն է: Սրտով ուզում են քեզ օգնել, սակայն դա հո ըո՞ պրոբլեմն է, ինքն ի՞նչ անի: Քաղաքակրթության ցուրտ: Մինչև հիվանդանալը՝ սարսուռ: Իմաստը նույնն է, ձևը՝ տարբեր: Այնուամենայնիվ, այսպես ես ճառում: Այսինքն՝ այսպես ես մտածում. գուցե լեզվի մեջ էլ ես հենարան փնտրում, դրա համար: Երբ բոլորի համար հասկանալի լեզվով ես խոսում, տնավարիության, սրտամոտության զգացողություն ես ունենում: Ամեն ժամանակի՝ իր բառերը: Միլիոնավոր մարդիկ միևնույն արտահայտությամբ վրավրա արտաբերում են միևնույն բառերը: Ես հիշում եմ: Անցա: Հիշում եմ: Կուսակցական պատասխանատվություն: Կուսակցական պատիվ: Հեղափոխության առաջնորդ: Ընկեր:

Կուսակցական ընկեր: Կուսակցական: Կոմկուսակցական: Վերկուսակցական: Ավելի վերև, ավելի: Անցա: Հիշում եմ: Անցա: Քայլերթեր: Շքերթեր: Ձեռքով թափահարումներ՝ տրիբունայի ուղղությամբ: Կարմիր վզկապ: Արձանի պես մեծ, արձանի պես անհողողող, սպիտակ գոգնոցով կոմերիտմիության քարտուղարուհին: Ոտքերը չռած: Ես նրա ազդրերի արանքով անցա: Դպրոցի մի աննկատելի անկյունում, աղվամազոտ բեղերով կոմերիտական տղաները թաքուն սիգարետ են ծխում: Ես նրանց աղվամազ բեղերի վրայով փափուկ քայլերով անցա: Անցա: Մարքսիզմի հիմունքներն անցա, որոնք, բանից պարզվում է, ստեղծվել են գերմանական դասական փիլիսոփայության, անգլիական քաղաքատնտեսության և ֆրանսիական ուտոպիական սոցիալիզմի միասնության արդյունքում: Հո անցա՞: Այո՞: Իսկապես: Անցա: Ես անցա այս բառերը: Այս դեմքերը: Գործի մեջ հո տրամադրություն պե՞տք է: Ի՞նչ գործ: Ո՞ր գործի մեջ: Ինչո՞ւ: Բայց անցա: Հա՛: Անցա: Հետո ավելի այս կողմ: Ավելի մոտիկից: Ես անցա «գաստոյը», միջազգային ռադիոալիքների վրա ֆռֆռացող

«պերեստրոյկան», ժողովրդավարական վերափոխումները: Կոոպերատիվն անցա: Հույսից շողացող դեմքեր: Տանկերի դղրոյուն: Սրած բահի երես: Սաղավարտավոր բանակայինների դաժան դեմքեր: Անցա միտինգները: Բարձրաձայն բացականչություններ՝ գաո՛ւ-գաո՛ւ-գաո՛ւ-մարջո՛ւն<sup>3</sup>: Անցա տրանսպարանտներով՝ ցուցարարների միասնականության միջով: Հետո իրար տանել չկարողանալն անցա: Դարձյալ տանկերի դղրոյուն: Ռմբակոծումների դղրոյունն անցա: Փշրված ապակիների միջով: Ինքնահրկիզվող մարդու սրտի միջով անցա: Անցա իմ թշնամու վեր բարձրանալու միջով: Օդանավասանդուղքի մոտ խռնված մարդկանց հրմշտոցը տեսա: Այս պարտությունների հետևանքով աչքերիս մեջ ցավով անցա: Անցա մարդկային կյանքի կողոպուտի ու արժեզրկման միջով: Այս ամենի հետ միասին այն էլ անցա, ինչը մինչև իմ ծնունդն անցյալն է հիշեցնում: Անցա, որովհետև վերապրեցի: Որովհետև աչքովս ընկավ գառիվերից կախված ծառը՝ արմատներից կառչած: Որովհետև ունկերիս մեջ հնչում էր հոգնաբեկ

3 Կեցցե, կեցցե (վրաց., ծ. թ.):

հավքերի վերջին ճախրի ծայրը: Որովհետև քարանձավում էլ էի թաքնվում, և զանգերի զողանջը հրկիզվող գյուղի ծուխն էր քուպ-քուպ բարձրացնում երկինք: Բայց դարձյալ պայքարում էի: Դրա համար էլ՝ կամ: Չեմ ընդհատել: Գնում եմ: Հիմա արդեն այս ժամանակի միջով եմ գնում: Շանս: Շանսեր: Շանսուվներ: Շանսայիններ: Շանսը ձեռքիցդ բաց չթողնես: Կամ սա իմ շանսն է: Կամ՝ սա քո շանսն է: Կամ էլ լրիվ՝ նրա շանսն է: Ու էլի՝ սա իմ պրոբլեմը չէ, որովհետև Ձեր պրոբլեմն է, և շատ եմ խնդրում ինձ այս պրոբլեմից աատեք: Վազն անցեք ինձնից: Հանեք իմ ուսերից մեշոկը: Մեշոկը ծանրացել է: Բայց մեկ է գնում եմ: Ե՛րբ տեսա առաջին անգամ այս մեշոկը: Չեմ հիշում: Տեսա: Աչքերս հառած՝ նայեցի: Օդը ներծծեցի թոքերիս մեջ: Մոտեցա: Չեղքս առաջ տարա: Վշաթել գործվածքը գրգռեց արյունս: Գրգռոն ուժ տվեց: Միանգամից դրեցի ուսիս: Գնա՛: Գնում եմ: Մեշոկն եմ քարշ տալիս: Շատ է ծանրացել, որովհետև տարիների հետ տարիների բոլոր ժամանակներն էլ անցա: Դիողի արագ-արագ ռիթմի տակ, ոտնաթաթերի վրա պար եկող գարուններս անցա:

Ճամփեզրի ճաշարանի փրչոտ շան պես ալարկոտ, դանդաղաշարժ ամառներս անցա: Հարեկ որմնանկարի նման կամաց-կամաց երփներանգվող աշուններս անցա: Ոտնատակերիս մեջ որպես խոնավություն ներս ճողոպրած ձմեռներս անցա: Անցա գարնանամուտները, ամառնամուտներն ու աշնանամուտները, ձմեռնամուտներն անցա: Ժամանակը՝ ժամանակի մեջ: Իրարահաջորդ: Իրար ետևից անցնող: Ի՛նչ ասես: Այնտեղ էլ էի մեշոկ քարշ տալիս: Անսովոր սպասք՝ մեղք ու վարձք: Մեղք-վարձք: Ամեն ինչ տեղավորվում է: Անցիր: Վարձքը մոտ է թեթև անցիր: Չկա վարձք, կորե՛լ է այն, ընկճված ու ծանր անցիր: Ու գնում եմ: Մեշոկն եմ քարշ տալիս: Ծանրությունից մի քիչ առաջ ընկած: Մեշոկի պարանոցը երկու ձեռքով բռնած: Տևական պարտությունից հոգնած մարդ: Չորացած ցախի մի շյուղից փշրված հոյսեր: Մեծ խարույկը վառված է: Մեծ խարույկ: Փոքրիկ շյուղից: Խոհանոցի լուռ-ջերմ ընդդիմությունից մինչև փողոց: Համահունչ՝ սրտիս ռիթմին: Սկսվեց: Դրան՝ վերջ: Նորը սկսվեց: Ռիթմը արագացավ: Սկսվեց: Ազատության ապրում: Մոտ է:

Շատ մոտ: Հենց ձեռքդ մեկնես: Դիդգորիի պատերազմն անցած հասարակ գինվորի խիզախություն՝ ճանապարհը փակենք ու մտքով իսկ չանցկացնենք մեջքով կանգնել թշնամուն: Դա էլ հո ի՞մն է: Հո հիշո՞ւմ եմ: Հա՛, հիշում եմ: Եղել եմ այնտեղ, ո՞նց չեմ հիշի: Վաղնջական ուրարտական ժամանակների Հարի հարալոյի նման: Հարի հարալո՛: Հարլալալո՛: Հարի հարալո՛: Հարլալալո՛: Երակներիս մեջ: Հին գինու նման: Հին կարասից: Հին գինու նման: Սուր: Լեզու դաղող: Կոկորդ ջերմացնող: Երակների միջով դժվար սահող երգի նման: Հարի հարալո՛: Հարլալալո՛: Հարի հարալո՛: Հարլալալո՛: Աստծու ողորմածություն: Փա՛ռք Աստծուն: Աստծու ողորմություն: Փա՛ռք Աստծուն: Կա: Կամ: Չկարողացան բնաջնջել: Այնուամենայնիվ՝ կամ: Արևից՝ աչքերս կկոցած: Լուսնին խոնարհվող: Աստղալի երկինքը՝ երկու ձեռքով կրծքիս սեղմած: Արևը մայրն է իմ, լուսինը՝ հայրս, այս փոքրիկ-փոքրիկ աստղերը քույր-եղբայրներն են իմ: Շումերական եզ հեծած՝ կոլխական վարագի ժանիքը՝ որպես թալիսման: Կովկաս: Այս լեռան կատարին ոտքդ դրած: Այս լեռան կատարին ոտք դրած

քո թշնամուն ես տեսնում: Տեսնում ես: Ոչ մի լեռ չի ծածկի իմ ախոյանին: Միևնույն է՝ կփնտրեմ, կգտնեմ, միևնույն է՝ կսպանեմ, որպեսզի ազատագրվեմ: Մարդկայնությունը՝ որպես բարձրագույն գաղափար: Եթե տղամարդ ես, եթե կնկա լաչակ չես կապել գլխիդ, ոխերիմիդ արյունը պիտի առնես: Մինչև արյունը չառնես, չես ազատագրվի: Չես կարող: Չես ազատագրվի, ուստի և անձնական ազատության համար մշտապես պիտի կռվի մեջ լինես: Հատուցում: Արյան հատուցում: Դու էլ, նա էլ՝ քո ախոյանը: Այս տրամադրվածությամբ, այս գաղափարով ապրող: Օտարի աչքը սա գիտի: Օտարի աչքը լավ է տեսնում ձեր թուլությունը: Ուստի և օգտվում է նույնիսկ: Հիմար կլինեք, եթե չօգտվեք: Հա՛ դե, օգտվում է, որովհետև վախենում է ձեր մի բռունցք դառնալուց: Մի բռունցք դառնալուց: Մի սրտի տրոփյուն դառնալուց: Մի շանթահարումով՝ ընդդեմ իր խարդախության: Ով հարձակվում է, նա խարդախ է: Եվ հարձակման մեղքից ավելի չարացած, քան կա իրականում: Սիրող խառնում է նրա նենգ աչքերից: Հոգիդ բռնադատված է: Սպասում: Սպասում: «Մեր գլուխը

մեզ պիտի պատկանի»<sup>4</sup>: Այդ օրն էլ մոտեցավ: Հարձակվողի թուլությունը զգացիր: Հիմա տեսնենք, թե ո՞վ՝ ո՞ւմ: Հիմա տեսնենք, թե ո՞վ՝ ո՞ւմ: Խոհանոցի լուռ ընդդիմությունից՝ փողոց: Դու: Նա: Նորից: Որքան ջրամբար ավերվեց: Տրանսֆարանտներ: Մեզաֆոններ: Գառ՛: Գառ՛: Գառամարջո՛ւ: Ցուցարարների մեջ՝ ծանոթ դեմքեր: Նա էլ, ինչպես դու, նստած էր խոհանոցում: Հիմա փողոցում է: Այն աղջիկն էլ: Համալսարանից ես հիշում: Կարծեմ սիրում էիր: Չէ՛: Դուր էր գալիս: Ժպտում էր քեզ: Ձեռքով ես անում: Գառ՛: Գառ՛: Գառամարջո՛ւ: Ինչ-որ տեղից ծնված կուսակցություններ: Մի օրում ստեղծված: Մայրի՛կ, մայրի՛կ, ինչ լավ տղա է, չէ՞, ի՞նչ պայծառ հոգի ունի, չէ՞: Այդ պայծառ հոգով տղային խորհրդային անվտանգությունն է աշխատեցրել ու ձեռքը խոսափող դրեց: Սակայն հիմա այդ մասին ոչ ոք չի մտածում, որովհետև ազատությունն հենց այստեղ է, միայն թե ձեռքդ պիտի առաջ պարզես: Այդ տղան հենց ազատության մասին է խոսում: Վերևից ներքև՝ անհամար

4 Ի. Ճավճավաձեի հայտնի արտահայտությունն է (ծնթ. թրգմ.):

դեմքերին ուղղված: Անհամար կողմերին: Միասնական գառ-ին: Գառ՛: Գառ՛: Գառամարջո՛ւ: Տնային տնտեսուհի: Բերանի մոտ պահած ձեռքերով: Ջրակալած աչքերով՝ մամա՛, մամա՛, ինչ լավ տղա է, չէ՛, ի՞նչ պայծառ հոգի ունի, չէ՞: Դե թող հիմա ճամփա տան էդ ճիվաղները: Իսկ այն տղան խռպոտ խոսափողից գոռում է: Անհամար դեմքերին: Անհամար ուսերին: Միասնական գառ-ին: Գառ՛: Գառ՛: Գառամարջո՛ւ: Նրանց ու սրանց: Դպրոցականները՝ ուսուցիչների հետ միասին: Գործարանի բանվորները՝ տնօրենի գլխավորությամբ: Շրջաններից ուրքով եկածներ: Ինչո՞ւ ուրքով: Այսպես ավելի շուտ կհասնենք համընդհանուր մաքրության: Ինքնակեղեքիչ էքստազ՝ ուրքով, մինչև Քութախի ուրքով կգնամ: Քութախի չէ: Թբիլիսիի կենտրոն: Ռուսթավելի: Տրանսպարանտներ: Ժողովուրդ: Հոսք: Ցերոզով հիվանդացած անորոշ ազգությունների վրացիներ: Տեստր: Տեստր: Վրացիները սիրում են թատրոն: Թատրոն: Ձեռքին՝ «սետկա»: «Սետկայի» մեջ՝ մի շիշ օղի: Մի շիշ էլ՝ գարեջուր: Կարծեմ նաև՝ երջիկ: Գնաց տան ուղղությամբ: Վրացիները սիրում են, սիրում են

թատրոն: Գուրիական գյուղ: Երկհարկանի տան բակում հանգուցյալի դագաղ: Դագաղում մեռած տղամարդ: Դեմքին՝ թուփունագույնից կապույտի խփող մահվան դրոշմ: Դագաղի մոտ՝ հեծկլտալուց հոգնած նրա՝ արդեն այրին: Ժողովուրդ: Բակում՝ լռություն: Այրին չի կարողանում լաց լինել: Այ տղա, հանկարծ առանց խոսքի չթաղե՛ք: Շարժվող շշուկ՝ քար լռության մեջ: Գյուղի դպրոցի տնօրենը: Բարձրահասակ: Չորուկ: Մի քիչ գուրիական հնչերանգով խոսող: Նա է հիմնական խոսքն ասելու: Բարձրանում է սանդուղքին: Նկատելի հուզվում է: Այսօր մենք հրաժեշտ ենք տալիս մեր սիրելի... Այս բակը վերջին հրաժեշտ է տալիս մեր սիրելի... Փղձկում է: Խոսքը չի շարունակում: Էմոցիա: Էմոցիա: Նրա խոսքում էմոցիա չկա: Բառերը ծամծմում է: Հաճախ կրկնում է նույն բառերը՝ հիմա մենք վերջին հրաժեշտն ենք տալիս մեր սիրելի... Մենք երբեք չենք սոռանա մեր սիրելի... Ծառերին՝ դեղին, հասած կարայրկներ: Դարպասի մոտ՝ հեծանիվ: Սևազգեստ կանայք: Տղամարդկանց մեծ մասի գլխներին ափսեների պես տափակ գլխարկներ, և նոսր, շեղ կտրած բեղեր:

Էտոո, երբ դպրոցի տնօրենը վերջապես ամեն ինչ լրիվ իրար խառնեց, միանգամից ու կտրուկ ավարտեց իր ծեծված խոսքը և իջավ սանդուղքից, հայտնվեց այն կինը: Առանձնապես ոչ մի արտասովոր բան: Գեղջկուհի: Տան ու դրսի սև շոր: Աշխատանքից մաշված, ճաքճքված ձեռքեր: Նրա ամենամեծ զարդը երևի ծղոտի գլխարկն է, որով երբեմն գնում է թեյ հավաքելու: Արևահար դեմքն ավելի է ընդգծում նրա դեռևս թարմ, պայծառ աչքերը: Ահա գլխահակ մոտենում է դագաղին: Նա հանգուցյալի մտերիմ ազգականը չէ, սակայն քանի որ դպրոցի տնօրենի խոսքում էմոցիա չկար, նա շարժվեց դեպի դագաղը, թեև լացի համար նրան ոչ ոք էլ չէր հրավիրել դագաղի մոտ: Ու սկսեց: Նախ ցածրաձայն՝ ախպերըն, ախպերըն, ախպերըն: Ոչ ոք չզարմացավ: Ոչ ոք դեմ չգնաց: Ընդհակառակը՝ դուրները եկավ, ու միանգամից լռեցին, որովհետև բոլորն էլ այս ցածր ձայնի մեջ էներգիա զգացին: Զգացին այն, ինչի պակասն իրավունք չէր տալիս հուղարկավորել հանգուցյալին: Դե՛, կինն էլ հենց օգտվեց նրանց խրախուսանքից: Ու ցուցադրեց իրեն: Շողշողուն աչքերի մեջ՝

հարազատի սիրտ: Ապա մոտեցավ հանգուցյալին ու ձայնը բարձրացրեց՝ ախպեր, ախպեր, ախպեր ջա՛ն: Աչքերում՝ ոչ մի կաթիլ արցունք: Ոչ էլ՝ ձայնի մեջ: Հույզն է ավելի շատ: Շոգ-կրակ, որը գնալով ավելի է տոժացնում: Սեփական ցավը բացահայտելու քողարկված ծիգ ու ջանք: Սեփական զգացմունքները ժողովրդի առաջ ցուցադրելու ցանկություն: Հոգին մերկացնելու մարմաջից ծնված էքստազ: Էմոցիաների ժողովածուն՝ դեպի դագաղում հանգչող հանգուցյալը: Նպատակամղված: Այն, որ մահը մերն է, մենք՝ մահինը: Այն, որ վերջերս ամուսինն իրեն սիլլեց՝ դա՛ն էր տալիս: Այն, որ նախանցյալ տարի կորցրեց հարազատ մորը: Այն, որ մետաքսի շերամի վաճառքից իր հալալ քրտինքով հավաքած փողերը քսան տարեկան իր անպիտան տղան Բաթումիում բոզերի վրա ծախսեց: Ճանաչում էր հանգուցյալին: Ո՛նց չէր ճանաչում: Այս փոքրիկ գյուղում ինչպե՛ս կարող են իրար չճանաչել: Դե՛, ուրեմն նրա փոքրությունն էլ է հիշում: Բայց այսօր ահա դագաղում է: Մեռած է: Վա՛խ, վա՛խ, անցած-գնացած-թռած տարիներ: Վա՛յ մեռնողին: Վա՛յ մահին, որ մի օր

անպայման պիտի գա: Վա՛յ, ախպեր ջա՛ն, ախպեր ջա՛ն, ախպեր ջա՛ն: Ու անընդհատ այսպես՝ ախպեր ջա՛ն: Միշտ այսպես՝ ախպեր ջա՛ն: Էս մի փոքր գյուղում հենց քե՛զ էր ընտրելու էդ մահը, ախպերս: Քե՛զ էր հենց հնձելու, ախպե՛ր: Բայց ախր ինչո՞ւ հենց քեզ, ախպե՛ր... ախպե՛ր... ախպերը՛ս... Ու քանի գնաց, տաքացավ, ոգևորվեց, աչքերը բներից դուրս եկան... Խելագարի աչքեր դարձան... Մարդիկ էլ... Լավ ականջ դրեցին... Ոչ մի զարմանք: Ամենևին: Շարունակում են լսել: Իսքը մենակ ու էսքան ժողովուրդ: Բոլոր դարդերը կարող է լալ: Չի հանգստանում... Անհագուրդ է այս պահին իր ցավի քաղցրությունը... Մեկ էլ ե՛րբ կլինի էսպիսի բան՝ էսքան ժողովրդի առաջ ու էսքան բարձր ձայնով: Բոլորին լսելի: Այսքան ակնդիր: Այսքան ունկնդիր: Հայ-հայ՝ օրգազմին նախորդող հուզական էքստազի յանան: Այդպիսի տրամադրվածությամբ: Հիմա ինքը մահվան կինն է: Հանգուցյալի քար դեմքի մեջ ինքն իր անխիղճ-անաստված մարդուն է տեսնում: Նրա հետ գործ ունի: Էն ոչուփուչ այլանդակի հետ: Մարդ չի, չէ՛՛: Եվ քանի որ ինքը նրա միակ կինը չէ, այլ

անհամար կանանցից ընդամենը մեկը, այս օրը համարում է հենց իր օրն էլ: Ու ի տես բոլորի մերկանում է: Իմ սպիտակ մաշկը՝ արևի պես տա՛ք, տա՛ք: Իմ ցավը, ինչպես ծովի աղը բաց վերքի վրա: Իմ արցունքը՝ ինչպես ցող խամրող աչքերիս... Իմ շորը, որը ծածկում է իմ սպիտակ մաշկը, իմ անլուսին գիերվա պես սև՛, սև: Իմ ձայնը՝ սրտակեղեք: Սրտակեղեք: Սրտակեղեք: Բա չե՛ս լսում... Ինչո՞ւ չես լսում, խլացե՛լ ես, տո՛ խույ, տո՛ անաստված, տո՛ անիրավ: Ոչ է՛իր ծավել էսքան լավը դո՞ւ՛... Վա՛խ, ախպե՛ր, ախպե՛ր, ախ-պե՛ր... Ախ-պե՛ր: Այսպես էր ահա ողբում Նրա տատը: Այսպես էր ողբում այդ տատի տատը: Դրանից առաջ էլ, էլ ավելի առաջ էլ, Նախատատերն էին այսպես ողբում ու պտտվում հանգուցյալի շուրջ... Ծառին, քարին, լուսնին խնդրում ոգեկոչել հանգուցյալներին: Աստիճանաբար անշարժացող-քարացող հայացքներով: Փրփրած բերաններով: Գետնաքարշ: Հիմա ինքն իսկապես տեսնում, լսում է Նրանց: Ինքն էլ է ուզում Նույնն անել, բայց չեն թողնում: Հանգուցյալի այրու լացից ավելի շատ լացի իրավունք ոչ

որ չունի: Այս կնոջ ողբը լցրեց դպրոցի տնօրենի անսիրտ, անզգացմունք խոսքի դատարկությունը: Հիմա արդեն համարձակ, ազատ կթաղեն: Էմոցիոնալ ներգործություն: Էմոցիոնալ ներգործություն: Այլ կերպ լինել չէր էլ կարող: Որովհետև այստեղ արևն էլ այսպես ներգործուն, կիզիչ է լինում: Որովհետև այստեղ ցրտերն էլ ներգործուն են՝ մինչև ոսկորները մտնող: Այս բնության զավակն այսպես պիտի վարվի: Բնությունն անսխալական է: Այստեղի բնությունն ինքն արդեն շատ ավելի, չափազանց շատ էմոցիա է պահանջում: Չափազանց խաղ: Չափազանց խարդախություն: Չափազանց: Չափազանց սեր: Չափազանց ատելություն: Հպարտություն: Զոհաբերություն: Թեկուզև վախկոտություն: Թեկուզև քաջություն: Թեկուզև ապաշխարանք: Թեկուզև պատվախնդրություն, հարգանք: Թեկուզև: Թեկուզև: Թեկուզև: Թատրոնն էլ ոչ այլ ինչ է, եթե ոչ հենց սա: Թեկուզև: Վրացիները թատրոն սիրում են: Թատրոն լավ են հասկանում: Լավ գիտեն: Գիտեն՝ խորհրդավոր դարձած ինստիտուտներում: Գեղեցիկ կահավորված, գողտրիկ սենյակներում: Մի բաժակ թեյի հետ:

Մի գավաթ սուրճի հետ: Ամեն ինչ տեղը տեղին: Սակայն այն, ինչ այստեղ գիտեն, այնտեղ էլ գիտեն: Այնտեղ էլ խորհրդավոր դարձած ինստիտուտներում: Գեղեցիկ կահավորված, գողտրիկ սենյակներում: Մի բաժակ թեյի հետ: Մի գավաթ սուրճի հետ: Այնտեղ էլ տեղը տեղին գիտեն: Ո՛վ, ո՛ւմ: Ո՞րը որին: Ընթշամարտի ժամանակ ի՞նչ է պետք ու... Ոտքի տակ գցել, քացի տալ է պետք: Տա՛-րա՛-րա՛: Տրան՝ տա՛-րա՛-րա՛: Բա՛-րա՛: Երկու աշխարհ՝ մի մոլորակում: Դու՛ արանքում: Երկինքը: Պորտը: Չոխատաուրիում է կտրվել աշխարհի պորտը: Հասկանում ես, չէ՞, ինչ եմ ասում: Հա՛, եղել է նման բան: Հենց Չոխատաուրիում: Հենց աշխարհի պորտը: Հա՛ դե, քացի է պետք տալ: Պետք է: Պետք է: Ոտքի տակ գցելով՝ բռա՛խ: Բա-բա՛խ: Զու-պա-ո՛ւ: Զուպ-ջուպ-աո՛ւ: Բայց միևնույն է՝ պայքարում է: Միևնույն է՝ չկարողացան գետնել: Սող է տալիս: Դիմադրում է: Ուռած թշերին՝ դառնության կարմիր: Հասած լիմոնի պես դեղին մազերը ավելի դեղին՝ դառնության կարմրի մեջ: Ուհո՛ւ: Ուհո՛ւ: Ուհո՛ւ: Ու տրորվեց ընթշամարտի գորգը: Սահեց: Սահեց: Ուհո՛ւ: Ուհո՛ւ: Ուհո՛ւ: Շատ բան կորցրեց, թե՛ զիջեց:

Կովկասը հո կորցնում ու կորցնում է: Այնտեղ էլ՝ Միջին Ասիան: Նավթը: Գազը: Բամբակը: Ազդեցություն: Ճնշում: Ու սահե՛ց գորգը, սորա՛ց: Բեմականացված պատերազմներ: Խորհրդավոր դարձած ինստիտուտներում: Գեղեցիկ կահավորված, գողտրիկ սենյակներում: Մի բաժակ թեյի հետ: Մի գավաթ սուրճի հետ: Ու հիմա ո՛նց ես ուզում, պո՛չ էլ չխաղացնի: Գլուխը կտրած աքլորն էլ է որոշ ժամանակ թափտում: Արյուն: Արնաներկ բակ: Արնափետուր կացին: Նրա հայտարարությունները՝ արյնահեղության հետ կապված: Սրա հակադարձ հայտարարությունները ևս՝ արյունահեղության հետ կապված: Արյունը՝ քոնը: Արյունն արյուն է պահանջում: Կովկաս: Նախ՝ Բալկանները: Ապա և Կովկասը: Մինչև Բալկաններ, Քուվեյթը և ապա միայն՝ Կովկաս: Մինչև Քուվեյթը՝ Մերձբալթիկա, և հետո՝ Կովկաս: Մինչև Մերձբալթիկա՝ Արևելյան Եվրոպա և հետո՝ Կովկաս: Առևտուր: Մեծ տերության առաջնորդը հանդիպում է մյուս մեծ տերության առաջնորդին: Ժպիտ՝ հեռուստաէկրանի առաջ: Ո՛ւմ ժպիտն է ավելի գրավիչ: Սպասիր: Հիմա ծիտը կթոնի: Ըհը՛, թռա՛վ: Հիմա՛ գործ: Կովկասի

հարցը ժամանակավորապես թողնենք մի կողմ: Թողնենք: Հա՛: Թողնենք: Ձեռքը՝ ձեռքին: Սարը՝ սարին: Պաշ-պառշտի: Տրվեցին: Չոր շյուղ: Մի ճկկոցով՝ փշրված հույս: Մեծ խարոյկը վառված է: Մեծ համբույր՝ մի պստիկ, չոր շյուղից: Խարոյկ: Արյուն: Պատերազմ: Կուգես և բեմականացված անվանիր, բայց պատերազմը պատերազմ է: Գլխակապով զինվոր: Ռեմբո է: Իր խելքով: Ուսին՝ ավտոմատ: Գլխին՝ գլխակապ: Մի վրացին հաղթում է տասը հակառակորդի: Գիորգի Սաակաձեն Ակակի Խորավայի կատարմամբ: Թուրն առավ ձեռքը: Հինգ-վեց ծիծաղելի թաթար: Թրի մի հարվածով: Այս հավատով մեծացած: Ամերիկյան «բոյեվիկներից» խելքը կորցրած: Խաղում է: Ռեմբոն է: Առաջին անգամ տեսաբիզով տեսավ այս ֆիլմը: Տեսաբիզն էլ առաջին անգամ այն ժամանակ տեսավ: Ծղնեթում: Ընկերոջ ամառանոցում: Աո՛, ի՛նչ դայիմ տիպ է: Հըլը մի նայիր, տո՛, տե՛ս, հիմա ինչ կանի: Աո՛... ես քո՛... Որպես Ռեմբո՝ բեմականացված պատերազմ գնացած: Հետո, մոտավորապես երկու ամսում, պարսկական գորգեր գնող ֆիրմայի և չարտերային չվերթով

Դուբայ մեկնել ցանկացողների համար գովազդային հայտարարությունների արանքում որպես պատերազմում զոհված հիշատակվող: Ուրիշների հետ նա էլ: Ձե, ձե, իա, ձե, շվիլի, շվիլի, ձե, ուրի, իա, անի, ձե, շվիլի: 20 տարեկան տղա: Քսանմեկի մեջ: Կյանքը խաղ էր կարծում: Ձեր պատկերացնում, որ իրեն գնդակ կկաչեր: Այսպես էլ է լինում. մինչև այնտեղ գնալը մտածում ես, իսկ երբ արդեն տեղ ես հասնում, չես պատկերացնում, որ քեզ էլ կարող է գնդակ կաչել: Գետ: Աջ ու ահյակ՝ խրամատներ: Մարտիկների մոտ: Ծուռ՛... Ձայնը լավեց: Կտրվեց: Ծուռ՛... Նորից եկավ ձայնը: Կորավ: Մարտիկները զվարճանում են: Ծիծաղում են: Հիմա նրանց հանգստյան ժամերն են: Ծիծաղում են: Ծո՛ու: Ծվվաց: Կորավ: Ժամանակ առ ժամանակ լսվում է: Գնդակը ձվվում է, այն էլ ասես նրա համար, որ իմ այստեղ լինելն արդարացնի: Գիր: Գրող: Գրողը պիտի գրի: Այն մի ձվկոցով սպանի: Ահա՛, գրեցի: Սպանեցին, քանզի ամենասարսափելին հենց այդ մի ծուռ՛ն է: Նշանառու կրակված այն մի գնդակը: Եվ ահա սպանեցին: Քսան տարեկանին: Քսանմեկի մեջ: Սրանով էլ

չբավարարվեցին: Պարսկական գորգեր գնող ֆիրմայի գովազդային և չարտերային չվերթով Դուբայ մեկնել ցանկացողների գովազդային հայտարարությունների արանքում տեղավորեցին: Մյուսների հետ միասին նրան էլ: Կյանքի արժեզրկում: Սահմակեցուցիչ է: Անպատկառ անտարբերությամբ: Սառնասրտորեն ձեռքերը լվացած: Իշխանությունների զարմանքը՝ ինչո՞ւ ենք այսպես տարանջատված: Միանա՞նք: Միավորվե՞նք: Հեռուստատեսության առաջին ալիք: Կառավարական ալիք: Հաղորդավարուհին՝ խիստ լացակումած ձայնով՝ ձե, ձե, իա, ձե, շվիլի, շվիլի, ձե, ուրի, իա, անի, ձե, շվիլի: Եվ հետո՝ չարտերային չվերթով Դուբայ մեկնողներին... Ովքեր ցանկանում են մեկնել... Արի՛ գնանք, այ տղա, գնանք՝ նավթավառներ բերենք: Էժան նավթավառներ են, այ տղա: Գնանք: Ասում են՝ օգուտը մեկին մեկ է... Հը՞, տո՛ մունդոֆի: Չես գալի՞ս: Տո՛, ոտքերիս, թե չես գալիս: Գալիս ե՞ս: Դե՛, գնացի՛նք: Աբա՛: Դուբայ՛: Դուբայ: Դուբայ: Տա ռա՛ ռա՛ ռի՛ ռա, ռի ռի ռի ռա՛ Դուբայի ճերմակին, Դուբայի հրաշքին, ով քեզ սիրեց, նրա հոգուն էլ՝ տա ռա՛ ռա՛: Հայրենիքը մարդու

համար ինչ-որ շատ մտերիմ բան է նշանակում: Ասես անձամբ ես ճանաչում: Յուրային է: Միշտ քո սրտի մեջ է: Միշտ կարող ես ինչ-որ տեղ հանդիպել նրան: Մետրոյում: Ավտոբուսում: Փողոցում: Ռեստորանում: Եթե այսօր էլ չհանդիպես, փույթ չէ, քանզի գիտես, որ վաղը, մեկ է, պիտի հանդիպի քեզ: Խորհրդավոր դարձած ինստիտուտներում, գեղեցիկ կահավորված, գողտրիկ սենյակներում, մի բաժակ թեյի հետ, մի գավաթ սուրճի հետ: Կանխամտածված խարդավանք: Այս զգացողությունը պիտի օտարացնի քեզ: Կրկին՝ վրացու ձեռքով: Այլ կերպ չի լինի: Քաղաքացիական պատերազմ: Թբիլիսիի պատերազմ: Ինչպես կուգես անվանիր, բայց ծուղակ է: Դու կրակել ես յուրայինիդ վրա: Եթե անգամ չես կրակել, ինչ-որ մեկին հո գորակցե՞լ ես: Նշանակում է՝ կրակել ես: Հետևե՛լ ես, թե ոնց է գնդակը սուրում: Հետևել ես, ուրեմն վարձքը էլ կորել է: Ուրեմն արդեն դու ես մեղավոր ամեն ինչում: Մեղքը շատ թե քիչ բոլորի վրա է ընկնում: Մեղքին մեղք է հետևում: Մեղքը մեղքով է սպանում սովը: Մեղքը լցվում է լուսնի նման: Լիալուսինը՝ ճակատը գնդակահար, մեռած

գիշերվա մեջ: Այս ու այնտեղ՝ ծյուն: Հեռու-հեռավոր, անդադար, անլռելի՛ ոռնոց ու վայր՛ն... Ուտ՛ն... Բրքչացող պառավի բաց բերանի նման՝ գիշերը լուսացրած քաղաքն է վայում: Ուտ՛նու... Միայնության անկատար վարձքն է: Ուտ՛ն ու... Չարագուշակ նախազգացման անխոս հայացքն է: Ուտ՛ն ուտ՛ն... Լքված բարիկաղներից տարածվող համաճարակի շո՛նչն է: Ուտ՛նու... Այս որբացած սարերն են, որբացած դաշտերը, որբացած ծովափը, որբացած քաղաքներն ու գյուղերը, ուր ծակատըր գնդակահար լուսի՛նն է հառնում գիշերվա՛ մեջ մեռած: Ուտ՛նու... Իմ տղայի սո՛վն է վայում, իմ մեղկությունն է, իմ այս նվաստացո՛ւմն է, իմ շվար ու մոլոր վիճա՛կն է, բյուր կասկածներով լի օտարացո՛ւմն է միլիոնուկեսանոց քաղաքից, մարդկանց ներամփոփվածությունն է ու միմյանցից հեռացո՛ւմը, ձեռքիս քսված եղբորս՝ արյո՛ւնն է՝ մերձավորի՛ս, միս ու արյա՛նս, հարազատի՛ս, իմ արժանապատվությունն է ու հպարտությունը, որոնց կորցրի իմ անգորությունից ու հիմարությունից: Լքեցի՛: Լքեցի՛: Սալահատակին անօգնական ընկած մա՛րդ լքեցի: Վախո՛ւ, դու էիր այդ

մարդը, եղբայրս: Հա՛, դու կլինեիր: Բատինկաներն են հիշում: Ճիշտ այն բատինկաներն էին, որ կապիչներով հանգուցեցիր ու պատից կախեցիր: Հա՛, դրանք էին: Ես հիմա համոզված եմ, որ դո՛ւ էիր սալահատակին: Գիտեմ, որ դու Հոլանդիայում, Գերմանիայում կամ Բելգիայում դիմացող մարդ չէիր, չէիր կարող լինել: Այստեղ ընկար, չէ՞, եղբայրս: Հա՛, ընկար: Իսկ ես... Ապուշ կտրած անցա: Բո կողքից: Ինչո՛ւ այդպես անցա: Կողքանց: Պա՛րկ էի տանում շուկա: Ուղտերս խոնավությամբ էին լեցուն: Անցա քո կողքից: Հետո շուռ եկա: Բայց դու այնտեղ չէիր: Այնտեղ Բրիտոս Աստվածն էր, Վախո՛ւ: Նա, ում հիշում եմ տատիս գուրգուրած սրբապատկերից: Ահա այդպիսի դեմքով տղամարդ էր նստած սալահատակին ու նայում էր ջրափոսին: Տխուր, Վախո՛ւ, տխուր էր նստած: Զգացի, չգիտես ինչու զգացի, որ նրա սրտի թաղանթը բարակ է: Տխուր: Տխուր: Փոսին էր հայացքը հառած: Իսկ դու, Վախո՛ւ, դու ո՛ր չքվեցիր, ինչպե՛ս անհետացար այդպես հանկարծակի: Դո՛ւ էլ ե՛ս իմ մեշուկում: Գուցե: Ո՛վ իմանա: Ծանրացել է շատ: Ծանր քարի պես տեղավորվել շալակիս և իր

մկանսուտ բռունցքով ամբողջ ուժով սեղմում է ծոծրակս: Հա՛, ծանր է, բայց հիմա իմ վրա մի թեթևություն էլ եկավ, եղբայրս: Երբ ես շատ հոգնելուց գրեթե շնչահեղձ եմ լինում, թաքուն մտնում եմ տղայիս սենյակ: Մորս՝ աղերի կուտակումից կոկված ձեռքերով կարած ականջաբարձն եմ մոտեցնում քթիս, հոտոտում եմ, հոտը ներս քաշում, ու շունչս տեղն է գալիս, շնչառությունս՝ բացվում: Հետո պառկում եմ: Ականջաբարձը դնում եմ գլխի տակ: Մի ձեռքս ականջաբարձի տակով եմ անցկացնում, մյուսը՝ վերևից: Այտիս էլ եմ քսում, որ իմ տղային զգամ: Ու թվում է, թե սենյակում տարածվում է մորս արդուկած խոնավ սպիտակեղենի փափկանուշ բուրմունքը: Մինչև քնելս մի անգամ էլ կշնչեմ տղայիս գլուխը դրած ականջաբարձը, հեռու-հեռավոր հիշողությունը կբացի շուրթերս, իսկ հետո չգիտեմ, հետո ոչինչ չգիտեմ, հետո տեսնեմ, եղբայրս:



**Իրակյի Սամսոնաձե**  
(1961)

Արդի վրաց գրականության երևելի դեմքերից է՝ արձակագիր, դրամատուրգ։ Մնվել է 1961 թվականին, 1983-ին ավարտել է Թբիլիսիի պետական համալսարանի ժուռնալիստիկայի ֆակուլտետը։ Առաջին պիեսը տպագրվել է 1985-ին «Խելով-ներբա» (Արվեստ) ամսագրում։ 1992-1996թթ. եղել է «Դրամատուրգիա» ամսանակի գլխավոր խմբագրի տեղակալը, իսկ 1996-1998թթ.՝ նույն ամսանակի գլխավոր խմբագիրը։

Նրա շուրջ 15 պիեսները բեմադրվել են Վրաստանի տարբեր թատրոններում։ Իրակյի Սամսոնաձեն գրական ու թատերական բազմաթիվ մրցանակների դափնեկիր է, այդ թվում՝ Պետական, «Սաբա», «Կվալի»... Կերչինը Նրան շնորհվել է 2002 թվականին «Ականջաբարձ» վեպի համար։

